

# WANTOK

Niuspepa bilong Papua Niugini stret

- 25 yia nau


40 pes

Namba 1111

Wik i stat long Fonde, Oktoba 12, 1995

50 toea


## Lam putim ai long ol Kiwis



□ Faiv-eit Stanley Gene.



□ Kepten na hapbek Adrian Lam



□ Fulbek David Buko.

HULL, England Oktoba 10- PAPUA Niugini Kumuls ragbi lig kepten Adrian Lam i putim ai bilong em nau long ol Nu Silan bihain long kamapim sampela gutpela na strongpela pilai tru long helpim tim bilong em long winim ol Tonga long asdei moning(PNG taim).

Lam husat i kisim top awot bilong dispela pilai olsem Man of the Match na i save pilai wantaim Sidni Siti Roosters i skorim wanpela trai na setim tupela narapela na kamapim, stail bilong em long helpim ol Kumuls i kam bek bihain long ol i stap aninit long ol Tonga 20-0 long haptaim. Na sapos ol i ken winim ol Kiwis long St Helens long Fraide,

Papua Niugini bai go olgeta long semi fainel bilong Halifax Senteneri Wol Kap.

"Mipela i gat bikpela amamas tru," Lam i tok. Mipela i pilaim ol Nu Silan tupela taim long las yia tasol mipela i lus, tasol dispela pilai nau em Wol Kap.

"I bin gat planti bikpela ol bagarap ol liklik nem tim i wok long mekim na mipela tu i ken kamapim wanpela."

Long ol Tonga, kepten bilong ol Duane Mann i tok olsem dispela em i namba tu bagarap ol i kisim insait long 48 aua tasol taim sait bilong em i lus long las minit stret egensim ol Nu Silan 25-24. Na wantaim 1-pela

poin tasol insait long tupela pilai, interes bilong ol long pilai i pinis.

"Mipela i lusim dispela pilai long seken hap bilong pilai long wanem ol Papua Niugini i kam bek strong tru," Mann i tok. Mipela i kam long dispela tonamen long amamasim ol manmeri na mi ting mipela i ken go bek long ples na holim het bilong mipela antap."

Ol Kumuls klostu i bin lusim dispela pilai long haptaim taim ol i go baksait long ol Tonga 20-0 inap Lam i kamapim mejik bilong em na skorim wanpela trai na setim Stanley Gene wantaim Lucas Solbat long skoa long fainel minit. - AAP

● MOA RIPOT - BEK PES na RLN

### Praim Minista strongim K200,000 bilong Wutung pipel

PRAIM Minista na minista bilong Foren Afeas na Tred, Sir Julius Chan i strongim tru disisen bilong gavman long baim K200,000 i go long ol papagraun bilong Wutung long Sandaun provins.

Dispela mani em hap bilong K450,000 kompensesen we gavman dipatmen i luksave long en long graun i lus wantaim ol arapela samting i stap long en. Dispela em bikos long Vanimo - Wutung rot we i joinim Irian Jaya long narapela sait bilong Indonesia long intanesenel boda.

Long bekim ol askim bilong Gavana na Rijenal memba bilong Sandaun, John Tekwie long palamen aste, Praim Minista i tok ol i mekim dispela bihainim olgeta rot we ol i luksave long en. Mani i go stret long ol papagraun. Em i strongim tok olsem dispela i no kamap bihainim wanpela kain politik pasin.

Mista Tekwie i tok dispela pasin em pasin bilong wok politiks tasol na mani ya i kam long vot bilong gavman we inap helpim tasol liklik lain manmeri long Wutung.

Tasol Sir Julius i tok dispela i no inap stret long paitim toktok long long sais bilong grup we inap long kisim dispela kompensesen mani. Sapos ol i stretim olgeta samting pinis olsem K200,000 em bilong ol, orait ol i mas kisim. Maski sapos dispela i wanpela bikpela lain grup tru, ol bai kisim yet K200,000; Sir Julius Chan i tok.

Tasol Praim Minista i tok Gavana Tekwie i toktok paul long projek fan na kompensesen mani.

Antap long arapela askim bilong Mista Tekwie long makim fultaim Provinsal Edministreta bilong Sandaun, Sir Julius i tok provins ya i bin nogat fultaim edministretiv het long sampela taim nau. Bikos i gat planti toktok na tingting i bin paul namel long ol olupela Provinsal Eksekutiv Kaunsil olsem na samting i no bin kamap stret.

## ELA MOTORS YUS KAR EKSTEDED WARENTI!

BILONG MEKANIKOL NA LEIBA

LUK LUK LONG WARENTI RIBON EMI I SIMBOL BILONG YU LONG MIPELA SAPOTIM.



**Ela Motors**  
OLGETA HAP!

EM5268

**Plis RIPOT**



**Kundiawa:** Distrik kot long Simbu i makim taim long wanpela man long stap insait long wanpela yia gut behavia bon bihain long em i traim long kisim sampela strongpela dring i go insait long provins.

Plis ripot i autim nem bilong dispela man olsem Willy Gumaygal bilong Simbu insait long Gembogleria wantaim 34 krismas. Plis ripot i tok dispela man i kamap long kot long sas bilong brukim lo na kisim 89 bia katon i go insait long provins. Ripot i go het long tok olsem dispela man i bin tokim kot olsem edministreta wantaim plis sief i bin givim tokorait long em long bringim bia we i kostim K3,000. Kot i tokim em olsem anininit long lika laisensing lo, nogat man i gat pawa long givim tokorait long kisim bia i kam insait long provins. Plis ripot i tok tu olsem dispela man i no nap long holim bia namel long taim em i stap long gut bihevia bon.

**Kokopo:** Plis i wok long go het wantaim wanpela wok painim aut bihain long wanpela liklik mangi i painim wanpela bodi insait long hap bus arere long rot. Plis ripot i tok plis i bilip olsem dispela man i dai i blong hailens. Plis i tok dispela liklik mangi i bin painim dispela bodi taim em i bin go aut long sutim pisin. Plis ripot i go het long tok olsem bodi bilong dispela man i stap stret long hap we wanpela fait i bin kirap long Sande. Dispela pait i bin kamap bihain long ragbi lig gren fainol bihain long Balanatanaman na Taranga.

**Goroka:** Plis long Goroka nau i putim was long ol man nogut husait i bin kilim wanpela PMV bos kru las wik. Plis ripot i tok ol man nogut i bin sutim dispela man Hagen long Okuk Haiwei. Ripot i go het long tok olsem ol polis i bin karim aut wanpela wok lukluk raun long daulo pas. Tasol ol i no bin painim sampela suspek yet. Ripot tok olsem ol plis i wok long wokim dispela ol wok lukluk raun long stapim trabel pait. Nau yet plis i wok long go hetim ol wok painim aut long dispela samting.

**GOROKA:** Sampela lain ibin go insait long wanpela supamakem long Goroka na stilim olgeta samting insait long em long las wiken. Nem bilong supamakem em long Namon Treding. Papa bilong stoa em i wanpela man Westen hailans. Trabel ya i kamap bihainim dai bilong wanpela lsten Hailans man long Goroka las wiken long han bilong sampela man nogut. Plis i ripotim olsem go insait long stoa na stilim ol samting i kamap bihainim dai bilong Westen hailans man. Ol lain i wokim trabel i ting ol lain long papa bilong supamakem ibin kilim dai hauslain bilong ol long Westen Hailans long Goroka. Plis i ripotim olsem stap long Goroka ino bin orait tumas bihain long dispela trabel, tasol ol lida i toktok wantaim na ol i singautim olgeta lain long go bek long wok.

# Ol meri les long Poker Masin long Madang

**ROBERT KAIA i raitim**

**PRESIDEN** bilong ol Madang Wimen in Bisnis, Misis Catherine Mal husat i makim maus bilong ol grup bilong ol meri long Madang i sapatim Gavana Peter Barter long stopim ol Poker Masin long go insait long provins.

Mista Barter nau yet i lusim dispela samting long ol pablik manmeri yet long mekim disisen bilong ol. Toktok long makim maus bilong ol meri,

Mal i tok olsem ol Poker Masi i no stret long dispela taun na provins na ol Poker Masin i noken go insait long provins.

"Poker Masin em ol bikpela samting bilong stilim mani na i no save givim bek wanpela gutpela samting long ol pipel tasol i save givim moa problem long ol femili," Mal i tok.

Em i tok moa olsem ol Poker Masin i wok long kirapim pilai laki na kamapim moa manmeri long go les na i

no helpim ol pipel long developim ol yet.

Em i tok olsem i gat planti hevi i stap em ol i mas stretim pastaim na i no gutpela long bringim moa hevi i kam insait long provins.


Mal i tok olsem ol narapela invesen i ken kam insait long provins we ol ruel populesen i ken kisim benefit tasol ol dispela masin i gen go long ol provins husat i laikim.

Long sapatim singaut bilong namba tu komisina

bilong Madang Interim Komisin Misis Cathay Moeder husat i no laikim Poker Masin i go insait long provins.

"Poker Masin i ken kamapim planti hevi long ol femeli na mipela i no laikim ol dispela kain samting long provins," Misis Moeder i tok.

Tasol bai i gat wanpela pablik tingting bilong ol manmeri em ol bai kisim long bihain taim long ol dispela samting.



• Dispela pisin antap long het bilong man Lufa long lsten Hailans em ol i save kolim 'owl' long Tok Inglis. Long Tok Pisin, mipela save kolim 'kokomo' Kokomo pisin i sindaun na slip antap long het bilong man Lufa ya, na raun long Goroka taun. Ol foto: Sape Metta.

## Nominesen bilong Kandrian-Gloucester op pinis

OL pipela bilong Kandrian-Gloucester insait long West Nu Briten bai i gat wanpela nupela memba insait long Nesanel Palimen long stat bilong mun Dismemba 1995.

Ilektrol Komisina bilong Papua Niugini Reuben T. Kaiulo i tokaut long dispela bihainim wanpela oda i kam long Gavana General Sir Wiwa Korowi.

Mista Kaiulo i makim Sam Esakia, wanpela sinai opisa bilong Dipatmen bilong Wes Nu Briten olsem Ritening Opisa long was long dispela Bai-Ileksen.

Ol Nominesen bilong dispela bai-ileksen bai op long 4 klok apinun long asdei na bai ron i go inap long 12 klok apinun long mun Novemba.

Vot bai stat long Sarere 25 long mun Novemba na bai pinis long Sarere Disemba 2 na bihain long dispela bai ol i stat kauntim.

Kaiulo i mekim bikpela singaut tru i go long ol pipel bilong Kandrian-Gloucester long stap wantaim bel isi long taim bilong vot.

## Evara singaut long pinisim Laurabada

NAMBA TU oposisen lida na memba bilong Kikori Roy Evara i mekim strongpela singaut tru i go long Minsta bilong Trensport Peter Yama long pinisim laisens bilong Laurabada Siping long wok long ol bris bilong Galp.

Mista Evara i mekim dispela singaut bihain planti komplek i kamap long ol pipel bilong ilektret bilong em long dispela kampani i no bihain stret lo bilong karim ol pasindia long ol eria bilong Galp i kam long Mosbi. Kampani ya i nogat pasindia laisens.

Ol pipel long ilektret bilong Mista Evara long hap bilong lhu i komplek olsem ol kago bot bilong Laurabada i wok long karim pasindia long lhu i go long Mosbi na i nogat stretpela pasindia laisens taim ol i wok long karim ol kago i go kam.

Wanpela kain samting olsem i bin kamap long Septemba 13 bilong dispela yia taim wanpela kago sip Moale Chief i go sua long ihu na karim moa long 200 pasindia i kam long Mosbi. Olgeta pasindai antap long dispela bot i bin baim K40. Na ol manmeri long ples i bilip olsem dispela mani i go insait long poket bilong kepten bilong sip wantaim ol kru.

Ol lain long ples ya i tok olsem ol pasindia ya em sip i lusim ol long Porebada ples arere long Mosbi na ol i kisim PMV i go olgeta na go long sip long rausim kago bilong ol long neks dei long Mosbi bris.

Mista Evara i mekim bikpela singaut nau long trenpot minista long rausim laisens bilong Laurabada Siping kampani.

## Miting singaut long stretim Okuk Haiwe

WANPELA kombain miting bilong ol Siamba bilong Komes long Goroka i bin kamap long Trinde long toktok long ol bagarap i wok long kamap long Okuk Haiwe.

Ol masuman bilong Semba bilong Komes na Industri long Lae, Goroka, Kainantu na Hagen na wanpela mausman bilong Semba bilong Mains na Petroliem i bung long dispela miting.

Wanpela mausman bilong dispela grup i tok olsem i gat bikpela seksen bilong Haiwe em long lsten Hailens na Simbu i bagarap nogut tru na ol i mas stretim. Na antap moa long dispela em hevi bilong lo na oda em long sait bilong ol stil man i save stilim ol samting.

Na sapos nogat wanpela samting i kamap long dispela hevi, rot ya bai

go bagarap olgeta long dispela wet sisen em bai kam klostu nau. Dispela bai i gat bikpela hevi tru long ol pipel bilong hailens na tu ol bisnis antap long hap.

Semba ya i makim inap olsem K10 milien olgeta i mas stap long stretim dispela rot. Na antap moa long dispela, gavman i mas putim hap mani long stretim dispela rot. Mani ya i mas stap long olgeta yia em ol i ken kisim na stretim dispela rot.

Semba ya i mekim bikpela singaut tru i go long Gavman long mekim samting hariap long stretim dispela hevi bilong ol liklik bisnis na bikpela bisnis insait long hailens.

Sapos nogat wanpela samting i kamap, i luk olsem planti moa wok bai bagarap.

# WANTOK

All departments. Phone: 325 2500 - Fax: 325 2579  
P.O. Box 1982, Boroko, NCD, Papua New Guinea

Published Weekly, Thursday, for

**Word Publishing Company Pty. Ltd.**

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

General Manager and Company Secretary: Ian Fry.

Group Editor in Chief: Anna Solomon.

Editor of Wantok: Leo Waiwa

Advertising Manager: James DeLisle

Advertising Deadlines

Display bookings and Camera ready copy: Tuesday mid-day

Classified advertising: Wednesday 2pm.

Regional Office:

Suite Haus Tisa, Second Street Lae, P.O. Box 1726, Lae, Morobe Province. Phone/Fax 42 0618.

Phone: 42 1562

Regional Manager: Alphonse Pu.

Papers distributed by air throughout PNG.

Available by airmail subscription within Papua New Guinea and overseas.

Australia & New Zealand Representatives:

Tonkin Media Pty Ltd, P.O. Box 101, Avoca Beach NSW, 2251 Australia.

Sydney, James Tokin, (043) 851746. Melbourne, Glen Smith, (03) 8072311.

Word Publishing Co. Pty Ltd is owned by the four major churches of Papua New Guinea: Catholic 55%, Lutheran 25%, Anglican 10% and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms of acceptance are available at the office of Word Publishing Company Pty. Ltd. and are set out in full on the reverse side of its official Display Advertising Booking Form.

# 9-pela vokesinel senta long hailans pas pinis

I gat ripot nau olsem 9-pela vokesinel senta long tripela hailans provins bai pas i go inap dispela krismas. Bikos nesanel gavman i no givim yet skul subsidi mani long ol.

Dispela ripot i kam long Rijonal Vokesinel inspekta bilong Westen Hailans, Sauten Hailans na E nga provins, Martin Bai. Em i mekim dispela ripot o toktok bihain long lukluk traun bilong em i go long ol vokesinel senta i stap aninit long inspeksen ilektoret bilong em.

Dispela tripela hailans provins i gat 18 vokesinel senta o skul

## MICHAEL MONDA i raitim

olgeta. Long dispela namba, 9-pela bai pas. Na narapela tasol bai op i go inap krismas, na i nogat plen yet bilong wanem samting bai kamap long ol long neks yet.

Long ol dispela senta em bai pas, Sauten Hailans i gat 4-pela, we wanpela bai pas olgeta. Na tripela tasol bai ron isi isi i go inap krismas.

Long Westen Hailans, tripela senta bai pas. Na narapela tripela bai op i go inap krismas.

Long Enga provins, 5-pela vokesinel senta olgeta bai pas. Na tripela tasol bai op i go na bungim krismas.

Nau yet edukesen bod long dispela tripela provins i yesa pinis long pasim ol dispela senta. Bikos ol senta yet i nogat mani long skulim ol studen i go inap pinis bilong dispela 1995 skul yia.

Long dispela lukluk raun, Mista bai i tokim ol studen long senta olsem trening ol i kisim em i bikipela samting. Bikos ol i kisim save long helpim 9l long bihain taim ol i go bek long ples.

# Praim minista tok 8-pela nupela tokorait wantaim ol ovasis kantri bai helpim PNG

## ELIZABETH LENY i raitim

PRAIM Minista na Minista bilong Foren Afes na Tred, Sir Julius Chan i tokaut long Palamen asde, Trinde Oktoba 11 olsem PNG nau i stap insait long 8-pela nupela agrimen o tokorait.

Sir Julius Chan i tokaut tu olsem PNG i stap insait tu long wanpela tokorait wantaim Solomon Ailan. Dispela em long gutpela wok bung long kirapim gutpela sistem bilong gavman.

Ol narapela kontrak i lukluk long:

- ea sevis agrimen wantaim Tailan, Vanuatu na Masal Ailan;
- wanpela fisaris agrimen wantaim Maikronesia;

- wanpela teknikal koperesen agrimen wantaim Kuk Ailan;

- wanpela konvensen bilong stapim prodak-sen na developmen bilong ol posin nogut; na

- konvensen bilong kontrolim na menesim ol rabis nogut i kamap long faktori insait long Saut Pasifik rigon.

Sir Julius i tok dispela ol kontrak i bilong gutpela bilong Papua Niugini. Na bai gat plan-ti gutpela samting i kamap bihainim dispela ol tokorait.

Em i go het long tok olsem dispela ol tokorait bai kamapim planti gutpela samting long helpim Papua Niugini.

Sir Julius i go het long tok tu olsem dispela ol

tokorait bai kirapim gutpela wok bung wantaim narapela ol kantri. Na strongim gutpela wok bung wantaim long sait bilong lkonomik na tred. Em i go het long tok tu olsem dispela konvensen bilong globol kemikol weapon bai helpim long kamapim gutpela woi environmen. Na dispela bai helpim olgeta kantri.

Wankain tasol em i tok dispela Rijonal Waigani Semina em i wanpela bikipela na gutpela samting bilong lukautim environmen na helt bilong ol pipel bilong Saut Pasifik kantri.

Ol memba bilong Palamen i vot long dispela ol tokorait, na givim tokorait bilong ol asde.

## 1995 Morobe Agrikalsa so pulim moa pipel



• Bikman ya i sindaun malolo wantaim kundu bilong em, bihain long em i mekimsave long samsam. Lukim moa poto bilong so long pes 12. Foto: Alphonse Pu.

## CHRIS KUNUBI i raitim

1995 MOROBE Agrikalsa so i bin kamap gut tru long Fraide Oktoba 6 na pinis long Sande Oktoba 8.

Olsem ol opisal i bin gat bilip long en, planti tausen pipel i go long lukim ol kainkain samting long so long tripela de olgeta. Planti pipel i kam tu long ol ausait provins olsem Madang, Kainantu, Kundiawa, Hagen na Mosbi long lukim dispela so.

Gavana Jenerel Sir Wiwa Korowi i go pas long opim dispela so long Sarere Oktoba 7. Dispela em long wanpela Gad ov Hona mas em ol soldia bilong

Igam Bareks long Lae i putim kamap.

Ol samting we i holimpasim ai bilong ol manmeri long so em ol paiawoks long Sarere na Sande. Ol samting long so we i pulim planti manmeri long lukim tu em ol man i kalap long parasut long balus na go daun kamap long so graun, ol kauboi i soim stail bilong ron antap long hos na kau, Sainis dregon pilai.


Musik na nois bilong ol pawa o laip ben i pulim planti yangpela manmeri na pikinini. Wanpela pawa ben ol i kolim Wali Hits bilong Amela long madang provins i kamautim olgeta top singsing bilong ol, we i kukim nau Papua Niugini musik bisnis.

Ol singsing bilong Wali Hits i kukim stret lewa bilong planti manmeri. Mekim na neks de ol i kam bung gen long lukim Wali Hits tasol.

Nogat bikipela trabel i bin kamap long dispela tripela de so. I gat ripot tasol bilong ol stil manki stilim mani o samting long poket bilong ol manmeri long so graun. Tasol ol sekyuriti na plisman husat i putim was long so graun i mekim gutpela wok stret.

Ol ma Long sait bilong singsing tumbuna, grup husat i mekim paia na ol manmeri i amamas long lukim em Kiwai danis bilong Westen provins.

## DR. WONG'S MARASIN SOP



### Sop bilong rausim

- Kaskas
  - Jems
  - Skabis skin soa
  - Skin soa
- Yusim olgeta de

## Askim stoa klostu long yu

Distributed by

**C B Chee**

Lae: 42 1333 Hagen: 52 1579

For Wholesale savings

**TR**  
**TOO**

TORO WOK OLSEM HAUS-BOI LONG HAUS BILONG WANPELA MASTA...

LONG MONING EM KISIM SARIP (GRASS-NAIP) NA GO KATIM GRAS ARERE LONG HAUS BILONG MASTA NA KLINIM PLES I GO APINUN...

UMF! MASTA TONTEN MAS GIVIM MI PE-RAHS LONG MI KATIM GRAS!

EM SINDAUN MALOLO I STAP NA MASTA IKAM KAMAP...

AFTANUN TORO!...UMN' YU KAT GRAS GUD TRU!

YEA, MASTA TONTEN... MI SINDAUN NA MALOLO NAU!

ORAIT... TAIM-AP NAU... INAP YU KISIM DISPELA GRIN-SNEK AND WOTA-RIM FLAUA

NALI MASTA I TOKIM TORO LONG PUTIM WARA LONG OL PLAU...

GRIN SNEK? WE?!

EM I TING TORO INO SAVE LONG TOK INLIS...

TASOL BOI-ROSS I KIRAP NA TOK-INLIS LONG EM NA MASTA I LONGLONG OLGETA...

NO! NO! MASTA! WI DON KOL DIS GRIN-SNEK.. WI KOL IT RABA-HOS!

SANAVABIS!! THAT OLD GOAT KNOWS HOW TO SPEAK INGLISH HE'S BEEN FOOLIN' ME!!

HE'S FIRED!

WESPA 3 AM

# WANTOK

NIUSPEPA BILONG OL PAPUA NIUGINI STRET

## Stori bilong Kumul semim PNG

DISPELA wik em bikpela toktok i kamap long tripela Papua Niugini Kumul pilaia (i gat nem) i mekim sampela paul pasin wantaim ol meri long Inglen. Planti ragbi lig sapota na ol arapela pipel i harim dispela stori na i no amamas tru.

Ol i tok dispela kain ripot long hap i bagarapim tru nem bilong kantri. Maski ol ripot i no tru olsem Kumul tim menesmen i tokaut. Tasol bikpela samting em ripot i bagarapim pinis PNG na Kumul tim.

Ripot i kam long Inglen i soim tu olsem dispela samting i kamap sampela de bipo long namba wan gemegensim Tonga. Na i soim olsem em i tru tupela meri i go wantaim tripela pilaia ya. Orait askim i stap nau olsem disiplin i stap we nau?

Kain samting i kamap bihain long gem em i narapela stori, tasol bipo long gem em i no gutpela tru.

Ating bikpela asua i mas go long ol bikman o opisal husat i lukautim tim. Bikos kain pasin i ken kamap long ol yangpela man husat i no go lukim laipstail long kain develop hap olsem Inglen. Ating asua mas go long tim menesmen. Na i no long ol pilaia.

Tasol bikpela samting em mipela mas save em plis long hap i painimaut na i nogat as long en. Olsem na mipela mas putim han wantaim na sapatim tim long winim tu Nu Silan Kiwis na go long namba wan fainal. Bikos Kumul i dro 28-28 wantaim Tonga, husat i lus pinis long Kiwis.

# Nupela kakao kampani salim sea nau

WANPELA nupela kakao kampani long Bogenvil i wok long salim sea i go long ol man na bisnisman husat i gat laik long baim ol sea. Ol i kolim dispela kampani long Bogenvil Produsas na Ekspot Pty Ltd (BPE). Ol pipel bilong Buka, not is na not wes Bogenvil na Telei i papa long dispela kampani.

Tupela wik i go pinis, kampani ya i baim namba wan raun long ol bek kakao. Em i

baim 700 bek kakao olgeta long ol growa long bikples Bogenvil.

Weahaus bilong putim ol kakao i stap long Kokopau, klostu long Buka pasij.

Prais bilong wan wan sea em K1. Mak long minimum sea we ol i salim i go long ol wan wan man inap long wan tausen sea (1,000). Na tu tausen (2,000) long ol bisnis lain.


Michael Popsan em i siaman long ol bot bilong ol dairekta long kampani. BPE i askim ol liklik bisnis man long Bogenvil bilong sapatim na kamap sea holda bilong ol.

Nupela kampani bai i resis wantaim tupela arapela kampani long baim kakao long Bogenvil. Tupela em long Agmack na Italec. Tupela kampani bilong baim kakao i save beis long Rabaul, Is Nu Briten provins.

Long wankain taim tu olpela edministreta bilong Not Solomons Sam Tulo i kisim wok olsem siaman bilong kakao indastri bot.

Mista Tulo i bin holim wok olsem top man long Bogenvilstat yet long 1991 inap long mun Epril long dispela yia taim Theodore Miriung i tekova long em olsem primia bilong Bogenvil.

## Lotu wok kamap strong long Bogenvil



• Pasto Jones Jama long lephan wantaim Paskal Pohau long raithan. Pasto James i bin kamap long Buka long mun Ogas, 1995. Na ronim tupela wik krused long Hoko Hol long Hagogohe COC eria. Moa long 2,000 pipel i bin kamap long harim toktok bilong Pasta Jones, husat i autim gutnius olsem Jisas em i rot bilong kamapim gutpela sindaun long BOgenvil ailan.

## Kos bilong kamapim gut sindaun go het long Buka

Bikos long hevi wantaim trenspot i go long bikples Bogenvil, Brata Howley wantaim ol lain bilong em long Faundesen bilong Lo, Oda na Jastis i go hetim ol kos long Buka inap long sindaun long saut Bogenvil i kamap gut gen.

Dispela em ol kos bilong stretim na kliam tingting bilong ol man na ol i ken kisim ol lidasip wok insait long komyuniti bilong helpim ol pipel bilong ol long daunim ol kain hevi insait long wan wan famili, ol yet, namel long ol pren, wantok na komyuniti.

Bipo long ol trabel long hap bilong saut Bogenvil i kirap gen las mun, ol kos trena long Buka ibin statim kos long Nagovis eria long namba wan taim. Anastasia Lyons i bin go pas long dispela grup tasol taim ol trabel long eria we ibin gat sutaut ol raskel lain bilong ol BRA i statim i kamap, grup ya i lusim dispela hap na go bek long Buka, wetim sindaun long hap igo gutpela gen.

Long dispela yia long Bogenvil, FLOJ i karimaut pinis ol kos long Arawa, Buin, Nagovis, Totokina na Nissan. Ken Igan i bin ranim tupela Komyuniti Plening kos long Lontis, Buka Ailan. Ol pipel i laikim tru kos na em bai i go bek gen long sampela taim bihain long karimaut moa long dispela kain kos. Bruder Pat i tok olsem ol arapela samting, sampela pipel i komplem long ol CR kos.

Wanpela em i sut long ol meri. Bikos kos ya i skruim save long planti samting, sampela lain i tromoi komplem long ol meri long wanem nau ol iken sanap strong na toktok long ol yet taim ol arapela man i tok samting egensim ol. Na tu nau ol meri i sanap strong na pait strong egensim domestik vaiolens. Dispela em taim ol man bilong ol i paitim ol. Maski long ol komplem, ol pipel i gat strongpela laik long go hetim ol kos na olsem kos i go het, Bruder Pat i tok.

Narapela wanwok bilo long Buka ng Bruder pat em Wendy Clancy bai i karimaut kaunseling trenning kos. Bruder pat i tok ol gat hevi wantaim mani long ranim ol kos, tasol wantaim liklik helpim ol i kisim long CRA, Ausaid, GTZ na ol arapela helpim lain, ol i go hetim ol progrem bilong ol we nau i go het long ol arapela hap bilong kantri olsem Aroma kos insait long Sentrel provins, Wafi, Bomana kalabus long Mosbi, Bitapaka long Is Nu Briten na klostu ol bai statim ol progrem long thu distrik bilong Galp provins.

# WANTOK

NIUSPEPA BILONG OL PAPUA NIUGINI STRET

P.O. Box 1982 BOROKO  
telepon Namba: 25 2500  
Feks Namba: 25 2579

**PE BILONG  
WANPELA YIA  
52 NIUSPEPA**

PLES	AIR
Mosbi	K30.00
Arapela PNG eria	K60.00
Australia na NuSilan	K92.00
Esia pasifik na Japan	K123.00
Amerika na Yurop	K180.00



## Komiti kamap long bungim tingting bilong pipel

OL fomim pinis wanpela komiti long bungim tingting bilong ol bikman husat i go pas long wok bilong bringim bek gutpela sindaun long Bogenvil.

Ol i kolim dispela komiti long Join Operesen na Laisen Komiti. Not Solomons provinsal edministretiv seketeri George Lessi i go pas long em.

Ol arapela komiti memba em long Provinsal plis komanda Joel Kean, wanpela bikman i makim plis mobai skwat long Bogenvil, Bbs bilong ol difens long Bogenvil na asisten seketeri bilong infomesen divisen, Jan Tenevi.

Wok bilong dispela komiti i bilong bringim wantaim ol bikman long ol difren grup bilong diskasim ol wok go het long ol pis

efots. Komiti bai i bungim wantaim olgeta tingting na wok long ol wan wan grup 0.bilong skelim na glasim sapos dispela ol samting i helpim long wok bilong kamapim pis o nogat. Dispela em ol samting we i kamap long olgeta distrik insait long Bogenvil.

Long wan wan taim long potnait wik, komiti bai i save bung. Ol bin holim namba wan bung bilong ol long Buka las Mandé.

BTG i setimap dispela komiti bikos em i lukim olsem ino gutpela long wan wan grup husat i wok long traime stretim ol hevi long Bogenvil long wok ol yet.

Tasol i moabeta long ol i wok wantaim na bungim ol tingting na aidia na long dispela rot ol hatwok bilong ol i ken karim kaikai.

# Bogenvil primia no laikim pasin bilong poinim finga

BOGENVIL Primia Theodore Miriung i laikim gutpela wokbung i stap namel long ol grup husat i laikim gutpela sindaun i kamap bek long Bogenvil.

Na i no long wanpela i poinim finga i go long arapela long ol asua na bagarap long taim ol wok i no go gut.

Mista Miriung i mekim dispela toktok bihainim PNG Difens fos komanda, Brigadia Jenerel Tony Huai husat i laikim primia na BTG long mekim ol toktok bilong ol pis plen i karim kaikai na noken toktok nating tasol wantaim nogat wok kamap tru tru.

Em i mekim dispela toktok bihain long dai bilong wanpela PNGDF soldia na wanpela resisten paita i kisim bikpela bagarap long Buin las wik. Dispela em bihain long

wanpela sutaut ibin kamap namel long ol soldia na ol BRA memba long Buin yet. Tupela BRA i bin dai long dispela sutaut na Paul Bobby husat i komanda bilong ol Buin BRA i bin kisim bagarap na em bin kisim marasin long Buin helt senta.

Inap long dispela asua las wik, Bobby i bin go pas long ol Buin BRA long helpim ol soldia, ol siefs na komyuniti long ol wok bilong kamapim bek gutpela sindaun long Buin distrik.

Tasol dispela asua i kamap bihain long Bobby wantaim sampela poro i dring hombru (strongpela dring ol i wokim long ples) long Moma na sampela ami lain i go na sutaut i kamap.

Bihainim dispela, ol trabel long Buin Hai skul, stilim tupela tuwei redio na ka bilong Monoitu helt

## VERONICA HATUTASI i raitim

senta long Siwai na dai bilong wanpela soldia i kamap long las wik.

Orait, Brigadia Huai ibin singautim Mista Miriung na BTG long soim trupela lidasip na lidim ol pipel long rot bilong painim gutpela sindaun long Bogenvil.

Em bin singaut tu long BRA mausman long Honiara, Martin Miriori long kontrolim ol strongpela BRA long Bogenvil husat i go het long pait bilong ol long ailan i bruk lusim PNG. Long dispel pait planti manmeri na ol pikinini i wok long dai. Brigadia Huai i singautim tu Mista Miriori long go bek long Bogenvil na toktok long ol lain

bilong em long stapim ol hevi na bagarap we ol i wok long kamapim long ol pipel long ples na long ol arapela samting tu.

Em bin tok long lukluk bilong em bihain long ol trabel we i kamap long olgeta hap bilong ailan, Miriori na ol BRA/BIG lida inogat kontrol long ol lain bilong ol.

Em bin askim tu Mista Miriung long toktok wantaim ol kaunsil bilong siefs na ol pipel long ples long traim pinisim ol dispela trabel we i kamapim dai na sindaun nogut long ol pipel bilong provins.

Long bekim, Mista Miriung i tok stat long taim BTG i kirapim wok long dispela yia, em i traim bes long stretim ol hevi na kamapim pis long ailan. "Tru rot long painim gutpela sindaun bai ino karim kaikai kwiktai olsem yumi i

laikim, yumi olgeta i gat wok long mekim long kamapim gutpela sindaun bek long Bogenvil," Mista Miriung i tok.

Em i tok pait wantaim gan ino inap pinisim ol hevi long ailan, tasol bai i mekim ol hevi i go moa yet. Hevi wantaim mani em i narapela samting we Mista Miriung i tok i slekim o ino hariapim ol wok long kamapim gutpela sindaun long ailan.

Em i tok BTG i no kisim yet ol mani we nesanel gavman i bin promisim long rilisim i go long ol stat yet long las mun. Na em ino amamas long dispela samting.

Em i laikim BTG, ol sekyuriti fos, gavman, ol sief na komyuniti long Bogenvil long wok bung wantaim long kamapim gutpela sindaun i go bek long Bogenvil.



Em meri o samting, man em kukim stret 1995 Goroka So long independens wiken ya. Olsem na kameraman i kisim poto bilong em. Em wanpela yanpela kum katim meri stret husat i bin resis long Mis Goroka Taitel. Foto: Sape Metta.

## Sekan long bel, na i no long maus tasol -Wakon

OL plisman long Westen Hailans i laikim ol lain wanpisin bilong Minj mas sekan long bel na i no long maus tasol.

Dispela strongpela toktok i kam long Provinsal Plis Komanda, John Wakon, husat bai stap namel long ol lain birua, em ol bai brukim suga na mekim wanbel pasin nau long Minj distrik.

Ol lain birua husat bai sekan em ol Kamblika na Komunka wantaim ol lain Tuimekup, Golekup, Kopanka na Tangilka.

Mista Wakon i tok bihain long dispela sekan ol lida man mas givim strongpela toktok long ol yangpela man long stap isi and mekim gutpela wok long ples. Em tok ol pipel mas kirapim laip gen long ples we pait i bagarapim.

Em i tok sapos ol lida man i slek, kain hevi bai i stap yet. Mista Wakon i laikim ol manmeri i mas kirapim wok bisnis na lus tingting olgeta long mekim pasin birua. Em i tok pait i no save givim wanpela gutpela samting na em laikim bel kros long displea hap mas pinis na pinis olgeta.

Wanpela lida man long Minj, Philip Kaman, husat i bin go pas long bungim ol birua lain ya tu i tok, pait mas pinis na gut-

## PETER MAIME i raitim

pela developmen mas kamap long ples. Em i tok laip bilong ol man i bikpela samting na pasin bilong respekt mas stap long ol komuniti na hauslain. Em tok i no gat as long kilim ol man olsem pik dok.

Pait wantaim dispela lain em klostu long 20 yia. Klostu olsem 100 man i dai pinis long ol strongpela gan olsem M16, AR15; kompas gan na ol sot gan ol man i save wokim long han.

Sampela bilong ol man laip bilong ol i lus i no dai long ples pait, em ol birua i kilim ol nating long ol haiwe rot na ples bilong narapela lain. Kain pasin bilong kilim man nating i pretim wokabaut bilong planti manmeri.

Ol gavman sevis olsem skul, plis stesin, haus sik i go long paia na ol rot bilong kar, bus i karamapim pinis. Plenti ol mangi i no go long skul na i save bihainim ol bikpela bilong ol long go pait tasol. Ol manmeri tu i no gat naispela haus long slip na ol gaden long kisim kaikai. Pis na gut oda komiti wantaim wok bung bilong ol sios i luksave long dispela hevi na i laik stretim sindaun bilong ol dispela lain.

## Sista Salome tok ol meri mas stap aninit long ol man

PLANTI meri grup bilong olgeta Baptis sios insait long Lae siti i bin holim wanpela bung bilong ol long kalvari baptis sios. Kibung i pinis long Sarere Septemba 30, 1995.

Nem bilong dispela bung em "Miting bilong ol Meri". Na i i pulim moa long 100 meri olgeta.

Dispela em i wanpela spesel kibung we i save kamap tupela taim long wanpela yia.

Ol meri i makim ol Baptis sios long Libeti, Victori, Ten Siti, Makam Veli na Bethel long kibung ya, wantaim ol meri bilong mama sios yet em long Kalvari.

Sista Barbara Owens bilong Yunaited Stet ov Amerika (USA) i bin go pas long ogenaisim dispela bung. Sista Owens wantaim man bilong em, Reveren John Owens em tupela lapun bilong Baptis sios insait long

## TONY LUKE i raitim

Papua Niugini. Ges spika long bung bilong ol meri em Sista Salome Lahari bilong Makam Veli Baptis sios.

Planti toktok insait long bung i sut stret kain pasin ol meri save mekim long helpim o bagarapim man bilong ol. Dispela em long pasin bilong daunim yu yet, gutpela na klinpela toktok mas kam aut long maus, na narapela em pasin bilong laikim man bilong yu taim em mekim nogut long yu. Sista Salome i bin yusim planti lain long Baibel long sapatim ol toktok bilong en.

Ol Baibel lain i ves Sista Salome i yusim i kam long buk bilong Korin, James, Pita na Matyu. Bihainim buk bilong Korin, Sista Salon i tok strong long ol meri i mas daunim ol yet na stap aninit long man bilong

ol. Bikos em i tok God i wokim ol man long kamap het bilong famili, na bilong bosim ol.

Long buk bilong James, Sista i bin yusim long tokim ol meri long bihainim ol toktok bilong God, we ol save harim long noken sindaun nating. Na tu em i tokim ol meri long was gut long tang bilong ol, we i ken bagarapim man sapos ol i no tingting gut na tromoi rabis toktok i go long ol.

Em i tok pasin bilong wanbel na stap gut wantaim man em i naispela samting. Em i tok buk bilong Pita na Matyu i sut long dispela kain pasin.

Bihain long ol toktok bilong Sista Salome, planti meri i tingim rong o asua bilong ol na autim long ol arapela meri. Bihain olgeta i pre wantaim na askim God Papa long strongim bilip bilong ol.

## Ahi Komyuniti gavman sapatim Balob pri skul

BALOB pri skul ausait long Lae siti bai kamapim gut o progrem bilong em long disela yia. Bikos gutpela helpim i kam long Ahi Komyuniti gavman wantaim K1,000.

Skul bai yusim dispela mani long baim ol buk, pensil na ol arapela samting bilong ol pikinini long yusim long skul.

Pri skul i kisim dispela mani bihainim lukluk raun bilong tupela bikman meri insait long Ahi Komyuniti gavman. Nem bilong dispela tupela bikman meri em Mista Mung Galang na Misis Stafford, husat i mekim ol meri long komyuniti gavman.

Tupela bin raun i go long skul long llukim wanem kain helpim komyuniti gavman i ken givim. Balon pri skul em i wanpela long ol demonstresen skul we i kam aninit long Balob Demonstresen Komyuniti skul. Dispela kain skul i bilong helpim ol tisa trening

## ALPHONSE PU i raitim

bilong ol nupela tisa long Balob Tisa Koles.

Ol studen tisa i save lainim long wok tisa long komyuniti skul wantaim dispela pri skul. Dispela em long kamapim gut save bilong ol long wok tisa, bipo ol i go ausait long tis long ol komyuniti skul insait long Papua Niugini.

Long dispela liklik bung we sek mani ol i givim, Prinsipel bilong Balob Tisa Koles, Mista Kiane Towandong i mekim bikpela tok amamas long luksave bilong Ahi Komyuniti gavman long ol wok bilong pri skul. Dispela em long taim we nesanel gavman i sot long mani. Na planti wok bilong skul i no kamap gut. Olsem na kain helpim i ken mekim kamap bikpela na gutpela wok insait long skul.

Wanpela ripot long literesi progrem long wok bilong ol skul

pikinini i soim olsem bipo long ol pikinini i go long komyuniti skul, ol i mas kisim gut save long pasin bilong rot na rait taim ol i liklik yet.

Dispela kain pasin i save kamap long pri skul, we ol tisa i save lainim ol pikinini long gutpela we bilong rit na rait. Sampela taim ol i rit na rait long Tok Ples. Sampela taim ol i rit na rait long Tok Pisin. Ripot i tok tu olsem ol pikinini husat i pinisim pri skul i gat gutpela save. Na i save winim ol arapela pikinini husat i no bin go long pri skul.

"Ol pikinini husat i save pinisim pri skul i save mekim wok bilong mipela ol tisa i isi. Bikos ol i save painim isi long lainim samting," wanpela tisa i tok.

Siaman bilong Bod ov Menesmen long Balob pri skul, Mista Anson Domi i tok amamas long dispela kain helpim i kam long Ahi Komyuniti gavman, we dispela pri skul i stap long en.

**YUMI** wan wan long kalsa bilong yumi i save bilip olsem i gat kain kain spirit olsem masalai na tabaran na sanguma. Na ol dispela spirit i save stap nabaut long yumi long bus na ples na gaden.

Yumi save bilip tu long yumi gat wanpela sol o tewel; na bihain yumi dai, bai dispela tewel bilong yumi i go stap yet long wanpela hap. Yumi save bilip long tewel bilong ol tumbuna i dai pinis na i save mekim gut long yumi. Dispela em i as bilip bilong kago kal.

Yumi save bilip tu long sampela spirit o tewel i save sambai long yumi na helpim na stiam yumi. Bilong dispela na ol bubu mama i save beten long spirit bilong ol tumbuna i dai pinis, bai ol i mekim gro gut ol rop kaukau ol i planim long gaden. Ol dispela aida na bilip i pas gut wantaim ol Kristen aida bilong ol ensel long Olpela na Nupela Testamen.

Ensel em i wanpela spirit; em i gat tingting, tasol em i no gat bodi. Tasol em inap hait insait long wanpela bodi sapos em i nidim bodi

**TU MINT TINGTING**


long mekim wok bilong em. Ensel em i wokboi bilong God.

Long Baibel yumi lukim planti stori bilong kain kain ensel. Wanpela ensel i rausim Adam na Iv long gaden paradais bihain ol i brukim lo bilong God pinis. (Jen 3:24) Wanpela ensel i pait wantaim Jakob na i lusim skru bilong lek bilong em. (Jen 32:24-30)

Nupela Testamen i bigin wantaim ensel Gabriel i kamap long Zekaraia na Maria. (Luk 1:1-38) Long krismas nait ol ensel i pulap long skai. (Luk 2:8-15) Wanpela ensel i strongim Jisas long gaden bilong ol oliv. (Luk 22:43) Wanpela ensel i namba wan long lukim Jisas i kirap bek long matmat. (Matyu 28:1-7) Na long las de ol ensel bai bungim yumi long sanap long kot bilong God. (Mat 25:31)

Jisas i bin tok moa long ol ensel. Em i gat tok long Matyu 18:10 long ol wan wan pikinini i gat ensel bilong lukautim em. Na Seten yet i bin tok long yumi wan wan i gat dispela kain ensel lukaut. Long

**OL ENSEL**



**FRANK MIHALIC** i raitim

taim Seten i traim Jisas, em i grisim em long kalap i go daun long ruf bilong haus lotu na Seten yet i autim dispela hap tok bilong Eksodas 23:20 - "Bai mi salim ensel bilong mi i go pas long yu na

lukautim yu gut na poromanim yu bai yu inap kamap gut long ples mi bin redim long yu."

Ol i gat kain kain stori long ol ensel i helpim ol man na meri. Bon Bosko, em papa bilong ol Salesian bilong PNG, em i gat planti birua, long wanem, em i wok long helpim ol yangpela boi. Planti taim sampela man i laik kilim em i dai. Tasol olgeta taim ol i kamap long em, wantu wanpela bikpela braunpela dok i kamap na i poromanim Don Bosco. Nau i no gat man inap kamap klostu. Ol i pilim olsem dispela dok em i wanpela ensel lukaut bilong Don Bosko. Don Bosko i save pinis.

Narapela stori i go olsem: Long biknait tru wanpela dokta i harim wanpela man i paitim strong dua bilong haus bilong em. Em i kirap na i go long dua na i painim wanpela liklik meri i stap.

Mama bilong em i wok long dai long bikpele sik, na em i laikim dokta i mas kam lukim em. Maski ren i pundaun, dokta i bihainim lik-

lik meri i go long haus bilong em. Kamap pinis, dokta i glasim mama na i givim marasin long em.

Bihain em i tokim meri olsem, "Yu laki tru. Yu gat wanpela gutpela pikinini tru. Em i bin sevim laip bilong yu."

Mama ya i kalap nogut na i lukim dokta na i tok, "Tasol pikinini bilong mi i bin dai pinis tupela mun bipo. Ol su na klos bilong em i hangamap yet long liklik rum long hap."

Dokta i no klia long dispela tok, na em i go opim dua bilong liklik rum. Na tru tumas, em i lukim ol klos dispela liklik meri i bin werim long dispela nait yet. Tasol ren i no bin wasin ol; ol i drai olgeta. Nau dokta i longlong olgeta. Em i no save husat i bin mekim ol dispela wok . . . ating ensel lukaut bilong mama.

Harim! Sapos yu no bilip i gat ensel lukaut i save poromanim yu, orait, neks taim yu nidim wanpela helpim, yu askim ensel lukaut bilong yu tasol - na bai yu lukim wanem samting i kamap.

**Ol meri Madang** kisim tok tenkyu long lukautim bung

**ROBERT KAIA** i raitim

**BIKPELA** tok amamas i go long ol meri Madang long bung wantaim na lukautim bikpela kibung bilong ol meri long wol, em i bin kamap logn sampela wik i go pinis. Maski grup bilong ol meri i go pas long oge-naisim kibung i kam long kankain sios.

Dispela tok amamas i kam long presiden bilong Madang Sios Wimens Kaunsil, Cathy Moeder. Misis Moeder i tok dispela wok bung i kamap klia na soim olsem ol meri grup bilong kankain sios insait long provins i bin wok bung wantaim long 7-pela yia nau. Olsem na ol i redim gut tru ol samting bilong intanesenel kibung. "Mi amamas long ol meri long Madang long kamap long wanpela tingting na wok bung, maski ol i kam long kankain sios. Yupela ol meri i soim gutpela piksa na tok tenkyu mas go long yupela," Misis Moeder i tok. Tasol Misis Moeder i tok insait long dispela kibung, i nogat luk-save long Provinsal Kristen Wimens grup. Em i tok i gat luksave long Nesenel na Provinsal Kaunsil bilong ol Meri na Sios tasol.

Em i tok bihain ol kain wok na toktok i mas bihainim stretpela rot. Em i tok i luk olsem Wimen Intanesenel Konvensen long Madang i no go stret long stretpela grup bilong ol meri long oge-naisim. Em i tok long bihain taim, kain bikpela kibung i mas go long han bilong stretpela grup bilong ol meri na i no han bilong wanwan meri. Misis Moeder em i Deputi Komisina tu bilong Madang Taun Interim Komisen.

Em i tenkim ol meri long Madang long gutpela laik na pasin bilong ol long wok bung wantaim. Na em i askim ol long bihainim wankain pasin bai plen bilong ol i karim kaikai.

**Ol Katolik meri no sapatim wok bilong Wol Beng na IMF long PNG**

**WANPELA** wik bung bilong olgeta Katolik meri insait long kantri i bin lukluk long ol bikpela samting we i karamapim laip na sindaun bilong ol meri.

Kibung i glasim tu ol rot we ol i ken, bihainim long go hetim gut laip bilong ol meri na famili.

Bung we i bin kamap long Mingende Konvensen senta insait long Mingende peris, Kundiawa daiosis long Simbu provins i bin pulim moa long 800 Katolik meri long 19 provins olgeta.

Bikos i nogat inap mani, ol meri long Kerema na Bereina Daiosis i no bin kam long dispela bung. Bung i bin stat long Septemba 25 na pinis long namba 30 de.

Het tok bilong bung em long ikwaliti, developmen, pis na jastis. Dispela em i bihainim yet het tok long bikpela bung bilong olgeta meri long wol we ibin kamap long Beijing, Saina long las mun.

Kodineta bilong nesanel Katolik Wimens Asosiesen Ludwina Ginigit i tok sampela long ol bikpela isu we konvensen i bin lukluk long ol em:

- Strakserel Adjasmen Progrem (SAP) we Wol Beng na Intanesenel Maniteri Fan (IMF) i go hetim nau long PNG.


Ol meri i no sapatim tru dispela progrem. Bikos ol i tok long ekspiriens bilong ol arapela develop- ing kantri olsem PNG long Afrika, Esia na Saut Amerika, SAP progrem ino wok. Em i bagarapim na kamapim moa trabel na hevi tasol long ol.

Melsol kodineta bilong Wewak i bin givim toktok long ol meri long kliarim gut save na tingting bilong ol long dispela SAP progrem. Na ol i laikim moa edukesen aweanes progrem i kamap long dispela.

- Rot bilong strongim network o wok bung na komyunikesen namel long ol Katolik wimens asosiesen insait long kantri

- laikim strongpela mekim save i mas go long ol bikman long gavman na palamen, moa yet ol dispela bikman husat i laik kisim moa long wanpela meri.

Wanpela samting we ol i egensim em toktok we Praim Minista Sir Julius Chan i bin mekim ino long taim i go pinis long sapatim dispela samting.



• **Ol meri hailans husat i bin kamap bikpela bung bilong ol yet, em i bin kamap long Tari, Sauten Hailans provins long mun Mas. Mausmeri bilong ol i kamap tu long dispela bikpela bung long Kundiawa.**

Ol meri i laikim tu tupela man na meri i kisim mekimsave sapos tupela meri husat i tok ol i meri bilong dispela wanpela man. Na taim ol i pait wanpela meri i dai.

Long nau, kot i wok long kalabusim narapela meri tasol na man ino kisim wanpela mekim save. Ol meri i pilim olsem dispela em i fea o gutpela. Ol i laikim man tu long kisim mekim save bikos em i stap olsem hap long ol trabel na

- Ol i laikim kristen kaunseling na givim skul i kamap olsem hap long skul progrem insait long ol hai skul long ol sumatin iken kisim helpim long sait bilong kisim save na tu long spirituel na moral laip bilong ol.

Ol i laik strongim dispela bikos ol i lukim olsem long nau ol yangpela manmeri i wokim planti bikhet pasin.

Kain bung ya i save kamap long olgeta yia. Long las yia, ol bin holim long Sivarai Namona, Bomana ausait tasol long Mosbi siti.




# PNG yut embasida i go long Esia

FRIEDA KANA i raitim

YANGPELA Martin Pala, kris-mas 19 bilong Madang i bin makim Papua Niugini olsem yut embasida i go long 7-pela kantri long Esia i ap long tripela mun olgeta. Mista Pala em i wanpela namba wan yia bisnis stadi studen bilong Unitech Lae. Tasol World Vision Taiwan i bin makim em namel long tripela yangpela husat i bin aplai long dispela tripela mun raun insait long Esia.

Air Niugini long Madang i bin givim fri tiket long Martin bilong i go long Manila, biksiti bilong Filipino na kam bek gen. Narapela hap bilong tiket long Manila i go long Taiwan em World Vision Taiwan yet i bin lukautim. World Vision Taiwan i bin sponsaim 50 yangpela manmeri, husat em krismas bilong ol i stap namel long 17 na 19 bilong 50 kantri long olgeta hap bilong dispela graun we World Vision i wok long en.

Astingting bilong dispela raun em bilong strongim pasin bilong rispektim laip bilong ol arapela manmeri olsem God yet i bin wokim ol. Dispela pasin ol i kolim long "Universal Life Values." Insait long wanpela bikpela kwaia grup, na ol drama, kwaia, danis na ol tok-tok insait long ol Universiti dispela 50-pela yangpela manmeri i bin autim pasin bilong laikim narapela, rispektim narapela, pasin bilong stap bel



• Yangpela Pala (namel) wantaim PNG Embasida i go long Filipino (Ilephan) na World Vision Filipins Fil Dairekta.

isi namel long famili na long mekim ol pipel i luksave olsem wanwan manmeri em God i kamapim olsem na ol i mas rispektim dispela.

Mr Martin Pala em i tok olsem long planti hap ol i go long en plenti manmeri i bin kapsaitim ai wara taim ol lukim ol dispela yangpela manmeri bilong kankain hap i holim han, danis na singsing wantaim na holim pasim ol yet olsem ol i brata na susa tru.

Ol pipel husat i lukim dispela i tokaut olsem dispela em i kain sindaun ol i laikim i mas kamap long olgeta hap bilong dispela graun. Bel isi na pasin bilong laikim na rispektim narapela em i laik tru bilong plenti pipel.

Martin em i bin tok olsem insait long ol dispela kantri em raun long en em i lukim olsem ol i gat dispela pasin bilong rispektim laik na laip bilong narapela. Tasol taim em i lukim pasin bilong ol long ol esia kantri we ol i rispektim narapela olsem long pasin bilong givim sit long bas long lapun manmeri o wanpela meri, long pasin bilong sanap long lain na kisim bas na i no ron na pait long kisim ples insait long bas olsem i save kamap hia long kantri bilong yumi yet. Em i tok Papua Niu Gini i gat longpela rot yet long i go kamap long dispela pasin bilong rispektim laip bilong narapela.

Martin em i tok olsem taim ol dispela yut i go bek long ol kantri bilong ol sampela bai i ken toktok long ol televisen na

ol niuspepa long promotim ol dispela bikpela tingting tasol olgeta yet i tok ol i laik bihainim kain pasin we ol i laikim olgeta man long bihainim. Ol i bilip olsem sapos ol i soim ol dispela gutpela pasin bilong rispektim narapela bai manmeri husat i lukim bai i bihainim tu.

Martin wantaim ol arapela yangpela manmeri i bin bungim Presiden bilong Taiwan, Presiden bilong Indonesia, President bilong Philippines na Martin i bin bungim tu Ambasadu bilong Papua Niu Gini long Philippine. Dispela em i nambawan taim World Vision i holim wanpela kain projek na i luk olsem bai i kama gen long narapela ol yia i kam.

# PNG gat nau Institut bilong Teknoloji

PAPUA Niugini nau bai i gat wanpela Institut bilong Teknoloji bihainim wanpela agrimen namel long Papua Niugini Universitas ov Teknoloji (UNITECH) na Dipatmen ov Woks. Seketeri bilong Dipatmen bilong Woks, Gavera Morea wantaim Deputi Jensela bilong UNITECH, Misty Baloiloi i bin sainim dispela long las wik, Fraide Oktoaba 6, 1995.


Mista Gorea bipo long sainim dispela agrimen i bin tok planti ol wok projek we ol dipatmen bilong woks i save wokim i no save go het. Long wanem ol i save sot long gutpela save bilong wokim ol wok i go het. Bihainim dispela em i tok dispela agrimen em i wanpela we bai i kirapim gutpela wok kamap we bai i gat planti ol gutpela manmeri husait bai i gat save bilong wokim dispela kain wok. Long dispela wei em i tok bai ol i sevim mani na ol wok bilong ol bai i go het. Em i go het long tok tu olsem dispela agrimen we Yunitek bai helpim ol, em long givim gutpela trening inap long nesene na intanesene stended.

Mista Gorea i go het long tok olsem dispela trening institut i no nupela. Na ol pipol i noken kisim dispela tingting olsem dispela wok bilong kirapim dispela institut em long resis wantaim ol narapela institut. Dispela wok kamap em long kirapim gutpela ol trening institut bilong skulim ol gutpela man i gat save long go het wantaim ol wok divelpomen insait long kantri. Bihainim dispela, namba tu Sensla bilong Unitek, Misty Baloiloi i tok University bai wokim olgeta samting em i ken wokim long helpim dispela institut i go het. Long wanem em i tok wok bilong Univesiti em long go pas long wok divelpomen insait long kantri.

Em i go het long tok tu olsem dispela kain ol tingting na lukluk bilong kirapim gutpela wei bilong kirapim gutpela wok bilong sevim mani i mas stap olsem ol as toktok. Long wanem em i tok kantri i nidim tru ol gutpela saveman husait inap long wokim ol teknikal wok. Mista Baloiloi i tok 20 yia i go pinis taim Papua Niugini i bin kisim indipendens, na em i no lukluk strong long kirapim gutpela wok kamap long sait bilong humen risoses. Bihainim dispela em i tok planti wok i no save go het long wanem ol man i no save long wanem samting bilong wokim.

# YU NO INAP WINIM

## TOYOTA HILUX 4X4 DABOLCEBIN



Dispela kar tasol em i bikpela na strongpela 1 tonne 4 wil draiv kar long Papua Niugini Toyota Hilux i givim yu nambawan 2800cc disil pawa na i gat 5 pela gia, nambawan ples bilong sindaun bilong 5 pela man. Na i gat ol arapela samting olsem ol TJM Bulba, em bilong pasim ol bulmakau na ol bikpela wil. Yu no inap mekim wanpela samting sapos yu no gat dispela Toyota Hilux 4WD. Bikpela spea pat na sevis divisen bilong Ela Motors long olgeta hap insait long Papua Niugini i sapatim dispela nupela kar.

 **TOYOTA**

**Ela Motors**

# Narakobi toktok long at na kraf so bilong Sogeri studen



• Ol studen bilong Nesenel hai skul i wok long lukluk long ol piksa long Sir Allan Mann Gallery long nesenel Musium na Art gallery.

## ELIZABETR LENY i raitim

PASIN o save bilong drowim na penim ol piksa i stap long wanwan pipel. Dispela em toktok bilong Memba bilong Wewak, Bernard Narakobi long las wik i go long ol studen bilong Sogeri Nesenel Hai Skul. Dispela em long taim ol studen i bin putim kamap wanpela so bilong ol we ol i soim ol drowing na penting em ol save wokim long skul.

So i stat long Fraide Oktoaba 6 na bai pinis long namba 28 de. Tisa i go pas long ol studen, Carol Brayan i tok ol i go het long putim dispela kain so we em i namba wan taim tru. Na i laik soim dispela laik ol gat long wokim dispela kain ol samting. Em i tok inap long 130 studen i bin stap insait long wokim dispela ol samting. Tisa Carol Brayan i go het long tok olsem dispela em i wanpela wei we ol studen i ken soim tingting na save bilong ol sosai-eti ol i stap insait long em.

Tisa Carol Brayan i go het long tok olsem ol i bin kamap wantaim dispela tingting bilong dispela so bihain long ol i save kam daun long lukluk raun long misium tripela taim long wanpela yia. Em i tok taim ol i lukim ol samting insait long misium, ol i kisim dispela tingting olsem ol yet tu i ken wokim ol samting na soim long ol manmeri.

Bihainim dispela, Mista Narakobi i tok dispela kain we bilong wokim samting em i stap insait long wanwan manmeri. Em i tok taim wanpela i drowim o paintim wanpela samting, dispela peinting o drowing i soim wanem kain man o meri i bin drowim dispela samting. Em i tok drowing o peinting i save soim wanem kain tingting dispela man o meri i gat long wanpela samting taim em i drowim.

Em i go het long tok olsem wanpela wei bilong lukluk long dispela kain ol at insait long Papua Niugini em "tambaran art" na "everyday art". Em i tok tambaran art em ol samting olsem sanguma, masalai dukduk na tewel. Na everyday art em ol samting olsem wei bilong wokim bilum, disain na basket.

Mista Narakobi i tok tude pasin tumbuna na pasin bilong ol waitman i wok long kam bung wantaim na i wok long bringim wol i kam klostu wantiam. Em i tok at i save soim wanem samting man o meri i ken wokim o i no nap long wokim. Olsem na at em i wanpela bikpela samting tru.

Long wanem em i tok at i save kirapim dispela tingting olsem mi gutpela, mi naispela. Em i go het long tok olsem nau yet i gat wanpela misium, tasol i nogat misium at galari yet.

# OTML Sevings na Lons Sosaiti baim ol memba nau

MOA long wan tausen memba bilong Ok Tedi Sevings na Lons Sosaiti bai kisim namba wan win mani bilong ol i kam long sosaiti. Dispela em bihain long sosaiti i bin kamap long 12 yia i go pinis.

Sosaiti i tokaut olsem ol i painim pinis dispela mani we i bin lus. Dispela mani i bin kamap inap long K193,509. Na i bin lus namel long Epril 1983 na 1992, taim sosaiti i bin stap aninit long lukaut bilong nupela supavaiseri komiti.

Long namel bilong 1992, Fainens Dipatment bilong Ok Tedi i bin go pas long menesim na edministretim dispela sosaiti. Dispela i bin kamap bihainim tingting bilong Beng bilong Papua Niugini. Bihainim dispela, ol memba bilong dispela sosaiti bai kaisim namba wan win mani bilong ol.

Long Desemba las yia, sosaiti i tokaut olsem ol i wokim profit inap long K67, 590.

## FLORIAN DATI i raitim

Sosaiti i lukluk tu long putim antap sampela mani inap long 3.5 pesen long olgeta akaun bilong ol memba long Septemba 30, 1995. Dispela bai inap long K130,000 we bai sosaiti i baim olsem win moni i go long olgeta memba. Bihainim dispela, bai i gat peimen bilong ol win mani bihain long olgeta 6-pela long mun Mas na Septemba long olgeta yia.

Sosaiti i bin tokaut tu olsem em kirapim wanpela nupela komputa sistem long stat bilong dispela yia. Dispela sistem i bin helpim planti bilong dispela ol memba long luksave long wanem we mani bilong ol i wok.

Nau yet i gat 1,148 Ok Tedi Maining Limited sevings na lons sosaiti memba. Na 867 bilong dispela ol memba i gat sevings na lons akaun wantaim.

Astingting bilong OTML sevings na lons sosaiti em long givim gutpela sevis long ol memba long givim:

- Lon o dinau mani long liklik interes inap long 10 pesen long wanpela yai bihainim balens bilong lon long olgeta mun.
- Olgeta fotnait mani i save go stret long dispela sevings long perol bilong dispela ol memba.
- I tambu long rausim mani inap long K200 long dispela sevings.
- givim mani tupela taim antap long hamas em i sevim sapos em i laik wokim wanpela samting we i gat tokorait long em.

Planti bilong dispela ol memba i luksave na amamas long dispela. Na ol i tok dispela i no wankain olsem ol komesel beng. Olsem na ol i tok OTML i mas go het long menesim na edministretim dispela sosaiti.

# Holimpasim save bilong ples

Las wik mi bin stap long Papindo Supamakot. Na mi lukim wanpela bikpela meri i holim kuka long baim na rop ol i pasim dispela kuka i lus.

Mi ting olsem em bai pret na tro-moi dispela kuka. Tasol mi popaia. Meri ya holim pasim kuka na em i askim stuakipa long wanpela hap rop. Na em i pasim dispela kuka gen. Bihain em i baim.

Mi lukluk gen long dispela meri na mi kirap nogut. Em i no wanpela meri nating. Em meri bilong Sir Michael Somare, Veronica. Man, meri ya i holim pasim yet ol dispela save bilong ples?

Mi tingting long ol arapela wankain lain na ol lain husat i lusim ples nau tasol. Ol i holim pasim yet ol dispela pasin bilong ples o tingting bilong taun na waitman i paulim ol pinis? I no ol yangpela tasol. Ol bikpela manmeri tu.

Yumi wanwan i save.

Em i tru olsem planti gutpela samting long ples i lus nau. Long ples ol i skulim yumi long pasin bilong stap laip. Ol i skulim yumi long wokim haus, wokim kanu, wokim gaden, painim kaikai na kukim kaikai.

Tasol skul bilong ol waitman i skulim yumi long kaunim namba, Tok Inglis na ol samting i kamap olsem wanem long dispela graun. Skul bilong waitman i skulim yumi long painim wok. Na sapos nogat wok, yumi bai kisim taim.

I no long taim i go pinis tu, ol i opim nupela Pot Mosbi Nesenel Hai skul. Kos bilong dispela hai skul em K24 milien. Na em i skul bilong ol studen long Mosbi tasol. Olsem wanem long ol arapela studen long ol arapela provins.

Sapos ol i skelim dispela K24 milien long wanwan provins long Papua Niugini. Planti moa studen bai kisim save.

Mi lukluk long dispela skul tu i luk olsem wanpela haus kalabus ya.

Ating ol bai skulim ol dispela studen long stap long wanpela kalabus ya. Kalabus we ol i no save long graun bilong ol, tokples bilong ol na pipel bilong ol.



Dispela kain pasin bilong skelim wok edukesen long kantri i kamapim planti hevi. Hevi we ol yangpela i no inap kisim wok long save bilong ol na i kamapim kainkain trabel. Na tu hevi we sampela bilong mipela i kamap olsem kokonas ya. Ausait em i blak na insait em i wait.

Dispela wik tu gavman i tok olsem yumi mas makim 50 krismas bilong Yunaited Nesens long dispela wol. I bin gat pablik holide long Tunde Oktoaba 10.


Tasol Yunaited Nesens i mekim wanem samting tru long kisim dispela kain rispek. Long PNG mi lukluk na mi no lukim wanpela gutpela samting.

Mi lukim bikpela opis bilong ol long Mosbi. Mi lukim kainkain stail kar bilong ol long Mosbi. Mi harim olsem ol i givim bikpela mani long wokim dispela ripot o dispela projek.

Tasol stori bilong gutpela kaikai mi no lukim o harim yet. Ating mi mas yaupas na aipas.

Mi laik tok gutlak long tupela lain pipel husat bai brukim het na save bilong ol long dispela mun. Gutlak long olgeta studen long gred 6, gred 10 na gred 12 long kantri, husat bai sindaun long eksam, long tingim ol samting bilong ples tu. Yupela bai strongim dispela kantri long bihain taim.

Gutlak tu long ol Kumul pilai long Ingran. Ol i tok olsem Nu Silan bai winim gem long grup bilong yupela. Soim ol olsem yumi ol PNG inap tu ya.



• Bikpela paip wara long fran bilong Jacksons ples balus long Mosbi i bin bruk. OL wokman i mekim save long stretim long las wik. Foto: Joe Ivaharia.



## OL WANSOLWARA NIUS

### Frens Polinesia i painim lain bilong lukautim ol pikinini wantaim nogat papamama

#### FRENS POLINESIA:

Oi Sosel Welfea atoriti long Frens Polinesia i laikim moa famili bilong lukautim ol pikinini husat ino moa stap wantaim ol trupela famili bilong ol. Ol welfea lain i gat 30 pela pikinini we ol i wok long painim ol famili long kisim na lukautim ol, ripot i tok. Ripot i tok tu olsem inap long pinis bilong mun Ogas long dispela yia, welfea i bin putim moa long 250 pikinini i go long lukaut bilong 170 fosta famili insait long Frens Polinesia. Wampela mausmeri bilong welfea, Veronique Howan i tok mak long namba bilong ol pikinini husat ino moa laik stap wantaim ol trupela papamama bilong ol bikos long sampela kain hevi insait longn famili i wok long go antap. Insait long wampela mun, welfea i save peim ol lukaut famili bilong wampela pikinini 600 dolas long mani bilong Amerika na narapela 300 dolas sapos sem famili ya i lukautim tupela fosta pikinini. Long wankain taim, ol bai wokim fosta hom o ples bilong lukautim ol dispela kain pikinini long ples Papara we i stap 300 kilomota longwe long Tahiti.

### Namba bilong ol skolasip sumatin long Pasifik bai i go antap long Is Wes Yunivesiti senta.

**HAWAII:** Is Wes Yunivesiti senta long Hawaii i kisim moa fanding i kam long federel gavman na dispela i min olsem namba bilong ol sumatin long ol arapela Pasifik kantri husat i kisim skolasip bilong skul long hap bai i go antap. Ripo long samting ya i kam long Hawaii pablik redio we i tok mak bilong mani we yunivesiti i kisim inap long kwata milien dola long mani bilong Amerika.

Presiden bilong Is Wes Senta, Kenji Sumida i tok fanding helpim bilong Federel gavman bai i givim sans long moa sumatin bilong ol arapela independen Pasifik kantri long go skul long Yunivesiti bilong Hawaii long Hilo. Em i tok wampela komiti we i gat ol bikman bilong Is Wes Senta na Hawaii Yunivesiti bai i makim ol sumatin husat i aplai long go hetim skul bilong ol long hap.


Na ol i ting ol progrem long dispela kos bai i go gut tasol.

### Tok nogat long yusim ol kofin long egen-sim Frens nuklia tes


#### FIJI:

Distrik opisa long Suva i stapim sikstinpela (16) grup long Fiji husat i laik yusim kofin o bokis bilong putim ol dai man long em long protes egens long Frens nuklia tes long Saut Pasifik, Pasifik Consens Risos Senta long Fiji i tok. Wampela mausman i tok ol Fiji kabinet ministra i putim presa long stapim ol grup long yusim kofin bikqs dispela bai i daunim pasin kastam we i ol i gat bikpela rispek long ol daiman na kofin.

Tasol mausman bilong grup, Lopeti Senituli i tok as long grup i laik yusim kofin em long soim olsem laip i santu we long nau Frans gavman i laik bagarapim long ol nuklia tes long Moruroa.



*Planti moa dai...* • Dispela em wampela strit long Sarievo we wampela bom i pairap na kilim planti moa man. Pait long Bosnia i stap yet.



*Taim bilong trening...* • Oi Kangaroo pilaia i wok long tren long wampela pul long England bihainim win bilong ol egensim ol South Arfika. Poto i soim Mathew Johns wantaim bal.



*Kisim filings...* • Dispela meri Australia husat i save danis i namba wan meri long winim wampela awot long ol Televisen bilong Amerika.



## OL LIKLIK NIUS

### Populesen bilong Australia go antap

CANBERRA: Populesen bilong Australia i go antap olgeta nau long 18 milien lkong wanem em i wok long gro antap 200,000 long wanpela yia ol nupela namba i soim. Australia Birou bilong Statistik i tok olsem populesen i gro long 198,000 long mun Mas long las yia i go inap long mun Mas long dispela yia. Olsem na dispela i kisim populesen bilong ol i go antap olgeta long 18,000,500.

### Olpela ami jeneral joinim ol Rebel

MANILA: Wanpela namba wan ami jeneral bilong Philippine Militeri Gavman i joinim pinis ol rebel paitman husat i laikim komiunis gavman tasol i gat bikpela singaut tru long ol gavman opisal olsem em i mas lusim ol lain kominis na kam bek long gavman. Olpela jeneral husat i pinis long wol Raymundo Jarque's i mekim disisen long joinim ol Niu Pipel Ami (NPA) i mekim na planti ol gavman opisals i kalap nogut tru. Tasol em i tok olsem joinim ol NPA i no nap stopim gavman long Manila long mekim stretim toktok wantaim ol Rebel.

### Guria long Mexico kilim 66


MANZANILLO, Mexico: Wanpela bikpela guria tru long stori bilong Mexico i kamap na i kilim moa long 66 manmeri na bagarapim moa long 100 pipel. Guria ya i brukim ol haus na hotel na i bagarapim planti samting tru, wanpela opisal i tok. Ol wokman bilong sivil difens long stet bilong Jalisco i wok hat tru long painim ol manmeri husat graun i karamapim ol yet na tu traim long stretim ol dispela samting i bagarap.

### Six-pela mangi kisim taim


KANSAS SITI USA: 6-pela liklik mangi em krismas bilong ol i stat long long 10-17 em kot i sasim ol long kikim wanpela man i go inap long dai taim man ya i wok long long wetim bas long go long wok. Ol yangpela mangi ya i bin kisim sans long wanwan na kikim Jerry Hoshor i go inap em i dai. Em bin ap indai inap ol i karim em i go long haus sik na em i lusim laip bilong em olgeta. Ol liklik mangi ya bai kisim taim bilong ol long kot bilong ol pikinini long wanem kot i painim ol i rong pinis long kilim man.

### Belhat long kot...

• Ol loya bilong Senta Lokel kot long Australia long wanpela disisen we ol i kros namel long mejistret na loya bilong em.



*Bagarap pinis....* • Dispela em wanpela liklik bot long Sidni Aba Bris long Australia na em i wok long sink i go daun bihain long wanpela bikpela sip i bamim em.



*Taim bilong sore...* • Wanpela olpela paitman bilong Japan i sanap wantaim Flek bilong ol long Yasukuni haus totu long onarim ol lain i dain long wo.

# Lukluk long rot ol bisnis i baim takis

LONG dispela wik, mipela bai lukluk yet long ol rot kampani i save baim takis bilong ol. Yumi bai lukluk moa long mani i go aut we bisnis bai kisim long baim takis. Mani i go aut long baim takis i wankain long olsem mani i go aut long wok we yu ken soim long net profit. I gat sampela bikpela senis we i narakain long ol we mipela bai lukluk long en.

Mani i raus long wok na i go long stretim ol hevi we mani i mas baim i no wankain long long mani i go aut long baim bisnis. Tok piksa olsem mipela i baim wanpela bikpela masin bilong wok. I gat dispela pemen ol i kolim Diprisiesen Reit. Dispela em opis bilong baim takis i save kamapim. Dispela takis bilong wanpela ka i save olsem 20 pesen (%) Stet Lain o

## Stret Lain

computers  
Air Conditioning plant  
Buildings  
(bricks/concrete/wood/iron/fitro)  
furniture and fittings  
Earth moving plant  
Cash registers  
Fax machines  
Fishing boats

daunim long 30 pesen. (mak bilong daunim balens bilong takis em long 1,5 taim long stret lain reit.) Sapos wanpela kampani i baim ka long K20,000, bai diprisiesen i oraitim em long baim em long baim takis long K4,000 long namba wan yia Stet Lain o K6,000 balens i daun.

Antap long diprisiesen reit bilong ka, sampela ples kliia reit em; Bisnis i ken kisim ekseleret



diprisiesen bilong baim o kamapim nupela bisnis aset we inap stap long narapela 5-pela krismas. Tasol dispela aset i no ken kisim stret ol fuel i kam long narapela kantri. Dispela bisnis i mas karimaut ol dispela wok bilong manufacturing, transport, construction, transport, storage o communication. Luksave olsem dispela lista i no bungim wantaim ol ritel treda. Ekseleret diprisiesen i oraitim 20 pesen bilong kos long nupela aset i go antap long olpela diprisiesen long yia yu bin baim.

Bilong ol bisnis haus na masin (we i no yusim wel) we i save wokim ol samting o long agrikalsa sait;

## Ridiusing balens

20 pesen	30 pesen
10 pesen	15 pesen
2 pesen	3 pesen
3 pesen	4.5 pesen
7.5 pesen	11.25 pesen
20 pesen	30 pesen
10 pesen	15 pesen
10 pesen	15 pesen
10 pesen	15 pesen

diprisiesen i go antap long 100 pesen bilong kos bai yu ken kisim bek long yia yu laik go baim.

## Repair na maintenance

Mani i go aut long repair na maintenance em no gat tok long em bikos em samting we i stap pinis long wok na i stap tu long takis. Impruvmen long aset em kain olsem senisim waia bilong haus kakaruk em olsem kapital ekspensisa o mani lus long kapital. Ol wok bilong stretim ol bagarap long aset em olsem kapital ekspensisa na i no inap orait long

alauwebel didaksen. Sapos wanpela ka we kos bilong em i olsem K20,000 na i bagarap, bai mekenik i stretim. Kos bilong stretim i olsem K10,000. Olsem na Diprisiesen bai K30,000.

## Interes ekspenses

Yumi ken tok olsem interes yumi baim long fans long bisnis em i ken raus tasol i nogat stop bilong en. I no gat luksave long interes yumi baim long fans we yumi yusim long wok kapital na interes yumi baim loun long baim asets. Dispela loun ekspens em kaptialais. Dispela i min olsem em i kamap hap bilong total kos bilong aset na diprisiesen i kamap long dispela.

Sapos wanpela bikpela stua i kos K120,000. Interes em bai

baim bek long bekim ol dinau em i kisim long wokim stua ya em K15,000. Olsem na i no long bekim bek dispela K15,000 stret, em bai bung wantaim total konstraksen kos na diprisiesen bai kamap olsem K135,000.

## Borrowing ekspenses

Kos bilong dinau long mani long pulim moa mani em olsem kapital ekspens. Ol i no inap kisim long ful long wanpela yia taim ol i kisiom dinau ya. Ol i ken srukim taim bilong dinau i go olsem 5-pela krismas o moa. Kos bilong dinau i ken karamapim ol kain fi olsem brokerege, advertising, valuation na survey fis, underwriting fi, prospectus fi, stamp duties, legal fi na security negotiation fi.

## Bisnis Lon

Sapos wanpela kampani i no wokim gut win moni long dispela yia, em i ken abrusim takis bilong em i go long narapela yia. Em i ken bekim dispela takis long narapela yia. Takis bilong em i ken stap moa i go inap long 7-pela krismas olgeta.

## Staf trening kos

Kampani i ken rausim pe bilong ol wokman olsem • Rijesta aprentis • sitisen woka husat i go kisim fultaim kos long trening skul bilong gavman • Trening opisa husat istap fultaim long wok bilong givim trening

Takis seving bilong dispela didaksen i no abrusim 75 pesen total mani i go aut.

Dispela alawens bilong trening woka i ken go long daunim 2 pesen Staf Trening levi we ol

kampani i mas baim long olgeta yia long pe bil we i save abrusim K100,000. Sapos wanpela bisnis i save baim K500,000 i go aut long baim potnait pe olgeta yia, em i mas baim trening levi long K10,000. Sapos bisnis i kamapim trening ekspens o lusim mani long kos olsem K5,000 na dispela hevi i oraitim long dabol ekspensisen, bai i no gat trening levi.

## Allowable deductions bilong rental propeti

Dispela mani i go aut em bilong takis stret. • Interes i go antap long dinau mani we man i kisim long baim masin o stretim masin • Reit na takis bilong graun, • Trevel na arapela ekspens we i jonim wantaim rent • repair na mentenens • Ejens komisen bilong bungim rent, • takis i go bek na redim ekspens, • Insurens, • Menesmen fi • Legal ekspens bilong stretim rent o rausim ol lain husat i no save baim rent bilong yu, • Ekspens bilong redim na stemim lis • Diprisiesen bilong propeti, fenisa na ol arapela samting bilong haus.

Ligal kos bilong eksen long ol bagarap long rent i no stap.

## Ekspens bilong takis, objeksen na apil

Mani yu ken tromoi long baim wanpela akaunten long i kam stretim wok bilong yu em teks alawebele ekspens. Tasol mani i raus long egensim wanpela apil we i egensim muv bilong ol lain long opis bilong takis i no inap stret. Akaunten fi joinim wantaim ol toktok redim o stretim wantaim Teksesen Opis i no inap stret.

# Sir Paulias Matane tok ol yangpela man paulim kantri

OL yangpela lida bilong Papua Niugini i nogat gutpela driman na plen bilong kantri bihain long 20 yia kantri i kisim independens.

Sir Paulias Matane, wanpela olpela pablik sevan na nau em i wanpela biknem man long kantri i bin tokim moa long 500 sumatin long Yunivesiti ov Teknologi long Lae long mun Septemba, 1995.

Sir Julius i tok bipo long independens ol lida olsem Sir Michael Somare, lambakey Okuk, Sir Tei Abel, John Momis, Thomas Kavali wantaim ol arapela lida i bin gat gutpela plen na visen.

Olsem na ol bin pait hat tru wantaim gavana bilong Australia na PNG i kisim independens long Septemba 1975,

## ALPHONSE PU i raitim.

"Kwiktaim bihain long PNG i kisim independens long tenpela yia, dispela visen na plen i wok long bagarap," Sir Julius i tok.

"Dispela em i bagarap bikos namba bilong ol nupela na yangpela memba i kamap bikpela kwiktaim na ol i kamap wantaim ol krangki tingting long wei bilong ronim kantri," Sir Paulias i tok.

Bihain long narapela tenpela yia i kam inap nau, ol nupela na yangpela memba i kisim pawa long gavana.

Pawa ol i kisim i bilong helpim ol yet na ino bilong helpim kantri. Olsem na bihain long 20pela krismas, kantri i go bagarap.

"Namba bilong ol memba i go long kot i kasmap, planti. Namba

bilong ol memba i wokim stil pasin i kamap planti na namba bilong ol memba em kot i saspensim ol tu i kamap planti," Sir Julius i tok.

Dispela i soim olsem ol dispela memba i nogat bilip long kirapim kantri, Sir Paulias i tok.

Em i skruim tok i go olsem ol dispela lain ino olsem ol lain bilong bipo wer ol i gat plen na visen bilong kantri na kisim i kam long independens.

Nau long dispela taim ol lain olsem Sir Michael Somare i kiism ol beksait sia long nesanel palamen, sampela i dai pinis na sampela em ol nogut politiks bilong PNG i brukim ol nabaut na ol i kamapim ol kain kain politikel pati.

Ol yet i pait nabaut olsem na dispela plen na visen we ol bin gat long en i lus pinis. Na dispela i mekim na kantri i nogat gutpela plen long nau na bihain taim, Sir Paulias i tok.

Long mekim kantri i go bagarap moa aninit long ol yangpela lida, PNG nau i gat bikpela dinau mani bilong bekim i go long ol Wol Beng na Intenesenel Maniteri Fan. Dispela mani inap long K5 bilien na dispela i mekim bai kantri i go bagarap olgeta.

"Papua Niugini i gat gutpela solwara, planti wel na minerel, diwai, na we stap ol mani mipela i save kisim long ol dispela samting," Sir Julius i askim.

Em i skruim tok olsem maski yumi i ris long ol dispela kain risosis yumi i

rabis stret long lukautim ol dispela samting gut na kisim mani long en.

"Bihain gen yumi wok long kisim dinau na bekim bilong dispela mani bai i kisim planti krismas," Sir Paulias i tok.

Ol pipel bilong ples husat i painim hat tru long baim marasin bilong haus sik, baim PMV, balus, ol kaikai bilong stoa na ol arapela sevis bikos long bikpela dinau mani em gavman i kisim long ol bikpela kantri.

Gavman i mekim olsem long kisim mani long ol pipel long bekim dinau bilong em.

"Dispela kain pasin long ol prais bilong ol samting i go antap bai i stap yet inap planti krismas," Sir Paulias i tok.

Long pasim toktok, Sir Paulias i tokim ol sumatin olsem long stretim ol dispela samting, PNG mas i gat ol lida we ol i gat gutpela tingting na plen bilong divelopim kantri.

Na i no ol dispela kain memba we ol i tingting long ol yet long narapela 20 yia i kam bihain.

"Bikos kantri i wok long bagarap bihain long 20 yia long independens olsem, mi no lukim long wanem as na gavman i tromoi planti mani na risoses long amamasim 20 independens.

Moabeta yumi mas planim nus na karamapim het bilong mipela long graun na stap sore," Sir Paulias i salensim ol politisian olsem taim em i pinisim olsem toktok bilong em.

# 1995 Morobe Agrikalsa so

Alphonse Pu i kisim ol dispela poto ...




● Bigpela Morobe Agrikalsa so i pulim tu singsing grup bilong ol arapela provins olsem ol hailans. Poto is soim man hailans ya i bilas gut tru na malolo bihain long singsing.



● Stol bilong Word Publishing kampani husat i save salim 4-pela niuspepa olsem *Wantok, Weekend Sport, PNG Business* na *The Saturday Independent*.



● Ol meri Morobe i bilas gut tru na kamap long singsing. Hapsait bilong pes i blak na hapsait i red long kala. Man, ol mekim olsem na ol manmeri na pikinini i pretim ol stret long so.



● Boi ya putim singles wantaim rit: "Turn me blue" na blowim seksafon long hap em ol laip o pawa ben i pilai. Krai bilong ol pawa ben i pulim planti tausen manmeri tru, husat i kamap na lukim ol biknem Morobe ben olsem ol Reks na Sagothorns.



● Yu noken tin em ol plisman o woda bilong CIS. Em ol manki nating ya. Ol i bilas olsem ol tultul luluai bilong guttaim na paitim dram. Ol holimpasim stret ai bilong planti manmeri.

# PNG Laipstail

## Astingting bilong Mis PNG resis

OL bikman na bikmeri, 1995 Mis PNG em ... Miss NCDC Imanakone Sioa. Dispela em toktok bilong Jenny Lemeki, husat i bin mausmeri long taim Papua Niugini Red Kros Sosaiti i bin kamapim wanpela bikpela nait bilong makim wanpela meri husat bai kamap Mis PNG long las wiken.

Nogat man o meri inap tingm stret long wanem yia dispela resis i bin stat we nem bilong resis ya i bin Mis Red kros i go inap 1974 we ol i bin senisim nem bilong resis ya i go long Mis PNG resis na ol man i bin stat long makim long rekot olsem dispela yia inap kam nau we i bin twentipela yia olgeta bilong Mis PNG resis.

Orait dispela resis ya i save gat toktok tumas long en. Sampela i save tok em i gutpela we long mekim mani bilong Red Kros na sampela bilong ol i save tok dispela resis i bagarapim tumbuna pasin bilong Papua Niugini stret na sampela manmeri i save gat bikpela askim we stret dispela mani, ol meri Mis PNG i mekim i save go. Dispela kainkain tok baksait na ol narapela mi no bin mekim i save kamap long maus bilong planti manmeri.

Tasol Mis PNG resis em i wanpela bikpela resis, Red Kros sosaiti i bin kamapim long kisim mani long helpim sosaiti long wok bilong em insait long kantri. Gavman i bin putim wanpela kain lo bilong palamen long mun Mas 1976 long helpim Papua Niugini Red kros sosaiti long wok bilong em insait long kantri.

Lo ya i tok olsem:

- Red Kros bai helpim na lukautim ol sik manmeri na pipel husat i gat bagarap maski long wanem ples ol i kam long en.

### IVAN BAYAGAU i raitim

- givim helpim i go long pipel husat i gat bikpela trabel

- i save lainim ol manmeri long we lukautim ol yet, we bai ol i no inap kisim bikpela sik o ol Red kros i save skulim ol manmeri long we stapim ol sik.

Red Kros i gat kainkain program na sevis long wok bilong en. Sampela bilong dispela ol bikpela program na sevis Red Kros i save gat em;

- klinik bilong kisim blut long manmeri long helpim ol sik pipel long haus sik husat i sot long blut,

- i mekim wanpela spesel skul bilong lainim o yau na ai pas pikinini na tu ol longlong liklik,

- i gat program bilong helpim ol manmeri i gat bagarap long taim bilong bikpela graun bruk, guria, tait wara, maunten paia o strongpela win na ol narapela kain bagarap i save kamap.

Dispela em ol bikpela program na sevis Red Kros i save wok long en long taim nogut. Red kros tu i save helpim lainim Fes Ed, helpim ol yut na tu givim helpim long ol pipel taim haus i paia.


Red Kros em i wanpela oge-naisesen we i save traim long painim mani long kainkain we long mekim dispela ol wok, mi bin tok long bipo . Mis PNG i save kamapim 30 pesen mani tasol bilong Red Kros long wok bilong en. Red Kros i gat bikpela wari nau we kantri bilong yumi i gat bikpela hevi long said bilong mani na PNG Red Kros sosaiti i gat bikpela wari long painim we long kisim mani long pipel bilong kantri na em i wok long lukluk long ol bisnis manmeri insait long kantri na ovasis long helpim ol.



● 1995 Mis PNG, Imanakone Sioa. Em bai gat bikpela wok nau long karimaut wok bilong Red Kros long helpim ol sikmanmeri wantaim ol trangu pipel long kantri.



● 1993 Mis PNG, Sharon Onsa bilong Bogenvil ailan. Em i go bek long lukim ol pipel long asples bilong em, na givim sampela helpim bilong Red Kros long ol. Dispela em long taim Air Niugini balus i mekim namba wan ron bilong en i go bek long ailan.



● Poto i soim Monica Daniel na pikinini meri bilong em, Rose. Haus bilong tupeka long Korobosea i bin paia long Julai, 1989. Paia i kukim papa bilong tupela. Laki long tupela i kisim liklik helpim long Red Cross.



● Sampela pikinini bilong Spesel Edukesen Senta i soim olsem ol i ken danis tu. Lida na tisa bilong ol em Regina Kati. Red Kros save helpim tu ol kain pikinini olsem.

## Laip long setelmen long wanpela de

RODNEY KAMUS i raitim

PLANTI manmeri long Papua Niugini na tu long olgeta hap bilong wol i no save mekim kainkain samting tumas long wanpela de. Olgeta i save makim taim bilong ol yet long mekim ol samting long olgeta laip bilong ol.

Sapos yu stap long ples, bai yu lukim olsem moning em taim bilong mekim ol bikpela wok tru olsem katim diwai o wok gaden taim de i kol yet. Na taim san i kam antap olsem long belo, ol man bai lusim ol hevi wok na go painim abus long bus o long solwara. Ol meri bai ol i go brukim paiawut na painim ol kumu. Apinun em olgeta bai bung long ples na long neks de, ol bai mekim wankain wok gen. Long ol lain husat i save stap long taun na wok, ol tu i save kirap long moning na go wok na bihain kambek long apinun. Nau bai yumi lukluk long laip bilong ol manki husat i save stap long setelmen na i no save go skul o wok.

FRANCIS SINGEPA em i wanpela mangi Simbu husat i save stap long Erima setelmen long Mosbi. Em i gat 15 krismas tasol na i save stap wantaim papa na mama bilong em long Erima setelmen. Na i gat tripela bikpela sista husat i marit pinis, na wanpela liklik brata bihain long em. Em i pinisim gred 6 bilong long WildLife Praimeri skul las yia tasol na i no kisim wanpela spes long go long haikul o painim wok nambaut. Mi painim yangpela Francis long Erima Mobil Sevis stesin long wanpela belo taim em i wok long salim buai na stori liklik wantaim em long wanem samting em i save mekim long olgeta dei long moning i go inap long apinun. Na tu long wanpela wik em i save mekim wanem kain samting long pasim taim bilong em yet long stap long siti.

Moning: Wantaim liklik mani mi gat olsem K2.00, mi save kirap long bikmoning tru na namba wan ples mi save go em long Tokarara Maket. Ino mi tasol i save go. I gat planti ol mangi long dispela setelmen mipela i save go wantaim. Mipela i save hait tasol na kalap long ol bas na go pinis. Long maket mipela bai baim buai we ol i save salim long 20 toes long tupela o tripela na sampela taim bai mipela i giamanum ol lain bilong salim buai na stilim buai bilong ol. Taim mipela i lukim olsem mipela i gat inap, mipela kalap long bas gen na kambek long Erima o Gordens. Long Erima o Gordens, mipela bai putim long trei bilong kiau na karim raun na salim long ol man long ol kar, bas o husat ol manmeri i wokabaut nambaut. Taim mipela i save salim buai, mipela i save mekim bikpela mani liklik olsem K10 o nogat K15 long wanpela dei tasol.

Belo: Long dispela taim, dei em bai hot nogut tru olsem na mipela bai karim mani bilong mipela i go long ol haus kaikai na baim ol skon wantaim ol hap mit nambaut na sindaun wantaim na kaikai. Dispela kaikai bai mipela i kaikai olsem bilong wanpela dei tasol i go inap long nait. Taim mipela i kaikai skon pinis, orait bai mipela i putim long sait mani bilong baim buai long neks dei inap long K3.00 o K2.00. Bihain long dispela, mipela bai go sindaun arere long rot na pilai laki long kar.

Laki pilai: Wanwan mangi bai kolim kala bilong kar em i laikim long em. Sampela bai tok ol i laikim grin, blu, yelo, wait na ol narapela kala mipela i save long em. Taim wanwan mangi i kolim kala bilong kar bilong em pinis, orait mipela olgeta bai betim 20 toea long namel. Sapos wanem kala kar i kam go na em bilong wanpela mangi, dispela mangi bai kisim mani. Dispela pilai em bilong pasim taim i go inap long apinun liklik taim san i kol. Orait taim san i kol nau, mipela bai go insait long ol grup na mekim wanwan tim bilong pilai ragbi tas. Wanwan tim bai gat 5-pela mangi. Orait bai mipela i bet K2.00 long wanwan tim na pilai egensim narapela. Wanem tim i putim namba wan trai, em bai kisim mani na nupela tim gen bai kam insait. Mipela bai mekim dispela pilai i go inap long nait.

Nait: Sapos mipela i winim sampela mani, mipela bai karim i go long haus piksa long setelmen na i gat ol masin pilai i stap we mipela i ken pilai. O nogat bai mipela i go lukim TV long ol taka boks o sondaun na stori i go inap 11 klok o 12 klok bai mipela i silip. Na long moning taim, i nogat moa narapela moa wok, bai mipela i mekim gen wankain wok olsem asde.

Pater Paul Steffen SVD i raitim

**W**ok misin i bin kirap 100 yia i go pinis long bikples Niugini.

Hatwok bilong Pater Arnold Janssen na Eberhard Limbrock long kirapim wok misin insait long Katolik Sios long bikples Niugini.

Hia em stori long wok bilong ol namba wan misinari long kirapim wok misin long PNG.

**Tok i go pas**

Long yia 1982 yumi bin amamas long makim 100 yia Katolik Sios i stap long Papua Niugini.

Long Septemba 29, 1882 ol namba wan Sacred Heart Misinari (MSC) bilong Frans i bin kamap long Matupit Ailan, Is Nu Briten.

Tenpela yia i go pinis, yumi bin selebretim 100 yias wok misin bilong Katolik Sios long PNG. Dispela em long tingim ol Sacred Heart misinari i kam long PNG long Julai 4, 1885. Ol i bin sindaun pastaim long Yule Ailan, Breina eria insait long Sentral provins na mekim namba wan misa long hap.

Long 1985 Pater Theo Aerts ibin raitim stori long wok bilong ol misin long tok Inglis. Stori i bin kamap long buk ol i kolim long "Mustard Seed" we George Delbos i bin raitim kamap.

Buk ya i stori long wok misin bilong Katolik Sios long Papua rijn. Long sab taitel bilong buk, "From a French Mission to a Papuan Church", dispela em i klia.

Yumi ken amamas tu long Pater Aerts long em i raitim kamap planti stori we i kamap long dispela buk long wok bilong ol misinari hia long kantri. Long dispela buk bilong Delbos, yumi ken ritim ol stori long wok misin bilong Katolik Sios insait long Niugini Ailans na Bogenvil. Tasol i kam inap tude, yumi nogat ol arapela histori buk we i ken helpim yumi long lukim ol narapela wok misin bilong ol arapela lain lotu.

Bikos neks yia 1996 em i senteneri taim bilong makim 100 yias long wok misin bilong katolik Sios insait long bikples Niugini, mi amamas long givim sotpela histori long dispela samting. Moa yet long wok we ol misinari i bin mekim long taim ol i sindaun pastaim long not kos bikpes Niugini.

Long skul bilong mi long Jesuit Yunivesiti long Rom, mi bin traim lukluk na skelim gut kamap bilong ol kristen misin long bikples Niugini. Mi karimaut dispela wok inap long Disemba 1992.

Bihain long mi skelim gut ol wok misin, mi bin lukluk long wok bilong tripela lotu.

Long tingting bilong mi, histi bilong wok misin ino bilong wanpela lotu tasol. Em i bilong ol dispela kristen sios husat i bin sindaun pastaim long planim tok bilong God long kantri.

### Luteran Sios

Long yia 1886, Luteran misinari sosaiti bilong Nevendettelsau long Saut Jemeni, Bavaria i bin kirapim wok misin long Finsafen eria, Morobe provins.

Wanpela long ol namba wan lain Luteran misinari long PNG em long Johannes Fliert. Taim em na ol arapela wanwok bilong em ibin kam long Niugini ol sindaun long Finsafen. Long taim Jemeni i lukautim Niugini, Finshafen ibin stap olsem etministretiv senta

# Stori bilong Katolik sios long bikples Niugini



● Pater Heinrich Buschoff, SVD wantaim ol sampela studen bilong em bilong Sek ailan long 1907.

Ol foto i kam long wanpela buk ol i kolim A Pictorial History of New Guinea by Noel Gash and June Whitaker.

bilong ol. Na Luteran Sios i bin kirapim wok misin bilong em long Huon Galp eria.

Wanpela yia bihain long 1887, Rhenish Misin Sosaiti i bin kamap long Niugini. Ol bin kam sua long Astrolob Be insait long Madang distrik na kirapim wok misin bilong ol.

### Divain Word o ol SVD misineri

Long Ogas 13, 1896 ol lain misinari bilong Katolik Sios em ol i kolim long "Sosaiti bilong Divain Wod (SVD) i bin kam sindaun long not kos Niugini. Na ol i kirapim namba wan misin senta long hap bilong Sepik.


Stori bilong dispela lain misinari ibin stat long 100 yias i go pinis long taim Pater Arnold Janssen i bin kirapim Kivung Tambu bilong ol SVD na ol Misinari Sister bilong Holi Spirit (SSPS) i bin kisim askim long Kadinel Ledochowsky, siaman bilong papal kongriksen sapos ol i laik mekim wok misin long Niugini.

Long dispela taim Kibung tambu i kirapim pinis wok misin long Holan (1875), Saina/Esia (1879), Argentina na Latin Amerika (1889) na long Tongo insait long Afrika long 1892. I luk olsem ol SVD i bin gat ol wok misin long tripela kontinent bilong wol.

### Pater Janssen

Long wanpela Sarere bipo long pestede bilong Pentekos long yia 1895, Pater Janssen i singautim ol kaunsil memba bilong em na askim ol long laik bilong ol long wok misin long Niugini.

Bihain long ol i mekim tok orait pinis long dispela samting, Pater Janssen i bekim pas bilong Rom na em i tok em i bilip dispela em i laik bilong God long ol pater bilong em i mas go wok long Niugini.



● Pater Franz Vormann, wanpela Divine Word misineri husat i kam long Niugini long 1896 wantaim wanpela poro bilong em.

Dispela tok orait i karim kaikai na bihain long 100 yias, wok we ol fes misinari ibin karim i kam long PNG i go het yet.

Dispela wok misin ol bin putim long lukaut bilong Holi Spirit na ol i kolim long "Holy Ghost Mission in New Guinea."

Long Pentekos bilong dispela yia 1995, i luk olsem wan hanret yia i go pinis long makim dispela wok misin bilong Kivung Tambu long Niugini aninit long lukaut bilong Holi Spirit. Tasol yumi noken lukluk tumas i go bek bikos planti samting we Holi Spirit i mekim long senisim laip bilong planti kristen manmeri hia long PNG.

### Semineri skul long Kap.

Long taim namba wan semineri skul long PNG i kirap long Kap, klostu long Alexishafen long Madang, ol bin givim i go long

lukaut bilong Holi Spirit. Na haus lotu (katitrel) bilong asdaiosis i stap aninit long lukaut tu bilong Holi Spirit.

### Pater Limbrock

Pater Limbrock i bin wok misineri long Saina taim Pater Janssen i rait na tok save long em sapos em i laik go mekim wok misinari long Niugini. Dispela em long Jun 1895.

Orait, Pater Limbrock i rait bek na em i akseptim askim ya insait long wanpela pas we em bin tok olsem.

"Long kruse na pen, mi no pret. Ol amamas bilong dispela graun ino inap pulim tingting na laik bilong mi. Sapos diapela wok misin long Niugini i bilong givim biknem long God, em i gutpela. Mi pre bai Holi Spirit i strongim na helpim yumi loj mekim gut dispela wok misin. Mi redi tasol long go long Niugini, " em bin tok. Olsem na em i lusim wok misin we em bin

kirapim long Saina. Long hap, em i kirapim wanpela skul semineri na tisa bilong ol yangpela man husat i laik kamap pater.

Pater Janssen i makim Pater Limbrock olsem rait man long go pas long dispela wok misin long Niugini.

Pater Janssen i bin luksave long Pater Limbrock olsem man husat i gat strongpela bilip long spiritual laip na man bilong putim olgeta hevi bilong em i go long God. Na tupela pater ya i sapotim wanpela arapela long spiritual laip bilong ol.

Orait, long Ogas 1896 Pater Limbrock wantaim faipela arapela misinari we tripela bilong ol em ol bruder na tupela pater i kam sua long not kos Niugini long Madang we long dispela taim ol bin save kolim long Friedrich Wilhemshafen.

Long taim olpela koloniel gavman, administretiv senta na haus bilong gavana i bin beis long hap.

Tasol ol protesten misineri bilong Rhenish misin i sindaun pastaim pinis long dispela hap na Pater Limbrock wantaim Brude Kanisius Hautkappe (man save long katim lok na su) Bruder Eustochius Tigges (kapenta na wokim sip), Bruder Theodulph Schmitt (somapim klos na kuk) na Pater Franz Vormann na Pater Joseph Edwerg i abrusim hap ya na go sindaun long Tumleo Ailan.

Dispela em long wes bilong Madang not kos.

Long Tumleo, dispela ol fes misinari lain ya i sanapim haus lotu na skul. Sik malaria i bin bagarapim tripela misineri long taim ol i go kamap long hap. Na ol i stap pastaim long Madang inap long ol i orait.

Long namba wan taim ol misinari i wokim bikpela misalong selebretim pestode bilong Santu Simon na Jude long givim tok tenkyu i go long God long blesing na grasia na helpim bilong em i go long ol misinari ya long kirapim wok misin long bikples Niugini. Tripela bruder i sanapim ol haus na long krismas bilong 1896, ol i redi long yusim ol.

Long wankain taim, tripela pater i stat long lainim tokples Tumleo, lukluk raun i go long ol ples na toktok wantaim ol pipel long ples.

Hia em ripot we Pater Joseph Erdweg i bin raitim bihain long foapela mun stap bilong ol long Tumleo. Em bin mekim wok painimaut long ol pipel na tu long tokples bilong ol.

"Ol samting mipela i ken wokim bipo long mipela i stat wok nau em long lainim ol tok ples. Inap nau mipela i autim 377 ol hap toktok i go long ol pipel long bus.

"Autim " em hap tok we i soim stret wanem samting mipela i laikim long askim ol pipel long mining tru bilong ol samting long ol tok ples.

Mipela i painaut olsem i gat planti tok ples stret na wok bilong misin long Kaiser Wilhemsland bai ino isi. Tasol long ailan Tumleo yet, i gat tupela tok ples.

**MOA RIPO  
BILONG  
DISPELA  
STORI LONG  
NEKS WIK**

## Sista Maurus i stap yet long Erima peris bilong Katolik sios insait long Mosbi siti

LONG tude taim ol trabel na belhevi i kamap long ples, komyuniti na sosaiti bilong mipela, tok i save sut long ol yangpela man olsem ol i as bilong ol dispela hevi.

Planti bilong mipela i save belhat tru long ol kain lain olsem. Na laikim bikpela mekim-save i mas kamap long ol dispela lain. Olsem na mipela i givim nem olsem ol trabelman, raskol o kriminol o bikhet man i go long ol. Tasol i gutpela long lukim olsem i gat sampela manmeri stap long komyuniti, ples na sosaiti husat i soim olsem ol i gat tingting na laik long helpim kain ol yangpela man olsem. Wanpela bilong ol kain manmeri olsem em Sista Maurus

### VERONICA HATUTASI i raitim

wok wantaim ol. Ol i gutpela pren na ol i gat gutpela pasin. Planti taim mipela i save i gat kain tingting na toktok long ol olsem ol i lain bilong wokim raskol pasin. Tasol i gutpela long mipela i mas gona stap wantaim ol long save gut long ol," Sista Maurus i tok.

Long tingting na lukluk bilong em, Sista Maurus i no lukim wanpela bikpela samting i rong wantaim ol yut long kantri tude. Wanpela samting tasol i olsem ol i save gat belhevi bikos ol i no inap long winim skul long kisim wok long sapotim laip bilong ol.

"Ol yut i gat bikpela hop na laik long stap

strit bilong Mosbi long 1970. Dispela em long kisim ol pikinini long kirapim Erima komyuniti skul. Ol i wokabout-raun long long Godens, 6 Mail setelmen na ol arapela hap moa.

Antap long wok olsem tisa, Sista Maurus i karim aut ol pastoral wok long peris bilong em. Dispela i karamapim ol wok olsem go insait long ol setelmen na helpim ol lain i laikim helpim, go long ol komyuniti na haiskul long givim tok-tok bilong God na go long haus sik long lukim ol sikmanmeri.

Long ol yangpela pipel, Sista Maurus i gat bikpela bilip long ol olsem ol i ken kamapim gutpela wok long kantri. Na em i laikim olsem ol i mas gat sans long soim olsem ol ik en mekim dispela samting i karim kaikai. Olsem na peris bilong em long Erima i kirapim Maino Heduru

"Mi painim olsem ol Goilala pipel em ol gutpela lain we mi stap na wok wantaim ol. Ol i gutpela pren na ol i gat gutpela pasin. Planti taim mipela i save gat kain tingting na toktok long olsem ol i lain bilong wokim raskol pasin. Tasol i gutpela long mipela i mas go na stap wantaim ol long save gut long ol."

Vokesenel senta long givim sampela gutpela skul long ol manki. Na ol i ken kisim wok na abrusim kainkain trabel na hevi.

Long 27 yia bilong em long PNG, Sista Maurus i bin go malolo long ples bilong em long Lockington long Victoria wanpela taim tasol. Sista Maurus i lukim

planti senis i kamap long kantri long dispela 27 yia em i stap.

Wanpela bikpela samting we em i amams tru long lukim em long ol asples manmeri kisim ol bikpela wok.

"Mi amamas tru long stap na wok long PNG. Mi lukim PNG olsem ples tru bilong mi," Sister i tok.

"Tasol i gutpela long lukim olsem i gat sampela manmeri stap long komyuniti, ples na sosaiti husat i soim olsem ol i gat tingting na laik long kain ol yangpela man olsem. Wanpela bilong ol kain manmeri olsem em Sista Maurus Dullard."

Dullard. Sista Maurus em i wanpela Brigidin Sista bilong Erima Katolik peris. Long planti yia em i wok namel long ol yut long Mosbi. Bikpela tru wantaim ol yut bilong Goilala insait long Sentral Provins. Olsem na em i gat save na tu em i luk-save long watpo na ol yangpela man i save wokim ol raskol na arapela bikhet pasin. Dispela yia em 27 yia bilong Sista Maurus long stap insait PNG. Na em i wok yet wantaim ol yut. Long nau yet, em i wanpela tisa long Maino Heduru vokesenel senta insait long Erima peris yet. Long planti yia i go pinis, Sista Maurus i wok namel long ol Goilala pipel na ol yut insait long ol setelmen long Mosbi.

Long 10-pela yia, Sista Maurus i bin wanpela tisa long Tapini gavman haiskul insait long Sentral Provins.

"Mi painim olsem ol Goilala pipel em ol gutpela lain we mi stap na

olsem ol gutpela pipel bilong kantri. Tasol taim planti bilong ol i nogat sans long go long haiskul na ol bikpela skul na koles, ol i save kamapi, kainkain hevi insait long sosaiti," Sista Maurus i tok.

"Ating long sampela yia bihain, ol trabel na hevi long kantri bai go daun. Na sindaun bai kamap gutpela. Mi stap planti yia long PNG na mi lukim PNG olsem ples tru bilong mi," em i tok. Sista Maurus em i wanpela bilong ol 4-pela Brigidin Sista husat i kirapim Erima skul na peris. Dispela em long 1970. Narapela tripela wanwok bilong Siata Maurus em: Sista Leone Egan, Sista Athanasius Griffiths na Sista Mureen Utner Giuseppe. Tupela bilong ol i stap long Australia na Sista Athanasius i stap wok long Hohola peris long Mosbi.

Sista Maurus i no lus tingting long taim em na sampela yangpela manki bin raun long ol



• Lapun bilong Erima peris, Sista Maurus i sanap wantaim tupela liklik manki long Erima peris.



■ Prenmeri bilong Papa Kanage wok i go na em i pilim olsem bel bilong em i mau olgeta. Bikos olgeta kaikai em i kaikai long moning taim i pinis.

Em nau em i teleponim Kanage na askim Kanage long sautim em sampela kaikai long belo kaikai.

Taim em i ringim Kanage, Kanage hapim telepon na tok olsem: Yes ya, opis bilong Kanage. Inap mi helpim yu?

Prenmeri bilong em harim na ting olsem wanpela arapela man i ansaim telepon. Olsem na em i tok olsem: Yes ya bras. Mi laik toktok wantaim Kanage.

Kanage harim nek bilong prenmeri bilong em na glaman tok olsem: Sori tru, Kanage nau tasol lusim opis na i go long lukim wanpela prenmeri bilong em.

Prenmeri bilong Kanage harim Kanage glaman tok olsem na em i pulim strongpela win stret. Na taim em i laik putim telepon i go daun, Kanage i tok: Yes ya yu tok.

Em nau prenmeri bilong Kanage i save olsem Kanage i glanim em. Na em i bel kaskas na kirap tokim Kanage: Kain pasin bilong yu long glaman tasol na taim mi holim nek bilong em, yu save singaut olsem wanpela grille dok i kros long kaikai wanpela hap bun bilong sipsip.

Joke Master  
MOSBI

□ Kanage i laik go long wok na i go wetim bas i stap long 4 Mail bas stop long Mosbi.

Em sanap wetim bas i stap na lukim wanpela yangpela meri Kawas (Buka) i putim solpela sket, aiglas na wokabout i go long kalap long wanpela bas. Em nau Kanage kirap na tok pilai long dispela meri Kawas olsem: O Kawas! Nau tasol tulait na mi lusim bet bilong mi na mi laik go long wok. Olsem wanem na yu laik bringim tudak i kam hariap. Olsem wanem, bai mipela go long wok o go bek long haus na slip?

Meri Buka ya harim olsem na tokim Kanage: No ken wari tumas. Tudak i go pinis tasol Kawas i bringim san i kam. Yu yet skelim na kisim-tudak o tulait.

Kanage harim meri Buka ya tok olsem na em i tokim em: Mi les long tulait. Mi laikim tudak ya. Long wanem, taim mi slip, mi bai slip inap san i kam antap.

Meri Buka save long mining bilong tok Pisin bilong Kanage na tokim Kanage: Tasol yu mas lukaut. Bikos i nogat lait bilong soim rot long yu.

Kanage lap na tokim dispela meri Buka olsem: No ken wari tumas long lait. Long wanem magnet bilong spika bokis bai kamap olsem wasman sapos i tudak tumas na i no inap skelim rot.

PS Javanieng  
WEWAK

■ Kanage i go raun long Madang taun na wanpela yangpela meri long Wali Kantri (Amele) i lukim em na waia lus stret.

Meri ya mekim i go nogat na wokabout i go stret na tokim Kanage: Farata, mi lukim yu na mi gat fikfela laik seteret long yu.

Kanage em kain mauswara na tokpilai man tu ya. Na tu em i save liklik long kain stail tok Pisin bilong Wali Kantri. Olsem na em i kirap na tokim meri ya olsem: Gutfala asakim folong yu. Tasol mi feret nogut olo lain folong yu fai koros.

Meri ya i no amamas long bekim bilong Kanage. Na em i tokim Kanage: Ain o meiya. Folong wanem yu mekim desela kain tokotok olosem. Fikos desela i fagarfim filings folong mi ologeta.

Wally Oh  
MADANG

# DAVID ANDREW

## David Andrew bilong Vanuatu katim kaset nau

**E**M i kam long Papua Niugini long stat bilong mun Ogas long 1994, bihainim askim bilong Pacific Gold studio. Dispela em bihain long ol i luksave long save bilong em wantaim stail long kamap wantaim saun ensinia bilong musik studio. Wampela yia nau David i no lukim Vanuatu. Na nau em i wampela bekap singa bilong biknem ben Tarikana. Na tu klostu bai wampela kaset bilong David Andrew i kam aut aninit long het tok: "Flash".

Ol manmeri na pikinini husat save kamap long ol laip konset na lukim Tarikana ben i pilai bai lukim David i singsing wantaim John Wong na Patti Doi.

Em i tru olsem planti manmeri na pikinini i lukim dispela yangpela man bilong Vanuatu. Tasol ol i no sve long stori bilong em. Ol poroman bilong David save kolim em 'Flash'.

"Flash em nem bilong ples bilong mi long Tok Inglis," em i tok.

Nem bilong ples bilong David em lauko Ruan Pharlapp - "lauko" em nem bilong wampela seremoni familji ston we long kastom em wampela pikinini bilong olgeta jenereesen i mas kisim nem bihainim. "Ruan Phariap" i min olsem 'bright flash'. Olsem na planti poroman save kolim em Flash.

David Andrew i bin kamap long Pot Vila, biktaun bilong Vanuatu. Em i wampela hapkas pikinini bilong man Inglen, Allan Holton na Helen Kolau bilong Tanna Ailan.

David em i namba wan pikinini man long familji bilong wampela sista na tupela brata. Olsem na em i laik soim gutpela piksa long ol liklik bilong em.

Tasol em i no go long wampela bikpela skul. Em i gat bikpela driman na laik long kamap wampela singa.

Em i wampela hap man bilong singsing. Na i no longtaim em yet i save olsem em i gat gutpela nek bilong singsing. Bikos em i winim resis bilong singsing gut long sampela resis, em i save kamap olgeta yia long Vanuatu.

Driman bilong em long singsing i stat taim em i pinisim hai skul.

Bihain long em i pinisim gred 10, kandre bilong em i askim em long wok long sekyuriti kampani bilong em. Orait David wok olsem wampela sekyuriti wokman. Na sampela poroman bilong em i save pilai long wampela ben ol i kolim Blue Cycle. Ol i askim David

NEVILLE CHOI i raitim



● **David Andrew ... mi save laikim tru long singsing. Olsem na taim mi wok wantaim sekyuriti, mi save yusim wan o wan na hap hua long go singsing wantaim ben na bihain go bek long wok.**

long go pas long singsing long ben, na David i bihainim.

Olsem na bihain long em i pinisim wok, em bai go singsing long ben ya taim ol i pilai long sampela nait klab raun long Vanuatu.

"Mi save laikim tru long singsing. Olsem na taim mi wok olsem sekyuriti, mi save yusim wan o wan na hap hua long go singsing wantaim ben, na bihain go bek long wok," David i tok.

I no longtaim David i gat sans long singsing wantaim wampela ben. Dispela em i namba wan ben we em i stat singsing fultaim wantaim ol.

"Blue Cycle em i namba wan ben mi pilai wantaim. Mipela bai go long sampela nait klab na pilai long hap. Na bai lukim ol bikpela vidio skrin na lukim vidio bilong ol top ben. Na save tingting long singsing insait long ol vidio ya," yangpela man bilong Tanna ailan i tok olsem.

David pilai raun wantaim Blue Cycle na planti manmeri na pikinini long Pot Vila i luk-

save long em. "Mipela save pilaim kainkain musik long reggae na samba rok 'n' rol wantaim ol disko musik. Na taim Barike ben i go pilai long Vanuatu long 1993, David i lukim olsem dispela em i sans bilong em long lainim ol musik we em i no save singim o pilaim. Blue Cycle em biknem ben long Vanuatu. Olsem na taim Barike i pilai raun long Vanuatu, askim i go na Blue Cycle i pilai raun wantaim Barike long ol laip konset.

Long David, Barike em i namba wan ben bilong ausait long pilai long wampela konset we em i lukim long ai bilong em stret. Na taim Barike i pilai long Vanuatu long 1993, em i pilai ekspirians stret long David, na ol arapela musikman meri bilong Vanuatu.

"Taim Barike i kam na pilai raun long Vanuatu, mi tng ol i fit stret," David i tok, "na mi amamas long lukim ol i pilai na pilai raun wantaim ol." David i no save olsem menesa bilong Pacific Gold studio, Greg Seeto bai askim em long kam

tu long Papua Niugini, na trening long kamap wampela saun ensinia.

Taim David i kisim dispela askim, em i no hat long em long mekim disisen. Bikos dispela em i wampela bikpela driman bilong em. Olsem na em i ken lusim Vanuatu isi tasol. Famili i sapotim em, na em i kam long Papua Niugini.

Em i kamap long Papua Niugini long stat bilong mun Ogas long las yia. Na i wok aninit long lukaut bilong John Wong na Patti Doi bilong Tarikana ben long kamap wampela saun ensinia.

"Patti na John i helpim mi gut tru long trening. Na mi kamap gutpela nau long saun ensinering bilong mi," em i tok.

David i kisim skul tu long stretim gut nek bilong em long singsing long wampela bilong sampela tok singa long PNG, John Wong. "John i givim gutpela helpim tru long mi long yusim gut nek long singsing. Wantaim helpim bilong mi, nau mi gat bikpela bilip long ringring," David i tok.

Taim David i kam nupela long kantri, em painim hat long bihainim Tok Pisin bilong PNG. Bikos long Vanuatu, ol i sav tok narapela kain Tok Pisin em ol i kolim "Bislama" Pisin. Tasol bihain long tripela wik, em i lainim pinis Tok Pisin. Na nau em i no moa wampela hevi long em.

Nupela kaset bilong David, "Flash" i gat wampela tok singsing em planti taim i save kamap long EM TV na ol redio stesin. Nem bilong dispela singsing em 'Fantasy'.

Dispela kaset em i wampela projek o trening wok bilong em. Na kaset ya i gat ol musik long stail bilong reggae na Afrika musik wantaim samba na tokples bilong em yet. I gat wampela singsing tu long Tok Pisin, we em yet i raitim wampela helpim bilong Patti Doi.

Dispela bai namba wan kaset bilong David. Sapos ol manmeri i laikim na baim planti, em bai katim moa kaset.

"Dispela em hap wok long trening bilong mi long hia. Sapos kaset i kam aut na salim gut long ol stua, bai mi katim namba tu kaset. Tasol dispela em samting studio yet bai mekim disisen long en," em i tok. David tok taim em pinisim trening long hia, em bai go bek long Vanuatu. Na mekim sampela samting long kirapim bikpela musik bisnis long hap.



# Wok bai kamap long planim diwai long ol maunten long Mosbi

IVAN BAYAGAU i raitim

**P**aks na gadens divisen bilong Nesenel Kapitel Distrik i kamapim wanpela kain prosek we bai lukluk long mekim ol maunten bilong Mosbi siti i luk nais.

Kala bilong mauten insait long Mosbi siti em i braun o bilak em sapos ol man i kukim gras o diwai antap long mauten.

Prosek ya, Bare Hillside Tree Planting (planim diwai long maunten i no gat diwai). Dispela em i wanpela bikpela prosek, NCDC i kamapim long wanpela kempen bilong ol, ol i kolim Grinin Mosbi Siti we i wok long planim ol plaua na diwai long mekim siti i luk nais long ai bilong ol turis na ol narapela lain husat i lukluk raun long Mosbi.

NCDC bai lukluk strong long we bilong lainim ol pipel long lukautim ol diwai na lainim ol na i no ken bagarapim ol diwai olsem katim ol nabaut o kukim ol wantaim paia.

Bare Hillside Tree Planting prosek i gat

wanpela komiti we i gat ol memba husat i kam long ol kain oganaisisen husat i gat kainkain wok long lukautim ol wok long kamapim dispela as bilong prosek. Dispela komiti bai lukluk long we bilong wok wantaim ol lain husat i wokim ol gaden kaikai long dispela maunten insait long siti we i save kamapim graun bruk.

NCDC i bin strongim ol pipel long wokim gaden long baksait long haus bilong ol we tu i bin mekim ol pipel long setelmen long mekim gaden long said bilong ol maunten. Tasol NCDC nau i wok long tambuim dispela ol pipel husat i mekim gaden long maunten bikos planti bilong i save katim ol gutpela diwai bilong bilasim siti na maunten.

Paks na gadens divisen bai kamapim sampela skul long lainim ol pipel long wanem diwai i gutpela long planim long Mosbi we i ken groa long taim bilong san na tu long taim bilong ren na gen ol i bai lainim ol pipel olsem wanem kain

diwai bai kamapim gutpela graun taim yu planim. Ol komiti bai kamapim sampela kain ol tambu bilong graun we ol pipel i mas bihainim we bai ol i kam bek gen long yusim baihain taim.

Ol Bare Hillside Tree Planting prosek komiti i tok olsem em i bai yusim ol grup bilong ol yut, meri, sios na moa yet ol lain niusman na niusmeri long helpim ol salim dispela toktok bilong ol i go long ol grasrut pipel.

NCDC i bin mekim wankain prosek bilong Bare Hillside Tree Planting pinis long namel long Pari na Kilakila viles. Dispela prosek em i bilong traim tasol we bai dispela plen nau NCDC i i kamapim bai wok o nogat.

Bipo long dispela prosek NCDC i bin yusim ol sumatin long mekim dispela kain kempen long taim Yunaitet Nesens i a m a s i m Envairomen De we ol i toktok long ol sumatin long lukautim ol plaua na diwai.

Tasol nau i luk olsem ol i bai go aut na lainim olgeta man na meri long dispela kempein.



• (Antap) Gaden bilong planim ol plaua.

• (Raitan) Gutpela sapot ma i kam long ol pipel long planim plaua arere long haus bilong ol olsem poto ya i soim.



## BIRUA MAN

### MAN LONG GIVIM BIRUA LONG OL RASKAL


DANIEL EMI RAN IGO LONG HAUS BILONG SKAFES...



NA WANPELA MAN EMI HOLIM EN



YU HUSAT?



**12/10**

**EMTV**

5.30 PROGRAM HIGHLIGHTS  
 5.57 TRANSMISSION OPEN  
 6.00 ITN NEWS  
 6.30 DAYBREAK NEWS  
 7.00 TODAY SHOW  
 9.00 TRANSMISSION CLOSE  
 9.01 PROGRAM HIGHLIGHTS  
 1.57 TRANSMISSION RESUME  
 2.00 MIDDAY AT TWO PGR  
 3.00 SESAME STREET  
 4.00 THE BOOK PLACE  
 4.30 MY GENERATION  
 5.00 DAVE'S WORLD  
 5.28 EMTV TOK SAVE  
 5.29 EMTV NEWS BREAK  
 5.30 HOME AWAY  
 6.00 NATIONAL EMTV NEWS  
 6.30 A CURRENT AFFAIR  
 7.00 SALE OF THE CENTURY  
 7.28 LOTTO DRAW  
 7.30 NEIGHBOURS  
 8.00 PEPSI FIZZ  
 An hour of local music ement and update of musical attraction around town.  
 9.00 AUSTRALIAN FUNNIEST HOME VIDEO PGR  
 9.30 PNG TATTS LOTTO  
 9.33 JUST KIDDING  
 10.03 A COUNTRY PRACTICE  
 11.30 NATIONAL EMTV NEWS  
 00.57 MEDITATION  
 01.00 TRANSMISSION CLOSE

**13/10**

**EMTV**

5.30 PROGRAM HIGHLIGHTS  
 5.57 TRANSMISSION OPEN  
 6.00 ITN NEWS G  
 6.30 DAYBREAK NEWS G  
 7.00 TODAY SHOW The best in breakfast television presented by ELIZABETH HAYS & STEVE LIEB-MANN. G  
 9.00 TRANSMISSION CLOSE  
 9.01 PROGRAM HIGHLIGHTS  
 1.57 TRANSMISSION RESUMES  
 2.00 MIDDAY at Two  
 2.54 EMTV TOKSAVE  
 2.57 CHIN H MEEN SUPERSOUND NEW RELEASE  
 3.00 KIDS KONA/SESAME STREET G  
 4.00 THE BOOK PLACE G  
 4.30 MY GENERATION G  
 5.00 HOT SHOTS NEW SERIES G Hot Shots' is sports and activities series for kids that seeks to entertain as well as to develop natural instincts for games and the outdoors.  
 5.27 EMTV TOKSAVE  
 5.29 EMTV NEWS BREAK  
 5.30 HOME & AWAY G  
 6.00 NATIONAL EMTV NEWS  
 National EMTV News followed by international news. G  
 6.30 A CURRENT AFFAIR  
 7.28 LOTTO DRAW  
 7.30 NEIGHBOURS G  
 8.00 PNG GARDNER  
 8.08 MCKENNA Stories and adventures of the McKenna family dramas in America the kind of natural place most urban Americans dream about. Snowcapped peaks. Clear icy streams. Fields of flowers. And the best part out-door adventures.  
 9.08 MOVE: HOSTAGE FOR A DAY  
 Story of four boys who set out on a two day adventure with dreams of becoming town heroes.  
 10.45 EMTV TOK SAVE  
 10.47 CHIN H MEEN SUPERSOUND NEW RELEASE  
 10.50 WALKER, TEXAS RANGER

**14/10**

**EMTV**

11.30 PROGRAM HIGHLIGHTS G  
 12.57 TRANSMISSION OPEN G  
 1.00 WIDE WORLD OF SPORTS  
 Sporting entertainment from Australia and around the world. G  
 5.00 BEYOND 2000: World reports on the latest science and technology.  
 5.55 CHIN H MEEN SUPERSOUND NEW RELEASE  
 6.00 NATIONAL EMTV NEWS G  
 6.30 HEY HEY IT'S SATURDAY with Daryl Somers and the gang of merry men. G  
 8.30 NCDC NEWS: NCDC news from around the city.  
 9.00 KOOL FASHION AWARD  
 9.30 WOPA WORLD CHAMPIONSHIP WRESTLING (INCLUDES PNG TATTS LOTTO AT 9.30 PM)  
 Features World championships wrestling including glittering array of talent such as Ric Flair, Sting, the Nasty Boys, Mean Gene, Okerlund and Bobby "The Brian" Heenan, and the return of Hulk Hogan. G  
 10.15 EMTV TOKSAVE  
 10.18 CHIN H MEEN SUPERSOUND  
 10.21 GILLETTE The best sport programming events in over thirty different sports. An exciting sporting series.  
 10.51 JACK HIGH BOWLS Featuring 10 of the world's best player, and presented from the Harbour Diggers Memorial Club, Sydney. Hosted by Max Walker. G  
 11.51 NATIONAL EMTV NEWS REPLAY  
 11.57 MEDITATION  
 00.00 TRANSMISSION CLOSE

**15/10**

**EMTV**

7.13 PROGRAM HIGHLIGHTS  
 7.47 TRANSMISSION OPEN  
 7.49 CHIT CHAT WITH SIR PAULIAS MATANE G  
 7.54 EMTV TOKSAVE  
 7.57 CHIN H MEEN SUPERSOUND NEW RELEASE  
 8.00 BUSINESS SUNDAY  
 9.00 SUNDAY Public affairs program  
 11.00 MERCANTILE MUTUAL CRICKET NSW VS QLD  
 1.30 1995 WORLD CUP RUGBY LEAGUE AUSTRALIA VS FIJI (HULLERSFIELD)  
 3.30 TBA  
 4.00 SPORTS SUNDAY  
 5.55 CHIN H MEEN SUPERSOUND NEW RELEASE  
 6.00 NATIONAL EMTV NEWS  
 6.30 WONDERFUL WORLD OF DISNEY: 1-hour disney classic for the whole family (new Series)  
 7.30 60 MINUTES:  
 8.30 SING WITH JOY G  
 9.00 SUNDAY NIGHT MOVIE:  
 KARATE KID 1 Teenager is beset by bullies until an unlikely mentor (the Japanese handy-man in his apartment house) teaches him about self-confidence- and karate. Unabashedly old-fashioned, manipulative movie that's a real audience pleaser.  
 10.00 CHIT CHAT WITH PAULIAS MATANE  
 11.00 CHURCHES MAGAZINE  
 11.30 NATIONAL EMTV NEWS REPLAY  
 11.57 MEDITATION  
 00.00 TRANSMISSION CLOSE

**RADIO**

**NAU FM**

06.00am headline News  
 Ricki and Nikki  
 06.30am French Bake Haus  
 Horoscopes  
 06.45am CHM New Local Release  
 07.00am News  
 07.30am Worthless Information  
 07.35am First Investment Finance Ltd. Business Report  
 07.40am Coca Cola Breaker  
 07.00am News  
 08.20am This "Day in History"  
 08.40am Birthday calls  
 09.00am News  
 09.15am Telkom Phone in challenge  
 10.00am News  
 Eli Webb  
 11.00am News  
 11.05am Big Rooster Forty Minute Music Marathon  
 12 Noon News  
 12.15pm CHM New Local Release  
 01.00pm News  
 More Muzac  
 02.00pm News  
 02.05pm 3 from 1 at 2: (3 songs from 1 artist at 2 o'clock).  
 02.30pm Telkom Phone in challenge  
 03.00pm News  
 Kanawi Danomira  
 04.00pm News  
 More Muzac  
 05.00pm News  
 05.05pm Pepsi Top 5 at 5  
 06.00pm News  
 More Muzac  
 07.00pm News  
 H.B. Brew. (The Night Man)  
 07.15pm CHM New Local Release  
 08.00pm News  
 More Muzac  
 12 Midnight News  
 More Muzac until 6 am

**KALANG**

0500 OPENING  
 0505 BREAKFAST  
 0530 MORNING DEVOTION  
 0600 NEWS  
 0630 BIRTHDAY CALLS  
 0700 NATIONAL NEWS  
 0715 SECRET SOUND  
 0730 ON THE SPOT  
 0800 NATIONAL NEWS  
 0805 BREAKFAST (Continued)  
 0900 NEWS  
 0903 TALKBACK RADIO  
 1000 NEWS  
 1003 TALKBACK (continued)  
 1100 NEWS  
 1200 NEWS  
 1205 LUNCHEON  
 1300 NEWS  
 1400 NEWS  
 1403 AFTERNOON MUSIC  
 1500 NEWS  
 1600 NEWS  
 1603 DRIVETIME  
 1700 NEWS  
 1800 NEWS  
 1810 Sports Desk  
 1900 NATIONAL NEWS  
 1905 PNG BANK REPORT  
 2000 NATIONAL NEWS  
 2005 FM CLUB REQUESTS  
 2100 NEWS  
 2103 LATE NIGHT RADIO  
 2200 NEWS  
 2230 TODAY WITH DEREK PRINCE  
 2300 NEWS  
 2303 LATE NIGHT RADIO  
 2400 CLOSE

**16/10**

**EMTV**

5.30 PROGRAM HIGHLIGHTS  
 5.57 TRANSMISSION OPEN  
 6.00 ITN NEWS Up to the minute round up of the latest world news sport and business nformation from Britain's respected International Television News service.  
 6.30 DAYBREAK NEWS Up to the minute round up of Australia's as well as international news.  
 7.00 TODAY SHOW The best in breakfast television presented by ELIZABETH HAYES & STEVE LIEBMAN  
 9.00 SESAME STREET  
 10.00 KISIM SAVE: ANIMAL VEG-ETABLE MINERAL  
 10.30 TRANSMISSION CLOSE  
 1.57 TRANSMISSION RESUME  
 2.00 MIDDAY AT TWO A pacy one-hour show, packed with entertainment and information featuring a combination of taped stories and studio guests. Hosted by TRACY GRIMSHAW and DAVID REYNE.  
 3.00 KIDS KONE/SESAME STREET  
 4.00 THE BOOK PLACE  
 4.30 HOT SCIENCE REPEAT  
 5.00 WONDER WORLD  
 5.28 EMTV TOK SAVE  
 5.29 EMTV NEWS BREAK  
 5.30 HOME AND AWAY  
 6.00 NATIONAL EMTV NEWS  
 6.30 A CURRENT AFFAIR  
 7.00 SALE OF THE CENTURY  
 7.30 LOTTO DRAW  
 7.32 CHIN H MEEN SUPERSOUND NEW RELEASE  
 7.35 NEIGHBOURS  
 8.05 FISH INTERNATIONAL G  
 8.35 WALKER TEXAS RANGER: PRODIGAL SON  
 9.33 CHIN H MEEN SUPERSOUND NEW RELEASE  
 9.35 THE MAN FROM THE SNOWY RIVER: THE HOSTAGE Western saga, based on epic Australian poem.

**17/10**

**EMTV**

5.30 PROGRAM HIGHLIGHTS  
 5.57 TRANSMISSION OPEN  
 6.00 ITN NEWS  
 6.30 DAYBREAK NEWS  
 7.00 TODAY SHOW G  
 9.00 TRANSMISSION CLOSE  
 9.01 PROGRAM HIGHLIGHTS  
 1.57 TRANSMISSION RESUME  
 2.00 MIDDAY AT TWO a pacy one hour show, packed with entertainment and information featuring a combination of taped stories and studio guests. hosted by Tracy Grimshaw and David Reyne.  
 3.00 SEASAME STREET  
 4.00 THE BOOK PLACE  
 4.30 HOT SCIENCE  
 5.00 WONDERWORLD  
 5.28 EMTV TOK SAVE  
 5.29 EMTV NEWS BREAK  
 5.30 HOME AND AWAY  
 6.00 NATIONAL EMTV NEWS  
 6.30 A CURRENT AFFAIR  
 7.00 SALE OF THE CENTURY  
 7.33 CHIN H MEEN SUPERSOUND NEW RELEASE  
 735 NEIGHBOURS  
 8.04 COLD POWER CASH CALL DRAW  
 8.05 BORAL GAS HOMEAKER'S SHOW Homemaker's show gives you handy hints on sewing, crafts, health and nutrition as well as product demonstrations from electrical goods to beauty products.  
 8.35 BLUE HEELER police drama with a difference set in a small country town.  
 9.33 EMTV TOK SAVE  
 9.35 RESCUE 911  
 10.35 YOUNG DOCTORS  
 11.35 NATIONAL EMTV NEWS REPLAY  
 11.57 MEDITATION  
 00.00 TRANSMISSION

**18/10**

**EMTV**

5.30 PROGRAM HIGHLIGHTS  
 5.57 TRANSMISSION OPEN  
 6.00 ITN NEWS  
 6.30 DAYBREAK NEWS  
 7.00 TODAY SHOW  
 9.00 TRANSMISSION CLOSE  
 9.01 PROGRAM HIGHLIGHTS  
 11.57 TRANSMISSION RESUME  
 12.00 KISIM SAVE A series of science programmes aimed at students from grade 7-12. Rpt  
 12.30 TRANSMISSION CLOSE  
 1.27 TRANSMISSION RESUME  
 1.30 BORAL GAS HOMEAKER'S SHOW  
 2.00 MIDDAY AT TWO  
 3.00 SESAME STREET  
 4.00 THE BOOK PLACE  
 4.30 MY GENERATION  
 5.00 DAVE'S WORLD  
 5.28 EMTV TOK SAVE  
 5.29 EMTV NEWS BREAK  
 5.30 HOME AWAY  
 6.00 NATIONAL EMTV NEWS  
 6.30 A CURRENT AFFAIR  
 7.00 SALE OF THE CENTURY  
 7.30 NEIGHBOURS G  
 8.00 GOLDEN MEKIM MUSIC  
 9.00 PNG GARDNER  
 9.08 MOVIE: KARATE KID II  
 10.57 EM-TV TOK SAVE  
 11.00 A COUNTRY PRACTISE  
 00.00 NATIONAL EMTV NEWS  
 00.27 MEDITATION  
 00.30 TRANSMISSION CLOSE

**HBO Wednesday**

8.00 KING DAVID Richard Gere, Edward Woodward. Richard Gere plays the humble shepherd boy who battles the giant Goliath and later becomes king of Israel in this Biblical epic directed by Bruce Beresford (Driving Miss Daisy). With a strong performance from Woodward as the deposed King Saul, and visually stunning cinematography.  
 10.00 TALES FROM THE CRYPTKEEPER 01: WHILE THE CAT'S AWAY Two brothers, Dwight and Stu are willing to do anything to come up tlwth the money for a new dirt bike ... including stealing. When they learn that the eccentric owner of a nearby estate is leaving for vacation, they decide to sneak into his house and swipe a few valuables. Little do they know what's in store for them. Will being pursued by werewolves, zombies and vampires be enough to teach the kids a valuable lesson - that crime doesn't pay?  
 10.30 INTO THE HOMETLAND Powers Boothe, C. Thomas Howell. Jackson Swallow's daughter is missing, and the ex-cop is determined to find her. Her trail leads him to the National Liberation Movement, a radical white supremacist group operating in America's heartland. Powers Boothe stars as the desperate father, who infiltrates the N.L.M.'s headquarters to get close to its charismatic leader (Paul LeMat), the only man who knows where the 17-year-old girl is now. There he finds an unexpected ally, the man's son (Howell, Curiosity Kills), torn between loyalty to his father and his love for Swallow's daughter.  
 12.30 BURIED ON SUNDAY Paul Gross, Denise Vireux. It's People Power the Canadian way in this comedy that has been described as "a sly and witty political provocation" (The Hollywood Reporter). Once upon a time on an island called Solomon Gundy, there was a tiny village where the inhabitants or the Small People were fishermen. One day, the Big People in Ottawa decided that the Small People are not allowed to fish anymore. They thought the Small People were wasting the country's resources. But the fishermen were brave and their Wise Man told them that they could break away from the country. They also found a secret weapon that could destroy the land that the Big People live on. Will the country survive the coming doom and will the Small People live happily ever after? And the moral of the story is ....?  
 2.00 MIDNIGHT ORCHID

# Hangre long mumut i kilim lapun meri



DISPELA stori tumbuna i kam long ples Yasubi long Okapa insait long Isten Hailans provins.

Em i stori bilong ples Yasubi yet we wanpela lapun meri i bin stap. Tasol em i dai taim em i painim mumut long wanpela maunten. Olgeta pipel bilong ples Yasubi i save long dispela stori.

Ples Yasubi i stap aninit long as bilong wanpela bikpela maunten. Nem bilong dispela maunten em Yasonandi.

Na antap long het bilong Maunten Yasonandi wanpela man tasol i save stap.

Dispela man i bilong ples Yasubi. Tasol em i les long stap wantaim ol arapela pipel. Olsem na em i ranawe i go stap bilong em yet antap long het bilong Maunten Yasonandi.

Het bilong dispela maunten i gat wanpela longpela limbum tru. Na klostu long dispela limbum i gat wanpela traipela mama bilong hul. Long dispela hul i gat wanpela masalai nogut i save stap insait.

Wanpela taim kaikai i pinis long haus bilong man stap antap long maunten. Em i pilim les tru long painim abus. Orait, wanpela tingting i kamap long em kukim ol kunai gras arere long maunten. Bai ol mumut i ranawe i kam ausait na bai em i kilim isi tasol.

Em i mekim paialong wanpela sait bilong maunten. Olgeta hap arere long maunten, kunai gras tasol i pulap.

Olsem na bikpela paia tru i kamap. Win tu i kamap strong na paia i ran olsem wanpela smol balus stret.

Long ples Yasubi olgeta man na meri i go pinis long bikbus. Foapela yangpela meri tasol i bin kisim sik bilong meri. Na ol tasol i bin stap long ples long dispela de.

Man, ol i lukim smol bilong dispela paia antap long het bilong maunten na i kalap nogut tru.

Ol i no tingting moa long stap insait long

haus. Ol i lusim haus na i kam ausait.

Olgeta i kisim tingting nau olsem dispela em gupela sans stret bilong painim ol mumut bilong kunai.

Bikos ol manmeri long ples i tambuim ol long kaikai. Olsem na ol i hangre nogut tru.

Ol i kisim bilum bilong na givim sisti i go long hap paia i kamap long en. Na painim mumut i go antap long het bilong dispela maunten.

Ol foapela meri i no save olsem wanpela lapun meri i bin stap tu long ples long dispela de. Lapun ya i lukim paia na i kisim wankain tingting olsem ol yangpela meri ya.

Na em i stat painim mumut long narapela sait bilong maunten em hul i stap long en.

Foapela meri ya i no tingting long sem sapos ol manmeri long ples i lukim ol. Ol i putim het i go daun na mekimsave long putim was long ol mumut i ranawe long kunai i kam ausait. Man ol i mekim save stret long planti mumut.

Na tarangu lapun meri ya i painim mumut i go na kamap long dispela hul.

Dispela hul em ol kunai arere long en i no paia gut. Olsem na em i

krungutim na liklik taim em pundaun i go daun long hul ya.

Tasol laki tru sampela kunai gras i stap arere long hul em paia i no kukim gut. Olsem na em i holim strong long ol dispela kunai gras na singaut long helpim.

Tasol nois bilong paia i mekim na 4-pela meri i no harim em. Tarangu em i mekimsave long holim strong long ol gras kunai na kam ausait.

Dispela taim em masalai nogut bilong maunten i lukim em pinis. Isi tasol em i kirap na winim win bilong em.

Man bikpela win i kirap na planim lapun meri i go antap long het bilong maunten. Na i go antap olgeta long longpela limbum ya.

Win ya strong tru. Olsem na i paitim lapun meri strong long limbum na em i pas i stap.

Tarangu em i hangamap antap long dispela limbum na singaut i stap. Dispela taim 4-pela meri ya i harim singaut bilong em. Na givim sisti i go antap long het bilong maunten.

Man, ol i kalap nogut stret long lukim lapun meri i pas antap long limbum.

Ol i singaut na kraik wantaim aninit long as bilong limbum i stap. Na man ya husat i mekim dispela paia i harim kraik bilong ol.

Em spit i kam na bungim dispela 4-pela meri. Ol i soim em long lapun meri antap long limbum. Na em i givim sisti i go antap.

Em i kamap klostu long lapun meri na lukim olsem em i hap dai. Isi tasol lapun man i putim lapun meri ya antap long solda na karim em i go daun.

Tarangu taim em i kamap long graun lapun meri ya i dai pinis.

Ol i wari nogut tru na karim bodi bilong lapun meri i go bek long ples.

Dispela nait olgeta pipel i kam bung na kraik nogut tru. Bihain long moning ol i planim bodi bilong em na holim bikpela pati tru.

Ol i kilim 6-pela bikpela pik na singautim olgeta manmeri wantaim pikinini i kam bung. Ol i kaikaim mit bilong ol dispela pik na singsing i go inap tulait.

Em tasol stori bilong mi.

Tasalit Meuzo,  
PNG CCRI,  
P.O. Box 1846,  
RABAUL



□ Kanage wok olsem haus boi long wanpela waitman. Nem bilong dispela waitman em Richard.

Wanpela taim Richard i go aut na Kanage wanpela wok long haus i stap. I no longtaim, poro bilong Richard ring i kam, na Kanage ansarim telipon. Waitman i askim, "Is Richard home?" Kanage i no save harim gut toktok long Tok Inglis. Em paul olgeta na bekim olsem, "Lizard i no stap". Waitman ya i belhat na tok olsem, "Am I talking to a human being or a reptile?" Kanage kirap na bekim, "Em nau, Rafeil tu i no stap".

Waitman ya belhat olgeta na putim telipon i go daun.

Noel Warren  
TABUBIL

■ Kanage i bilong wanpela ples long Angoram distrik. Man em i wanpela paul manki bilong mekim ol paul raun stret long olgeta hap kona bilong PS Kantri. Tasol nau em i save stap long Wewak. Yu save, tude insait long Is Sepik, i gat kainkain pes bilong Sepik, pes olsem bilong hailans, Buka, Kerema, hailans, Papua, Tolai na sampela moa. Sapos yu lukim ol, bai yu ting ol bilong dispela hap. Tasol nogat tru, em ol pes bilong Sepik stret ya.

Orait, wanpela taim Kanage go raun long taun long baim sampela rop bilong mekim yoyo. Em go pastaim long maket na baim sampela buai bilong spetim na kam bek. Em bungim stret wanpela pes bilong Buka long fran bilong Tang Mow supamakot. Buka ya kirap na askim Kanage, "Yu bilong we?" Kanage bekim olsem em bilong Sepik.

Tasol Buka man i strong yet olsem Kanage em wantok bilong em. "Yu maski long pilai poli na giaman nabaut? Yu no luk olsem ol Sepik, na tu Tok Pisin bilong yu i no olsem ol Sepik? Yu maski long giaman nabaut!"

Man taim Kanage harim olsem Buka ya i laik strongim sait bilong kanage olsem em i bilong Buka, Kanage kilim skin stret long lap. Sem taim kanage tanim na lukluk i go long hapsait bilong rot na lukim tupela poro bilong em i lukim wanem samting i kamap, na tupela tu i klinim skin stet long lap. Bikos Kanage i save pinis olsem Buka ya i paul long blakpela skin bilong em.

Buka ya lukim Kanage i lap yet na em tokim Kanage: "Em i orait, "Yu strongim sait bilong yu olsem yu bilong Sepik ya. Sapos mi lukim ol Sepik i paitim yu, yu tngbai mi helpim yu?"

Kornz D. Hazza  
KIMBE

□ Kanage i bilong PS Kantri. Em save wok long wanpela didiman stua long Kundiawa, Simbu. Wanpela Sarere, premeri bilong Kanage kam painim em long Kundiawa taun. Orait tupela go limlimbur long Kerowagi taun. Tupela raun i go na sindaun arere long wara Koronige.

Tupela stori i go na Kanage askim meri Silku long waswas long kolwara bilong meri Silku. Tasol meri Silku kirap na tokples long Kanage olsem, "Kondo!"

Kanage i no save long tokples na em paul olgeta. Em ting meri Simbu i kolim nem "condom". Olsem na Kanage i tokim premeri bilong em, "Ho sori tru, mi lusim tingting ya. Moning mi rausim wanpela long bokis bilong em long karim i kam tasol mi lus tingting na putim antap long tebol. Bai nogat nau!"

Taim premeri bilong Kanage harim olsem, em kilim skin long lap na tokim Kanage, "Bos o kain bilog yu ya!"

Bomai Gan  
CIS Kerevat

## Meri les long maritim boi long ples



### Dia LAIPLAIN,

Mi gat wanpela boipren, husat i bilong narapela provins. Mitupela i gat bikpela laik long mitupela yet. Boi ya i gutpela, na save mekim gutpela pasin long mi.

Mi no tokim papamama bilong mi yet long dispela boi. Tasol long sampela wik i go pinis, papamama bilong narapela boi i askim papamama bilong mi, sapos mi ken maritim pikinini man bilong ol. Man ya i bilong eria bilong mi yet.

Mi tok "nogat". Bikos mi no laik maritim wanpela man em mi no laikim o lavim. Ol papamama bilong mi i wari long dispela na belhat long mi.

Mi laik tokim papamama long boi ya em mi laik maritim. Tasol mi sem long tokim ol. Mi tingting long raitim pas i go na tokim papamama long tingting na laik bilong mi. Tasol mi sem yet.

Bai mi mekim wanem long bungim papamama bilong mi na tokim tupela?

FRIGHTENED DAUGHTER

### Dia PREN,

Mipela save long yu painim hat long tokim papamama long boipren em yu gat bikpela laik long mairitim. Dispela em bihain long yu les long maritim wanpela boi long ples, em papamama i laikim.

Plantu yangpela manmeri long Papua Niugini i gat wankain hevi. Bikos ol i lusim pasin bilong taim tumbuna long mairitim man o meri em papamama i makim na oraitim. Na painim man o meri ol yet na maritim.

Yu save pinis olsem yu mas tokim papamama long tingting bilong yu.

Papamama bai painim hat long welkamim dispela nius yu givim tupela. Tasol tupela bai wari na belhat moa sapos yu

haitim yet dispela samting o laik na tingting bilong yu long tupela.

Ol papamama, tupela bai gat lav na laikim yu long painim gutpela sindaun na amamas long bihain taim. Na bai givim yu gutpela skul taim yu plenim bihain taim bilong yu.

Em bai gutpela aidia long yu save gut long tingting bilong boipren bilong yu. Yu save tru olsem boi ya laikim yu kamap meri bilong em, o em laikim yutupela kamap pren tasol?

Boi ya bai gat laik long go long ples na lukim papamama bilong yu, o em i les long lukim ol?

Tingim yu pasin bilong papamama bilong dispela boipren. Ol i laikim yu tu o nogat? Ol bai laikim yu long stap wantaim ol

sapos yu maritim pikinini man bilong ol? Em bai gutpela long bihain taim bilong yu, sapos olgeta dispela pipel i amamas na sapotim yu na boipren long maritim.


Sapos pasin bilong baim meri i stap yet long ples bilong yu, bai famili bilong boipren i redi long baim yu? Sapos askim long dispela i yes, yu ting dispela inap mekim papamama bilong yu i yesa long laik na tingting bilong yu?

Mipela ting em i moa gutpela long yu autim tingting bilong yu long anpela anti o sampela memba bilong famili, husat i ken helpim long tokim papamama long tingting na laik bilong yu long maritim boipren bilong yu.


LAIPLAIN

### TOKSAVE:

Salim ol hevi na wari bilong yu i kam long Laiplain, PO Box 6047, Boroko. Yu ken ringim mipela tu long telipon namba 26 0011. Mipela i no inap autim trupela nem bilong yu long hia. Tasol taim yu rait long Laiplain, yu mas putim trupela nem na adres bilong yu, bai mipela ken bekim pas bilong yu.



# Big Bro **REBO**




# Spak **MAIK**



# CITY PHARMACY


## THE 1<sup>st</sup> SALE



**Cool Charm Roll-On Fresh Musk**  
Buy 1 for **K3.10**  
Buy 2 for **K3.11**





**Earrings**  
Buy 1 for **K1.99**  
Buy 2 for **K2.00**



**Sinan Perfume**  
Buy 1 for **K13.50**  
Buy 2 for **K13.51**

**Solozones 100ml**  
Buy 1 for **K9.50**  
Buy 2 for **K9.51**




**Walker with Toys**  
Buy 1 for **K44.50**  
Buy 2 for **K44.51**



**Walkman**  
Buy 1 for **K16.50**  
Buy 2 for **K16.51**



**City Pharmacy Wallet**  
Buy 1 for **K2.75**  
Buy 2 for **K2.76**



**Boy Doll**  
Buy 1 for **K24.50**  
Buy 2 for **K24.51**




**Mesh Wallet**  
Buy 1 for **K14.50**  
Buy 2 for **K14.51**



**City Pharmacy Sunglasses**  
Buy 1 for **K6.50**  
Buy 2 for **K6.51**

**BUY 1 ITEM AT NORMAL PRICE AND GET A SECOND 1 FOR JUST 1<sup>st</sup> EXTRA**

### PLUS MANY MORE BARGAINS



**Sapoderm Soap**  
was **K1.40**  
**89t**



**Topline Hair Gel**  
was **K5.40**  
**K2.99**



**Camera Fetana**  
was **K42.95**  
**K29.95**



**Photoframe sml unboxed**  
was **K2.95**  
**K1.99**

Great Prices... Good Health  
**CITY PHARMACY**  
NATIONWIDE

# Kisim moa soldia PMV fe kirapim belhat na plisman

**Dia Edita,**

Mi gat bikpela wari nau na mi laik autim. Gavman bilong mipela i mas kisim moa ami na plisman. Kantri bilong yumi i no inap tru long ol ami na tu long ol plisman.

Mi save ritim nius bilong arapela kantri we ol i save pait na mi tingim bek long kantri bilong yumi.

Yumi kisim independens pinis na yumi mas sanap strong long wok bilong militeri na plis fos long givim inap menpawa.

Nau yumi gat planti bikhet pasin bilong ol raskel lain insat long kantri. Na gavman i traim long yusim kain kain rot long pinisim dispela hevi bilong lo na oda tasol i hat moa yet. Bikos rupela lain bai i go aut na mekim bikhet pasin yet.

Mi ting ol lida bilong mipela long palamen i mas yusim het bilong ol na traim toktok strong long kisim moa soldia na plisman. Dispela inap daunim namba bilong ol raskel na bikhet pasin insait long kantri.

Mi save olsem ol dispela raskel manki em ol skul manki tasol i no gat wok olsem na ol i tanim bek long pasin raskel na bikhet.

Ol i pinisim gret 10 na sampela i pinisim gret 12 na Yunivesiti tasol no gat wok bilong ol i mekim. Olsem na gutpela tingting em tromoi olgeta i go insait long wok bilong ami na plis fos.

Em tasol tingting bilong mi na husat arapela i laik putim moa tingting antap em laik tasol.

**John Kapil  
BANZ**

## Ol yangpela pulap long bikhet pasin

**Dia Edita,**

Mi save stap klostu long ples Gabsongkeg klostu long Nazdab ples balus.

Mi no amamas long pasin we ol Malamumu Luteran Yut grup bilong Gabsongkeg i save mekim long mekim bikpela nois na bagarapim ol arapela pipel husat i stap klostu long ol.

Ol lain manki ya i save spak, singaut na tok nogut nabaut long olgeta man long harim. Ol i no save haitim spak na bikhet pasin bilong ol. Ol bai singaut na bikmaus na mekim bikpela nois moa we olgeta manmeri long ples bai harim na i no inap slip long nait.

Ol no save isi long wokim pasin pamuk na kisim pikinini nating wantaim nogat papa long ol. Planti long mipela i les pinis long kain pasin bilong ol we i save stat long Fraide i go inap long Sande.

Dispela pasin bikhet i kamap bikpela nau na i hat long stapim. Ol bikman long ples tu i no gat inap pawa nau long stapim dispela kain

bikhet pasin bilong ol yangpela. Ol yangpela i winim ol bikman nau wantaim ol dispela bikhet pasin.

Long Sande ol lain ya i save bilas gut, karim Baibel na go lotu. Mi tokim ol lain ya olsem ol ino kamap tru ya. Ol i save kamap ol giaman skin nating kristen long Sande.

Mi lukim dispela kain giaman pasin long taim bilong lotu na mi save sem long lukim bikos taim lotu i pinis, ol bai go bek long wankain bikhet pasin bilong ol gen.

Ol dispela yut o yangpela manki i bagarapim tru gutpela nem na gutpela sindaun bilong ples. Ol liklik manki long bihain tu i wok long lukim kain pasin bilong ol na i wok long bihainim nau.

Mi ting wanpela bikpela traim i mas kamap long dispela ples bai olgeta manmeri ya i ken lukim na senisim ol deti pasin bilong ol ya.

**Fiang Mirijog  
Lae  
Morobe provins.**

## Ol lida tu i brukim lo na oda

**Dia Edita,**

Mi laik autim belhevi na wari bilong mi long ol memba long palamen na ol plisman long wanpela samting mi lukim ino gutpela long tingting bilong mi. Tasol pastaim mi go het wantaim komplek bilong mi, mi laik putimaut wanpela askim i go long ol bikman na tu long pablik.

Lo na oda i kam we?

Mi putimaut dispela askim bikos long sampela taim i go pinis, mi ritim long niuspepa olsem ol plisman i holim pasim sampela Yunivesiti sumatin long ritim ol pilai boi megesin o buk nogut i gat ol piksa nogut long en.

Long Tabubil tu, ol plis i bin holim pasim na sasim K300 fain sampela man long ritim na lukluk long pilai boi megesin. (Pilai boi megesin em i wanpela niuspepa we i gat ol nogut piksa long em) Wanpela samting tu em ol plis i mas kukim ol dispela megesin buk bihain long ol i kisim long han bilong ol man.

Orait, poin we mi laik mekim em sampela ol bikman long palamen i save mekim na lukim ol blu muvi na nogut bilong yupela yet.

Na tu sampela long yupela ol bikman i gat ol pilai boi megesin we yupela yet i lukim.

Mi yet long wanpela taim i bin lukim wanpela megesin nogut we i gat wanpela meri em i sindaun as nating na aninit ol i raitim Manus Dram long en.

Sapos em i tru yupela sampela ol bikman long palamen i gat ol dispela kain nogut megesin na piksa, em ino stret o gutpela long holim pasim na sasim ol sumatin na ol arapela man na abrusim ol politisen.

Aplaim lo long olgeta man bikos i nogat narakapim long bilong ol man nating na narakapim bilong ol bikman.

**Maris Dobi  
Ok Tedi-Tabubil  
Western provins.****Dia Edita,**

Mi wanpela grasrut manki husat i gat wanpela komplek long pe bilong ol PMV ka.

Mi no amamas long papa bilong ol PMV ka long dispela pasin ol i wokim long apim pe bilong ol PMV ka i go antap olgeta taim.

Yupela i save olsem planti bilong mipela ol manmeri i no gat we long kisim mani long em. Mipela i save go long maket long salim ol kaikai bilong salim na kisim liklik mani bilong baim ol

kaikai na samting. Maket em wanpela rot tasol we mipela asples i save kisim strong long en.

Na pasin we yupela ol PMV ka i mekim long apim pe long bas na ka fi i givim hevi tru long mipela.

Samting we yupela i wokim tu i strongim ol grasrut manki long kirapim strong gen ol raskel pasin. Yupela i save olsem sampela long mipela ol grasrut i save hensapim ka na ol PMV bilong

yupela. Yupela yet i skelim dispela em asua bilong husat.

Yupela sasim moa mani long ol yangpela, ol bai belhat na stapim yupela long rot gen long kisim bek mani bilong ol.

Husat brata na susa i sapotim o egensim dispela pas, rait i kam long Wantok Niuspepa na mi bai amamas long lukim.

**Griky Mangana  
Lae  
Morobe provins.**

## Memba bilong Aitape Lumi mas tokaut

**Dia Edita,**

Mi makim ol pipal bilong Aitape/Lumi ilektret na olsem mi laik autim wari bilong ol i go long memba bilong mipela husat tu i minista bilong plis long nesanel gavman, Paul Mambei.

Mi askim Minista Mambei long tokaut nau long ol pipel bilong Aitape/Lumi olsem husat tru i papa long wanpela hino trak ol i kolim long Alasi Trencpot. Narapela samting tu we mipela i laik yu kiarim long mipela em husat tru i papa long wanpela kampani long Wewak ol i kolim long MAPS. Mipela i laik yu tok klia long mipela sapos trak ya na kamapani MAPS em i bilong ol Alasi pipel o long Mambei famili. Long nau, MAPS kampani i gat wanpela buldosa trak na greda.

Mi raitim pas long kisim ol tok klia bikos ibin gat bikpela pait na kros i kamap namel long lain bilong Mista Mambei na ol arapela pipel long trak na kampani ya.

**John Wilai  
Lumi  
Sandaun provins.**

## Vot i nogat pe long en

**Dia Edita,**

Mi no amamas long pasin we sampela lain bilong Lufa i mekim long votim ol memba bikos bihain ol bai askim long kisim ol mani bilong baim ol spot yunifom, ol sponsa nabaut na arapela wok projek nabaut.

Yupela i tingting tasol long nau na ino long tumora na mekim dispela. Yu putim dispela man i go long palamen, em i samting bilong yu. Sapos man ya i no inapim laik bilong yupela, em i leit pinis long yu long wari. Man ya ino inap lukluk long yu bikos em i winim sia. Asua i stap long yu yet.

Nau mi laik tokim yupela ol manmeri bilong Lufa eria olsem 1997 nesanel ileksen i kam klostu na memba olsem Mathias Karani em i gutpela man husat i helpim long kamapim sampela developmen long ilektret na ol pipel bilong em.

Olsem na mi askim yupela ol pipel bilong Lufa long holim bek Mista Karani na maski long kendidet i peim kempein long mani. Lukluk gut sapos man i mauswara o ones man. Yupela inoken pasim ai na vot.

Mi tok rijonal memba bilong yumi bai i lusim sia i go long narapela husat i moa ones na inap long kisim sevis i kam long ol pipel bilong em long ples.

Husat i gat sampela toktok long dispela samting, rait ikam tasol long Wantok Niuspepa na mi bai amamas tasol long lukim.

**B. Itude Karive  
Mosbi.****NEM:** Jay Johannes**KRISMAS:** 20 (man)**ADRES:** Tigidu Komyuniti Skul, PO Box 115, Finsafen, Morobe provins.**LAIKIM:** Pilai soka, basketbal, tok pilai wantaim ol pren, raitim pas na harim ol PNG musik**NEM:** Jerom Yaku**KRISMAS:** 18 (man)**ADRES:** Aitape Vokesenel Trening Skul, PO Box 34, Aitape, Sandaun provins**LAIKIM:** Pilai soka, lukim TV, harim radio, go waswas long solwara na raun wantaim ol pren na raitim pas.**NEM:** Pauline Sapan**KRISMAS:** 19 (meri)**ADRES:** c/ Rosemary Kramer, Bush Development, PO Box 1134, Madang prov.**LAIKIM:** Pilai soka, kukim kaikai, go lotu, mekim penpren, wok lokng haus na slip long san.**NEM:** Zuxy Apa**KRISMAS:** 15 (meri)**ADRES:** Kerowagi High School, PO Box 70, Kundiawa, Simbu province.**LAIKIM:** Ritim buk, pilai volibal na basketbal na harim musik.**NEM:** Judy Waim**KRISMAS:** 15 (meri)**ADRES:** Kerowagi High School, PO Box 70, Kundiawa, Simbu province**LAIKIM:** Tok pilai, ritimbuk, pilai soka na harim ol pop musik.**NEM:** Elice Fabian**KRISMAS:** 15 (meri)**ADRES:** Kerowagi High School, PO Box 70, Kundiawa, Simbu province.**LAIKIM:** Danis, harim musik, harim stori na ritim buk.

Mipela ol tripela meri long Buka i laikim penpren long olgeta hap bilong PNG na tu long ovasis. Hia em nem na edres bilong mipela.

1. Devlyne Magdelen (20), laikim long pilai volibal, go lotu, raitim pas, go danis na waswas long solwara.

2. Lucy July (27) laikim long pilai volibal, huk long solwara, go lotu, harim musik, danis na raitim pas.

3. Christine Judy (23) laikim long go hukim pis, wok gaden, go danis, pilai spot na raitim pas.

**ADRES:** Yotchibol Village, c/ Tungol Parish, Nissan Island, P.M.B. Buka, North Solomon Province.

**NEM:** Steven Simeon**KRISMAS:** 16 (man)**ADRES:** Telefomim High School, Sandaun province.**LAIKIM:** Ritim buk, pilai ragbi tas, lukim TV na harim musik.**NEM:** John Siking**KRISMAS:** 22 (man)**ADRES:** WTB Co, Pty Ltd, Western Enterprise, PO Box 195, Kiunga, Western Province.**LAIKIM:** Ritim buk, raitim pas, go raun na harim gospel musik na ol pop musik na pilai spot.

## Tok bilong Baibel i we?

**Dia Edita,**

Mi laik autim pasin we ol wokman bilong Luteran Sios insait long Wantoat sekot na Matap peris i save mekim. Jisas i kam daun long graun na indai bilong bekim sin bilong mipela olgeta man long wol. Long Baibel em i no tok long yu husat

brata o susa long rausim ol wok manmeri husat i wokim sin. Tasol i tok long stretim husat brata na susa i wokim sin.

Tasol mi save lukim olsem ol wok manmeri bilong Matap peris in o sori lusim sin bilong husat i wokim rong long ol. Ol i save kamap jas na skelim man we ol i ting em i wokim rong pasin. Yumi save pulap tru long tok bilong bikpela olgeta taim long maus bilong ol pasto na wokman bilong sios.

Yumi no nupela long dispela tok bilong givim bel na laikim arapela dispela

soim tu olsem ol toktok bilong baibel yumi save harim i nogat mining bilong em long laik bilong yumi. Yumi harim long narapela ia na i go long narapela ia.

Yumi save kisim holi komunjon na waswas long wara na holi spiriti long taim bilong baptais. Yumi kisim blessing long konfemesen. Tasol yumi haitim ol dispela blessing na go het yet long pasin bilong tudak. Laikim arapela brata na susa i no stap long bel bilong yumi.

**Zibot Togon Wantoat  
Morobe provins.**

# Go bek long ples na mekim wok

## Dia Edita,

Mi laik autim komplek bilong mi i go long pasin olgeta manmeri i wok long mekim tude long olgeta hap ples graun long pasin bilong askim mani long arapela manmeri long taun.

Taim ol manmeri i laik go long stua long baim kaikai na ol samting, sampela lain i save was long ol manmeri olsem. Taim ol i lukim ol i baim planti kaikai na samting, ol i save ting olsem ol na i gat planti mani olsem ol na i go na askim ol long 20 toea o K1.00.

Dispela pasin i wok long kamap bikpela long olgeta taun

we ol dispela kain lain i save i gat mani long poket bilong ol bikos long dispela askim pasin bilong ol arere long stua.

Mi yet i bin bungim dispela kain pasin we sampela man olsem i askim mi long dua bilong stua long 20 toea. Bihain gen ol i askim mi long K1 o K2. Mi lukim ol na mi tokim ol stret olsem mi no inap givim mani long ol.

Mi giaman toktok hat na olgeta manmeri i harim olsem na ol i sem na wokabaut i go longwe na sanap i stap.

Mi lukim dispela em wanpela rabis pasin tru. Olsem na mi askim ol sekyuriti bilong stua

long was long ol dispela kain man na rausim ol long fran bilong stua bilong yupela.

Bikos em ol i pretim ol kastoma long go insait long stua na baim ol kaikai na samting.

Mi askim tu yupela ol dispela kain manki long lusim dispela pasin na go bek long ples. Mekim sampela gutpela wok bai yu ken i gat mani long poket bilong yu.

Em tasol komplek bilong mi na husat arapela i laik joinim antap em laik tasol.

**Geng Tau LAE**

# Ol yangpela abrusim pawa

## Dia Edita,

Mi save stap klostu long ples Gabsongkeg klostu long Nazdab ples balus.

Mi no amamas long pasin we ol Malamumu Luteran Yut grup bilong Gabsongkeg i save mekim long mekim bikpela nois na bagarapim ol arapela pipel husat i stap klostu long ol.

Ol lain manki ya i save spak, singaut na tok nogut nabaut long olgeta man long harim. Ol i no save haitim spak na bikhet pasin bilong ol. Ol bai singaut na bikmaus na mekim bikpela nois moa we olgeta manmeri long ples bai harim na i no inap slip gut long nait.

Ol no save isi long wokim pasin pamuk na kisim pikinini nating wantaim nogat papa long ol. Planti long mipela i les pinis long kain pasin bilong ol we i save stat long Fraide i go inap long Sande.

Dispela pasin bikhet i kamap bikpela nau na i hat long stapim. Ol bikman long ples tu i no gat inap pawa nau long stapim dispela kain

bikhet pasin bilong ol yangpela. Ol yangpela i winim ol bikman nau wantaim ol dispela bikhet pasin.

Long Sande ol lain ya i save bilas gut, karim Baibel na go lotu. Mi tokim ol lain ya olsem ol ino kamap tru ya. Ol i save kamap ol giaman skin nating kristen long Sande.

Mi lukim dispela kain giaman pasin long taim bilong lotu na mi save sem long lukim bikos taim lotu i pinis, ol bai go bek long wankain bikhet pasin bilong ol gen.

Ol dispela yut o yangpela manki i bagarapim tru gutpela nem na gutpela sindaun bilong ples. Ol liklik manki long bihain tu i wok long lukim kain pasin bilong ol na i wok long bihainim nau.

Mi ting wanpela bikpela traim i mas kamap long dispela ples bai olgeta manmeri ya i ken lukim na senisim ol deti pasin bilong ol ya.

**Fiang Mirijog**

**Lae**

**Morobe provins.**

# Husat papa long Alasi Trensport?

## Dia Edita,

Mi makim ol pipal bilong Aitape/Lumi ilektret na olsem mi laik autim wari bilong ol i go long memba bilong mipela husat tu i ministra bilong plis long nesenel gavman, Paul Mambei.

Mi askim Minista Mambei long tokaut nau long ol pipel bilong Aitape/Lumi olsem husat tru i papa long wanpela hino trak ol i

kolim long Alasi Trensport.

Narapela samting tu we mipela i laik yu kliarim long mipela em husat tru i papa long wanpela kampani long Wewak ol i kolim long MAPS.

Mipela i laik yu tok kliarim long mipela sapos trak ya na kamapani MAPS em i bilong ol Alasi pipel o long Mambei famili.

Long nau, MAPS kampani i gat wanpela buldosa trak na greda.

Mi raitim pas long kisim ol tok kliarim bikos ibin gat bikpela pait na kros i kamap namel long lain bilong Mista Mambei na ol arapela pipel long trak na kampani ya.

**John Wilai**

**Lumi**

**Sandaun provins.**

# Reks Ben em feveret kaset bilong mipela

## Dia Edita,

Mi laik bekim pas bilong brata Maigo Kongrama long Wantok 6 Julai, 1995.

Mi wanpela soldia boi bilong Moem Bareks long Wewak wataim sampela manki wantok ol soldia mipela i lap long yu long mekim toktok long Reks Ben bilong Finsafen.

Sapos yu bilong Morobe long hapbilong Finsafen, bai yu save long mining bilong dispela singsing, Waina Kembo.

Na tu dispela song i no bilong Reks Ben. Em song bilong Sagic Kuvic.

Brata yu mekim bikpela asua tru olsem i moa gutpela long yu pasim maus bilong yu na amamas tasol long harim musik bilong Reks Ben.

Mining bilong song, Waina Kembo em olsem lusim mi i go.

Na mining bilong narapela tupela song yu bin tok long en, Ining Dac Na Heriangu na Yau Sacga Nawa Waina Kembo i no min tok nogut olsem yu bin tok long pas.

Mi askim yu long tingting gut na mekim ol kain toktok olsem long niuspepa.

No ken opim maus na mekim ol man i ting yu top man long komplek long ol samting.

Brata Baigo, yu gat wanem kain tingting na yu putim o bagarapim nem bilong Reks Ben?

Tasol susa ya na mipela planti save laikim Reks wantaim Sagic Kuvic wantaim planti ben, tasol yu em bilong Boana na watpo yu save long tok ples 73K.

Mi laik tok sori long Reks Ben na Sagic Kuvic long dispela giaman pasim man Boana ya i mekim iong planti manmeri i bin ritim. Em pasin bilong jeles tasol.

Em tasol pas bilong mi long bekim pas bilong dispela giaman man ya.

**Lalan Meriap**

**WEWAK**

# Memba bilong Lumi mas tokaut

## Dia Edita,

Mi laik autim komplek bilong mi i go long memba bilong Aitape Lumi na ministra bilong plis, Paul Mambei.

Mi askim ministra Mambei long i mas tokaut long pipel bilong Aitape Lumi long Hino ka ol i kolim Alasi Trensport. Dispela em ka bilong husat?

Mipela i no save dispela ka em bilong husat bikos nau em i gat nupela buldosa na wok bilong em i kamap olsem bisnis. Mipela i no kliarim tu bikos sapos em i samting bilong husat famili grup em i orait tasol

memba yet i mas tokaut kliarim long sanap bilong em long dispela samting.

Bikos mipela i save tu olsem olgeta memba bilong palamen i save mekim kain liklik samting olsem wok bisnis hait na putim nem bilong ol arapela o famili grup i go antap.

Mipela i laik yu memba i mas mekim nem bilong em i stap kliarim long dispela samting.

Em tasol liklik askim bilong mi.

**John Wilai**

**SANDAUN**

# Tingim gut na makim memba bilong Lufa

## Dia Edita,

Mi no amamas long pasin we sampela lain bilong Lufa i mekim long votim ol memba bikos bihain ol bai askim ol long givim ol mani bilong baim ol spot unifom.

Yupela i tingting tasol long nau na ino long tumora na mekim dispela. Yu putim dispela man i go long palamen, em i samting bilong yu. Sapos man ya ino inapim laik bilong yupela, em i leit pinis long yu long wari. Man ya ino inap lukluk long yu bikos em i winim sia. Asua i stap long yu yet.

Nau mi laik tokim yupela ol manmeri bilong Lufa eria olsem 1997 nesenel ileksen i kam klostu na memba olsem Mathias Karani em i gutpela man husat i helpim long kamapim sampela developmen long ilektret na ol pipel bilong em. Olsem na mi askim yupela ol pipel bilong Lufa long holim bek Mista Karani na maski long kendidet i peim kempin long mani. Lukluk gut sapos man i mauswara o ones man. Yupela inoken pasim ai na vot.

Mi tok rijonal memba bilong yumi bai i lusim sia i go long narapela husat i moa ones na inap long kisim sevis i kam long ol pipel bilong em long ples.

Husat i gat sampela toktok long dispela samting, rait ikam tasol long Wantok Niuspepa na mi bai amamas tasol long lukim.

**B. Itude Karive Mosbi.**

# Raitim gutpela tok pilai

## Dia Edita,

Mi wanpela manki husat i save laikim tru long lukim ol kain tok pilai we ol i raitim long bas, ka na trak.

Wanpela samting tasol em, yumi i mas yusim het na nem bilong God Papa long ol toktok we bai i bihainim wok na laik bilong em.

Papa God em ino bisnis man o man we yu ken tok pilai long em o yusim long antapim bisnis bilong yu. Mipela inoken yusim nem bilong Papa God long ol tok pilai na pani stori olsem long Biabia, Toro, Kanage Spak Maik na Rebo.

Em tasol i lukautim yu wantaim bisnis bilong yu na maski long pilai wantaim nem bilong em. Long Baibel em yet i tok maski long maketim nem bilong mi nating sapos yu nogat gutpela risen. Yusim nem bilong mi long samting we i ken givim yu laip.

Long ol man husat i save pilai long nm bilong Papa God, mi no wanbel tru.

**Waramson Nkuva**

**Kapiura**

**Wes Nu Briten.**

Sapos yu laik long raitim ol pas bilong yu i kam, rait i kam long dispela: **Wantok niuspepa P.O.Box 1982, Boroko, NCD.**



**NEM:** Lynda Gabb (meri)

**KRISMAS:** 12

**ADRES:** Mileng Comm School, PO Box 4, Gaubin, Karkar Island, Madang prov

**LAIKIM:** Singsing, kukim kaikai, pilai volibal, soka na raitim pas.

**NEM:** Vicky Aria (meri)

**KRISMAS:** 13

**ADRES:** Mileng Comm School, PO Box 4, Gaubin, Karkar Island, Madang prov

**LAIKIM:** Pilai bolibal, soka, netbal, ritim buk na danis.

**NEM:** Patrick Saige (man)

**KRISMAS:** 15

**ADRES:** Mileng C/Sch, PO Box 4, Gaubin, Karkar Island, Madang provins

**LAIKIM:** Ritim buk, tok pilai, pilai soka, ragbi na danis.

**NEM:** Joyce Joe (meri)

**KRISMAS:** 18

**ADRES:** PO Box 1151, Wewak, Is Sepik provins

**LAIKIM:** Harim musik, pilai spot, kukim kaikai na stori wantaim ol pren.

**NEM:** Linda Willie (meri)

**KRISMAS:** 16

**ADRES:** PO Box 1151, Wewak, Is Sepik provins

**LAIKIM:** harim redio na musik, pilai volibal, basketbal, kukim kaikai na stori wantaim ol pren.

**NEM:** Dorcas Aopi (meri)

**KRISMAS:** 16

**ADRES:** Good Shepherd Lutheran High School, PO Box 1124, Madang prov

**LAIKIM:** Harim NAU FM redio, tok pilai, raitim pas long pren, swim long wara, pilai basketbal na kriket.

**NEM:** Samuel Rot (man)

**KRISMAS:** 17

**ADRES:** Mt Hagen High School, PO Box 380, Hagen, WHP

**LAIKIM:** harim musik, mekim pren na pilai spot.

**NEM:** Jeffrey Pundu (man)

**KRISMAS:** 24

**ADRES:** Immanuel Lutheran District Hospital, PO Box 420, Wabag, Enga prov

**LAIKIM:** Pilai spot, lukim vedio, harim musik na ritim Wantok niuspepa.

**NEM:** Tony Ambros (man)

**KRISMAS:** 18

**ADRES:** PO Box 487, Kimbe, Wes Nu Briten provins

**LAIKIM:** Pilai gita, pilai ragbi, go troling long solwara, go lotu, wokim prenprent wantaim ol arapela.

**TOKSAVE I GO LONG OLGETA MANMERI**

**MIPELA I SALIM NAU**

**SPORT**  
WEEKEND



**BAIM WANPELA KOPI TETE NA LUKIM OL  
DRO NA RISALT BILONG FEIVARET SPOT  
BILONG YU.**

**EM I SPOT NIUSPEPA  
BILONG PNG STRET!**

*Baim na ritim!*



# WANTOK

MUSPEPA BILONG OL PAPUA NIUGINI STRET

# PABLIK NOTIS

Sapos yu laik advertais, telepon 25 2500 na askim long

Miri Aiori Ext. 214  
Jeffrey Maliou Ext. 215  
Joe Naime Ext. 218

## BUK BILONG OL SEVISIS

### BUILDER



**KISSING BUILDERS**  
PO Box 1884  
Lae  
Morobe Province

General building, plumbing, maintenance; painting, constructor

**PLUMBING SERVICES AVAILABLE**

24 HOURS CONVENIENCE

Butibum Road Lae Morobe Province -  
Telephone: 42 0602

### CHRISTIAN BOOK CENTRE

#### LAE & MADANG

Educational/Christian books  
English/Pidgin/Tok Ples

Gifts & school stationery  
Nanulon St, Madang  
Ph: 82 2043 Fax: 82 3376

4th St Lae  
Ph: 42 4156  
Fax: 42 7073

### ELECTRONIC

**PAPA BILONG OL TV**  
SAPOS TV BILONG  
YUPELA I BAGARAP  
SEKIM WANTAIM MIPELA

O KAM NA LUKIM MIPELA LONG OLGETA  
LEKTRIK SAMTING YU LAIKIM.

■ SPARE PARTS ■ TOOLS ■ EQUIPMENT  
■ REPAIRS TO T.V.'s, RADIOS, ETC.



WE ARE LOCATED AT THE CORNER OF WARDI ROAD AND SPRING GARDEN ROAD HONORA  
P.O. BOX 3572 PHONE 25 1952  
BOROKO, N.C.D. FAX 25 4743

### HAIR & BEAUTY

We manufacture hair and beauty products. We wholesale, retail, large range of black hair products. We sell hair pieces and hair equipment. If you manage a salon or would like to open one, we will provide you best quality products at best prices. If you prefer any U.S.A. hair product and you cannot find it here, we will get it for you. Any questions about your hair product you use or braiding, our chemist and cosmetologist are here to help you.

EF - KAY PARADISE PRODUCT CO PTY LTD

Steamships Hardware Compound Properties,  
Waigani Drive, NCD. Ph: Fax: (675)  
325 0519, P.O. Box 1671, Port Moresby.

### HAIR & BEAUTY

#### His N' Hers HAIR SALON

All Hair Care

Black Hair  
&

Beauty Products

**42 1843**

P.O. Box 1721, Lae, Central Arcade.

### SAWMILL

#### TOKEN & ZEACAN

Portable Sawmills  
Strongest light-weight mills in P.N.G.  
Saws 1m<sup>2</sup> per hour  
New Auto Feed  
PRICES START AT K16,000.00  
For Saw Blades, Filters, Belts, Files, Teeth,  
Holders, etc.

Contact:  
TIMBERSAWS (PNG) PTY. LTD.  
Laurabada Avenue, Lae.  
P.O. Box 318, Lae.  
Phone: 42 7015 Fax: 42 7673.

### FOR SALE

**MIPELA I GAT OL**  
**STRONPELA FISIN NET OR**  
**UMBEN NAU LONG WEWAK.**  
FSC PTY LTD

Stoa i stap long Scenic draiv  
hapsait tasol long Customs Opis

Telipon: 863465 (Wewak)  
3231288 (Port Moresby)

### COFFEE MACHINERY

Montale Pty Ltd Ph: 72 2611  
Fax: 72 2612

Mipela Agen bilong Pinhalense Kopi  
Masin. Pulpers, Driers, Hullers,  
Destoners, Gravity Separators, El-  
evators na sampela moa.

Olgeta Kopi masin em mipela i gat  
inap. Kam lukim mipela nau mipela  
inap helivim yu.

### PORTABLE SAWMILL

Peterson Portable Sawing Systems  
(PNG) Pty Ltd. Ph: 82 3482  
New Zealand's most popular and  
best for P.N.G.

Lightweight aluminium, low cost  
from K15,000 High Production  
to 6m<sup>3</sup> per day.

Head office Madang  
Ph. Fax: 82 3482 P.O. Box 2118  
Agency Port Moresby: Track Co.  
Ph: 25 8766 Fax: 25 8758  
Agency Wewak Ph: 82 3012  
Training and info, Lae  
Ph: 42 4029 Fax: 42 3586  
Agency inquiries welcome from other centres.

*Yu ken edvetais hia long **K10** tasol  
long wanpela wik. Long painimaut  
moa long dispela, ringim Augustine,  
Jack or Joe long telipon  
namba 325 2500.*

# B A I M

## Saturday Independent


Niuspepa  
na Lukim ol  
Hos Resis Gait.



# 60t TASOL!

### BIRTHDAY GREETING

*HAPPY BIRTHDAY*  
DAVID. J. IVAH ARIA  
TURNS 7 YEAR TOMORROW  
12/10/95.



Bikpela halo na griting i kam long  
ol ankel na anti long Hohola (POM)  
na tu long Kokopo. Bikpela love i  
kam long mum na dad na ol ankel  
long Word na Nationals.



PNG Teachers Savings and Loan Society Limited

## PABLIK TOKSAVE

### PASIM OL BIKPELA LON APLIKESEN BILONG 1995

Toksave long olgeta fainensal memba bilong mipela olsem "Jeneral Pepos Mesa Lon Aplikesen bilong dispela yia 1995, bai pas long 31st Oktoba, 1995 inap 28th Februari, 1996.

Arapela bikpela lon we i kam bihain long dispela taim bai i no gat ansa bilong em. Ol lon bilong skul fi tasol bai mipela i stretim.

Lon aplikesen bilong ol skul fi i mas kam wantaim opisel ripot bilong dispela skul. Kos bilong skul fi wantaim arapela fi we skul bai sasim i mas stap klia long dispela aplikesen pepa bilong yu.

Bai mipela i lukluk long olgeta lon aplikesen bilong ol skul fi long mun Januari, 1996.

**IVAN KEROWA**

Siaman- Nesenel Lons Komiti

25th Septemba, 1995

**Sapos yu laik salim toksave o  
edvatasim spes long**

**WANTOK**


***ringim 25 2500 na askim  
sels dipatmen***



**WANTOK**



• Netbal resis bilong Praivet Kampanis long last wiken namel long ol SBS Elektrikal na Saturday Independent. SBS meri i strong na nekim Saturday Independent 16-12. Hansut: Tabubil basketbal tim husat i bin pilai long Sauten Rijen basketbal Konfrens long las wiken. Poto: Joe Ivaharia. Aninit: Tupela soka tim long Lae Futbol Asosiesen (LAF) i redi long kik long las wiken long LFA graun 2. Poto: Alphonse Pu.



*Ol kain kain spot long las wiken long Mosbi na Lae*




• Referi i sekim ol pilaia bilong NK Ampo pastaim long ol i kik. Dispela em Lae soka resis.




• Ol tripela pilaia bilong Capital Basketbal Lig, long lephan em Kumaris Banjoi, namel em Rachael Paiove na Mary Kairi, husat i bin win long Sauten Rijen basketbal resis bilong ol meri. Pilai i bin kamap long las wiken long Mosbi.



**FRENCH BAKEHAUS**  
  
 • **CAKES**  
 Weddings & Birthdays  
 Our speciality  
 25 1266 Pom  
 42 5349 Lae

PROVINSAL

# SOKA NIUS

**FRENCH BAKEHAUS**  
  
 • **CAKES**  
 Weddings & Birthdays  
 Our speciality  
 25 1266 Pom  
 42 5349 Lae

## Mosbi na Lahi i redi tasol

INTA Siti soka resis namel long Lae na Mosbi bai i no inap kamap yet inap ol eksekutiv i bung long Madang long dispela mun na toktok gut long en.

Dispela inta siti soka resis we i bin laik kamap long las wiken long Lae i no bin kamap. Bikos Lae i gat bikpela Morobe Provinsal So olsem na ol i lusim gem ya i go long narapela taim.

Tasol seketeri bilong Mosbi Soka Asosiesen (PMSA), Mojeck Selsel i tok dispela gem bai i no inap kamap yet. Ol eksekutiv bilong dispela inta siti soka resis bai bung pastaim long Madang long taim bilong nesanel wimens sempionsip long 27 Oktoba. Na ol bai toktok moa long dispela pilai na makim wanpela gutpela taim bilong ol pilai ya.

Mojeck i tok em i gat save olsem sait bilong em long Mosbi, ol boi bilong Mosbi i redi long dispela pilai. Tasol long em i no klia tumas long sait bilong Lae.

Em i bin toktok wantaim tresera bilong Lahi Soka Asosiesen (LSA), Paul Pondo na i painimaut olsem Lahi i orait long dispela pilai. Tasol i no gat wanpela gutpela toktok i kam yet long Lae. Futbol Asosiesen (LFA).

LFA na Lahi bai bungim K2,000 long dispela pilai. Na PMSA bai putim narapela K2,000 long ol i pilai long en. Dispela em K4,000 olgeta bai Mosbi na Lae i pilai long en.

LFA na Lahi bai bung wantaim na kamapim wanpela tim tasol long kik long dispela resis.

## LFA i no gat ripot yet

Narapela samting Wantok i bin kisim toksave long en em, i gat luksave olsem LFA bai i gat hevi long salim tim bilong em i go aut long narapela provins. Dispela em sapos Lae tim i laik go long Mosbi. Lahi bai i orait long baim rot bilong ol pilai bilong em i go long Mosbi, tasol LFA bai bungim hevi long dispela.

Siaman bilong dispela inta siti soka resis; Dokta Kuam Malai i no stap ples klia long givim sampela toktok long dispela pilai. Dokta Malai i no moa mekim wantaim toktok long dispela inta siti soka resis bikos asosiesen bilong em long Lahi i rausim em pinis wok presiden.

Tasol seketeri bilong PMSA, Mojeck Selsel i tok Dokta Malai em siaman bilong dispelea inta siti soka resis. Dispela i no gat wanpela samting long mekim wanpela Lahi soka resis. Dispela em olsem wanpela kain asosiesen bilong em yet.

Mojeck i tok i tru olsem Lahi i rausim em tasol wok bilong em olsem siaman bilong inta siti soka resis i stap yet. Mojeck i askim Dokta Malai sapos em i stap long Mosbi long go bungim em long Bisini soka graun na toktok gut wantaim em long dispela samting.

## Stedium long Lae bai paia long Lahi soka fainels

### LAHI SOKA RIPOT

BIKPELA semi fainal long dispela wiken bai i stap namel long Guria na Rapatona long Lahi soka resis. Dispela em lusa bai i go aut long resis na wina bai go long mesa semi fainal long neks wiken.

Guria husat i gat biknem na i wanpela olupela soka tim bilong Lae i mas yusim eksperiens na strong bilong em long winim dispela gem.

Guria bai i gat ol boi olsem, Hanz Fred na bikpela brata bilong Eddie Fred. Tupela bai sanap long fulbek eria na tupela i gat eksperiens long dispela posisen. Olsem na tupela inap long strongim difens bilong Guria egens ol birua bilong Rapatona.

Long midfil eria em ol boi olsem David Panap husat inap putim sampela save bilong ol i go insait long sapatim ol fowet lain olsem Chris Nagai long traim brukim umben bilong Rapatona.

Guria i bin go ples long poin lata bilong Lahi soka resis i kam inap long mak bilong nokaut we em i wok long lusim posisen bilong em. Tasol em i gat strong na save bilong holim bek dispela biknem bilong em.

Guria i no ken lukdaun ol Manus manki bilong Rapatona. Bikos ol tu i gat planti kain trik we i ken givim bel hevi long Guria sapos ol i no lukaut gut.

Rapatona i gat sampela eksperiens na gutpela pilai olsem Isaac Sam na Tami Wanmar. Na tupela man ya i ken kisim sapat long arapela wanpela bilong tupela na givim hevi long Guria long fultaim.

Rapatona i bin soim olsem em i wanpela strongpela tim bikos em i bin pait long aninit posisen bilong poin lata i kam antap long dispela mak bilong semi fainal. Olsem na Guria i no ken lukdaun long Rapatona.

Long arapela primia gem, Asiawe bai bungim ol manki Sobou na dispela tu em wanpela gutpela gem.

Sobou i gat planti biknem pilai olsem John Laskam, Richard Daniel, Godfried, Harrison Kamake na Harold Kawambara. Na ol dispela lain manki ya em nogut olsem na lukaut long ol.

Tasol ol i no ken lukdaun long Asiawe bikos ol boi olsem John Pokalia, Eli Memlong, Pama na Trimo i stap na ol i ken givim bel hevi long Sobou sapos Sobou i no was gut long ol.

Sobou husat em maina primia bilong Lahi soka resis long dis-

pela yia bai i stap olsem feveret bilong winim primiasip bilong Lahi soka resis long dispela yia. Tasol yumi no ken strongim bilip yet bikos Guria na Asiawe i ken senisim dispela stori.

Long resis bilong ol meri, bai ol susa bilong Guria i bungim Gaziga na dispela bai wanpela strongpela gem. Bikos tupela tim wantaim i gat planti gutpela pilai na dispela bai kamapim bikpela salens na strongpela difens na bai i hat long painim wina hariap.

Tasol gem bilong tupela bai kamapim wina sapos narapela tim i abrusim ol kain kain asua nabaut na strongim sait bilong em long difens.

Lusa bilong dispela gem namel long ol meri Guria na Gaziga bai pilaim wina bilong Rapatona na Asiawe long neks wiken. Wina bilong Guria na Gaziga bai go redi long gren fainal wetim narapela tupela tim long painim wina bilong salens long gren fainal.

Dispela wiken bai Lahi i stap long wanpela bikpela wiken we olgeta tim long olgeta divisen i kik long semi fainals. Na dispela i min olsem olgeta tim bai pait strong tru na gem bai i go tait olgeta long painim wina bilong kik long gren fainal.

## LFA holim yet ol biknem pilai

### YAKAM KELO i raitim

LAE Futbol Asosiesen (LFA) i holim yet ol biknem na eksperiens pilai bilong em long makim Lae wimens tim i go kik long nesanel wimens sempionsip long Madang long dispela mun.

Dispela em bikos planti biknem na olupela meri bilong Lae i wok long strongim yet ol pilai bilong ol na i stap yet long top fom.


Dispela ol meri em; Kay Ella, Monica Ray, Martha Raka, Judith Herman, Kessie Towika, Betty Ronuc, Ake Jobi, Wanting Yagum, Rose Zatura, Edna John Thomas na Stella Kama. Dispela em wanpela ful skwat olgeta.

Ol dispela i bin stap wantaim long 1993, 1994 na dispela yia gen bai ol i stap wantaim gen long LFA skwat.

Dispela i soim olsem dispela skwat bilong ol meri Lae bai wanpela strongpela tim tru long arapela senta i winim. Ol i bin soim piksa long las yia egesim Mosbi taim tupela i kik long gren fainal i go long fultaim na ekstra taim. Tupela i dro gen long ekstra taim na long dairek penalti kik, Mosbi i winim LFA Lae.

Dispela skwat i kam bek gen na dispela i soim olsem kosa bilong ol meri Lae i mas i gat bikpela tingting long strongpela tim na gutpela gem plen. Na tu ol pilai i mas save long ol yet long poroman wantaim long pilai long fil.

Kosa bilong ol meri LFA Lae, Paisa Sami tu i stap yet olsem kosa. Ol i no senisim em yet bikos em i bin kamapim planti gutpela risal na nem bilong LFA wantaim ol meri long 1992 i kam. Olsem na em bai stap kosa yet inap eksekutiv bilong LFA i senisim em.



• Ol manki Kaiapit husat i nambawan lain long winim PNG SP Gems tim 1-0 long Mosbi. Ol i lus long Lahi long Morobe Spot tonamen. Foto: Zeph Aigal.



• Difens soka tim bilong Mosbi. Lukaut long ol bikos ol i redi long bomim ol birua long Bisini soka graun. Foto: Joe Ivaharia.



• Blue Kumuls bilong LFA Lae. Ol tu i save kirapim paia long LFA soka graun.

## Guria pundaun long spia bilong Momase

### MOSBI SOKA RIPOT

#### SAMUEL BASIM i raitim

BIKNEM Guria soka tim bilong Mosbi soka resis i kisim bikpela hevi tru long las wiken long han bilong ol boi Momase. Guria i pundaun long 2-0 skoa bilong Momase long fultaim.

Ol boi bilong Momase i bin redi gut tru long dispela gem bikos ol i save olsem ol bai pilaim wanpela biknem klap na dispela bai i no isi gem. Long dispela as, ol i lokim olgeta kona strong tru na mekim hat tru long ol straika bilong Guria long skoa.

Long namba wan hap bilong gem, tupela taim wantaim i no isi long brukim bun long painim umben bilong narapela. Tasol ol difens i bin strong tru. Olsem na tupela i go aut long haptaim wantaim 0-0 skoa.

Long namba tu hap bilong gem, planti gutpela na strongpela ron i wok long kamap long sait bilong Momase long traim brukim umben bilong

Guria.

Straika bilong Guria, Kasa i bin kisim gutpela malolo tru na i go insait. Olsem na dispela senis bilong Momase i bin kamap long gutpela taim stret we em i bin kamapim namba wan gol bilong Momase. Dispela gol i kamap taim Kasa i kisim bal long sait lain na salim i go long namel we Guria fulbek, Eric Petrus i kalap long hetim. Eric i bin stap pinis long bikpela presa na dispela kik bilong Kasa i kamap long taim Eric i sotwin pinis. Olsem na yangpela Budah i kalap isi long beksait na hetim i go pas long umben bilong Guria. Golkipa, Ronald Simon i kalap long sevim tasol em i leit na umben i mekim nois.

Guria i traim long bekim bek dispela gol tasol Momase i strongim olgeta kona bilong em na stapim Guria long go insait.

Klostu long fultaim, Momase i kamapim namba tu gol bilong ol gen taim Kasa i kisim bal na ron gen long sait lain na pulim difens bilong Guria i go long sait. Dispela taim narapela straika bilong Momase i ron long spes na Kasa i salim bal i go long em na em pinisim ron bilong bal long golmak bilong Guria.

Tupela gol bilong Momase i bin kamap long kona sait bilong Guria we ol i pulim difens i go aut na bihain ol i salim bal i kam namel na ol i salens long winim bal na kikim long golmak.

Midfil bilong Guria i bin strong tasol hevi i stap long tupela sait beklain bilong em. Olsem na gol i kamap long dispela.

Guria nau i stap wantaim planti tingting long wanem as tru na ol i wok long lusim planti gem o dro long ol isi gem we ol inap winim. Guria husat em wanpela biknem klap we planti tim husat i laik pinis em i save trening strong na redi gut tru long salensim. Nem bilong Guria i wok long go daun nau bikos em i bin lusim planti gem pinis.

Menesa bilong Momase klap, John Manau bihain long dispela pilai i mekim bikpela tok amamas tru i go long ol manki Momase long dispela win.

Em i tok em i laikim kain gutpela wok bung wantaim olsem namel long ol pilai na kosa long bung wantaim na pilai.

Olgeta sapota bilong Momase i bin amamas tru long dispela bikpela win egens Guria.

# LFA i no helpim ol meri- Daisy

## LFA SOKA RIPOT

### FRANCO NEBAS i raitim

BOSMERI bilong ol meri long Lae Futbal Asosisen (LFA), Daisy John Thomas i no amamas long mama asosiesen (LFA) long i no save sapotim raun bilong ol meri long ol bikpela soka tonamen. Olgeta hevi skwat bilong ol meri i save bungim long sait bilong mani em LFA i no save givim helpim.

Ol meri yet i save kisim mani long poket bilong ol na putim i go long stretim rot bilong ol long salim tim i go kik long narapela hap.

Daisy i tok dispela i no gutpela pasin bikos LFA i wok long lukluk tasol long ol man na i no long ol meri. Na dispela i no gutpela bikos ol meri i no gat sapot long mama asosiesen bilong ol yet.

Daisy i tok ol meri i save baim wankain rejistresen fi olsem ol man olsem na i no gat wanpela samting inap daunim ol meri long ol man.

Em i tok ol meri long LFA i bin kamapim planti gutpela nem bilong LFA long planti bikpela nesenel sempionsip long bipo i kam. Ol meri LFA i pilai i go long gren fainal na win o lus. Na dispela em nem bilong LFA ol i

wokim. Tasol asosiesen i no save lukluk long dispela kain samting.

LFA nau i makim pinis ol nupela eksekutiv bilong em long las wiken long ranim soka edministresen bilong neks yia.

Ol nupela eksekutiv em; Vais presiden David Joseph, tresera Veronica Masi, asisten tresera Eric Niwo, sekerteri Bravy Towika na presiden em Igoriong Kualiong.

LFA i makim pinis fainel skwat bilong ol meri long kik insait long nesenel wimens soka sempionsip long Madang long 27 Oktoba. Dispela em PNGFA Kap taitel.

Kosa bilong ol meri, Paise Sami i bin makim dispela skwat bilong ol meri bihainim pilai bilong ol wanwan long LFA long olgeta wiken.

Paise husat i bin kosa bilong ol meri long LFA longpela taim nau i holim nem yet long dispela posisen. Olsem na olgeta yia em i stap yet olsem kosa bilong ol meri.

Skwat bilong ol meri LFA em; Kay Ela, Monica Ray, Martha Raka, Naomi Bore, Lucy Robin, Madeline Mathew, Judith Herman, Magdeline Ume, Sara Masani, Zipe Manu, Dabe, Becky Taruvi, Kessie Towika, Janet Walter, Betty Ronuc, Ake Jobi, Rose Possi, Wanting Yagum, Rose Zatura, Stella Kama, Edna John Thomas na Grace Umbai. Kosa em Paise Sami na tim menejeres em Daisy John Thomas.

# Elcom man na Yut meri winim Wabeg taitel

## WABEG SOKA RIPOT

ELCOM i soim moa pawa long las wiken taim em i katim waia bilong Teachcom long Wabeg soka gren fainal bilong ol man long las wiken. Elcom i katim pawa bilong Teachcom wantaim 3-2 skoa long penalti kik. Na dispela i bungim fultaim skoa i go olsem Elcom 4 na Teachcom 3.

Dispela i bin wanpela strongpela gren fainal tru namel long tupela tim ya bikos tupela i bin redi gut tru long dispela kik.

Teachom i no westim taim long skoa taim straika bilong ol, Jeffery Daniel i kisim wanpela gutpela sans na em pinisim ron bilong bal long golmak bilong Elcom stret. Dispela i kamapim namba wan gol bilong Teachcom na ol i wok long pait strong long putim moa skoa.

Klostu long haptaim na Teachcom i no was gut. Olsem na pawa manki bilong Elcom, Richard Pari i kisim sans long katim stret waia bilong Teachcom na skoa long mak bilong Teachcom. Tupela i dro 1-1 long hap taim.

Long namba tu hap bilong gem, tupela wantaim i traim long brukim bun na bomim umben bilong narapela tasol difens i tait olgeta na i no gat ol sans i kamap. Planti bal tu i wok long abrusim mak na go ausait.

Olsem na long fultaim tupela i dro 1-1.

Long ekstra taim tupela i mekim save gen tasol skoa i stap wankain yet long 1-1 olsem na referi i salim tupela i go long kisim dairekt panalti kik. Long dispela taim, Elcom i nekim Teachcom 3-2 long maus bilong golpos.

Long resis bilong ol meri, Luteran Yut i winim dispela gren fainal egens Teachcom wantaim 4-0 skoa. Dispela i bin wanpela wansait gem tru bikos Luteran Yut i gat planti eksperiens meri i stap na ol i givim stia gut tru long ol meri bilong ol.

Long grenf fainal bilong ol junia em Teachcom i laki long winim dispela gem egens Elcom. Skoa i bin Teachcom 2 na Elcom 1. Dispela tupela gol bilong Teachcom i bin kam long junia straika, Steven Mun. Na gol bilong Elcom i kam long Oseah Kipungi.

Long presentesen taim, Jeffery Daniel i kisim prais bilong top skora long sinia man, Estha Egari long ol meri na Steven Mun long ol junia divisen.

Long dispela taim tu em olpela presiden bilong asosiesen, Peter Mommers i sikan wantaim nupela presiden, Ananias Popo long kamap na tekova long wok presiden.

Peter Mommers tu em presiden bilong Papua Niugini Futbal Asosiesen (PNGFA).

## Fainel bilong Sauten rijen basketbal resis stap long planti toktok

### BASKETBAL RIPOT

BIKEPELA basketbal resis bilong Sauten Rijen i pinis long las wiken we ol meri i pinisim fainel bilong ol tasol ol man i no gat.

Ol meri em Kapital Basketbal Lig (CBL) i winim sans long winim dispela resis bilong ol meri na ol i redi nau long go pilai insait long nesanel basketbal konfrens long Lae long Oktoba 27-29.

Tasol bikpela gren fainel bilong ol man i no bin pinis taim pait i bruk namel long tupela pilaia na stapim pilai long pinis gut long fultaim.

Gren fainel i bin kamap namel long CBL na Mosbi basketbal asosiesen. Tupela asosiesen wantaim i bilong Mosbi.

Skoa i bin 62- 45 we CBL i go pas long skoa na dispela pait i kamap na stapim pilai.

Ol eksekutiv bilong Sauten Rijenal Basketbal Konfrens yet i mas sindaun na toktok gut long dispela gren fainel we ol bai pilaim gen o givim gem i go long CBL. Dispela em wanpela strongpela disisen we ol eksekutiv bilong dispela tona-

men i mas skelim gut.

Dispela em wanpela nupela kain tonamen we PNG Basketbal Federesen i bin statim long dispela yia long olgeta senta i mas pilai long rijen. Insait long dispela, bai ol top tim husat i kamap long ol bikpela taun olsem Mosbi bai i gat tim bilong ol yet na rijenel tim bilong tu wantaim. Dispela em tupela tim bilong man na tupela bilong meri long wanwan rijen.

Olgeta rijen olsem Hailans na Momase rijen i bin pinisim dispela rijenal basketbal tonamen bilong ol pinis na las wiken tasol em Sauten rijen i pinisim bilong em.

Man husat i go pas long dispela Sauten Rijenal basketbal tonamen, Ben Zigi i tok em i amamas tru long ol tim husat i bin kam long Tabubil, Popondeta, Sentrel, Bereina na arapela moa. Kamap bilong ol i mekim gem i ron gut bihainim dro bilong ol.

Ben i mekim bikpela tok amamas tu i go long ol teknikel opisa bilong dispela olgeta senta husat i bin helpim ol long mekim pilai ya i ron gut i go inap long gren fainel we ol pilaia yet i kamapim hevi long gem.

Ben i tok em i amamas long ol


lain i kam long Sentrel provins bikos ol i no save soim ol yet tumas long basketbal pilai olsem. Tasol dispela pilai i soim olsem i gat planti manmeri bilong Sentrel husat i ken kamap gupela basketbal pilaia tasol ol i wok long hait i stap long ples.

Dispela Sauten rijenal basketbal konfrens em bilong makim skwat bilong ol man na meri long go pilai insait long nesanel basketbal konfrens long Lae long dispela mun.

Skwat bilong ol man na meri long Sauten rijen i no klia yet. Ol eksekutiv yet bai makim skwat na tokaut long dispela. Sauten rijen skwat bai i kam long ol tim husat i no mekim gren fainel. Na tim bilong man na meri husat i winim gren fainel bai go olsem wanpela tim bilong ol yet.

Ol eksekutiv i wok long kisim tingting long traim stretim dispela hevi bilong ol man long gren fainel ya. Bikos ol i mas redim tim bilong ol man long go long nesanel sempionsip.

Tingting i stap long pilaim gen dispela gem tasol arapela i tok long givim gem i go long CBL bikos ol i go pas long pions na Mosbi i no bin tingting long apil long skoa pepa.



• Pilaia bilong CBL i go antap long tromoi basket tasol tupela pilaia bilong Mosbi i kalap wantaim na blokim em. CBL 64 na Mosbi 45. Pait i kirap na pilai i no pinis.

## Planti kosa bilong etletik i hait- Sasama

### ETLETIKS RIPOT

NESENEL kosa bilong etletiks, Samu Sasama i no amamas long planti kosa husat i save pinsim ol etletiks kos na bihain ol i go bek na haitim pepa bilong ol.

Sasama i tok planti taim PNGAU i save holim ol kos bilong ol lain i kamap kosa na ol i save givim tu ol setifiket long ol. Tasol nau planti i go bek long ol taun na senta bilong ol, ol i save haitim gen ol dispela bilong ol na i no save yusim.

Nesanel kosa i tok em i no amamas bikos PNG nau em i save olsem i gat planti manmeri husat i save long kosa o givim trening long ol arapela long dispela spot bilong etletiks.

Em i tok nau planti senta i nogat gupela asosiesen bilong ol. Ol i save stap wanwan nabaut inap taim ol i harim olsem i gat bikpela sempionsip i laik kamap, em nau bai ol i kwiktam kam bung na giam makim skwat na soim olsem ol i gat asosiesen.

Dispela em wanpela bikpela hevi em mipela i gat long PNG olsem planti kosa long ol wanwan senta i no save bung gut long fomim asosiesen na strongim spot long rijen o taun bilong ol.

Nau yet i gat dispela bikpela asosiesen bilong olgeta kosa insait

long kantri. Tasol i no gat man i mekim wanpela wok bihain o aninit long dispela asosiesen bilong ol kosa. Dispela em nesanel kosa asosiesen.

Sasama i tok dispela bikpela asosiesen bilong ol kosa i bin kamap gut long pastaim tasol nau em i stap olgeta bikos i nogat sapot na tu i no gat mani bilong mekim em i wok gut long sevim ol kosa.

As bilong fomim dispela asosiesen bilong ol kosa em long givim moa trening long ol kosa, developim save bilong ol long kosa, bungim ol wantaim long ol i mas save long ol kain tenis we i wok long kamap insait long dispela spot bilong etletiks na planti arapela moa.

Nau i no gat sapot na helpim long asosiesen ya tasol Sasama i wok long larim wok bilong asosiesen i mekim liklik wok olsem bungim ol ripot na salim i go long olgeta kosa insait long wanwan senta bilong kantri.

Nesanel kosa i askim olgeta referi long i no ken haitim setifiket bilong ol long haus. Ol i mas putim i kam aut na stat yusim long givim trening ol kain etletik klap o long ol skul studen.

Em i save olsem i gat planti manmeri i gat setifiket bilong kosa bilong planti kosa kos i bin kamap planti taim pinis na planti manmeri i save kam na i go.



• Em bikpela gren fainel bilong Sauten Rijenal basketbal resis las wiken. Pilaia bilong CBL i kisim bal i go fowet long painim ring bilong Mosbi. CBL 62 na Mosbi 45.

## Australia painim ruls pilaia long PNG

WANPELA lain opisel bilong Australia i raun nau long PNG long painim ol gupela ausi rul pilaia bilong kisim i go joinim klap bilong ol long Australia. Klap ol lain ya i makim em Richmond klap long Australia.

Dairekta bilong klap, Tom Hafey i kam wantaim wanpela olupela pilaia bilong klap na tu ol lain husat tu i pilai i stap yet long klap. Na ol bai stap long PNG inap wanpela wik olgeta long painim ol gupela pilaia husat ol i ken kisim i go insait long kem bilong Richmond long neks yia.

Ol i bin holim wanpela junia kos las wik long Mosbi we i bin wanpela gupela kos long developmen bilong ol yangpela insait long dispela spot bilong ausi ruls.

Dairekta, Hafey i tok dispela raun i olsem ol i laik sanapim as bilong pulim moa sapot long bihain taim i go long dispela spot.

Na em i save olsem insait long ol raun bilong em i go long Lae, Madang na Kimbe long dispela wik

bai em i ken luksave long sampela pilaia we inap mekim long Australia ausi rul resis.

Tom Hafey em yet i wanpela gut taim biknem pilaia bilong Australia na nau em i stap olsem redio ripota bilong dispela spot tasol. Olgeta taim dispela gem i kamap, bai Hafey i toktok long redio na ripot long gem ya.

Mausman bilong PNG Ruls Futbol Kaunsil (PNGRFLC) Michael Uvillio i tok bikpela amamas tru long dispela raun bilong Tom Hafey na Mal Brown long PNG. Bikos tupela man ya wantaim em biknem pilaia bilong bipo na i wok long putim tupela yet i stap long dispela gem long sait bilong sapot na helpim. Na dispela raun bilong tupela inap givim bikpela helpim tru long developmen bilong ausi rul long PNG.

Em i tok kaunsil i wok long redim yet wanpela developmen program we ol bai salim i go long Australia Futbol Lig (AFL) long lukim na skelim na givim sampela helpim long PNG.

# WANTOK SPOTS

## Lam strongim Kumuls long dro wantaim ol boi Tonga

HULL, England-Papua Niugini Hapbek Adrian Lam i kamapim wanpela strongpela pilai tru long helpim tim bilong em long kam bihain long 20-0 long haptaim long fosim 28-28 dro egen-sim ol Tonga long ragbi lig Wol Kap long Tunde nait.

Lam husat i kisim tok awot olsem man of the match i kamapim kainkain mejik em i gat long skorim wanpela trai na setim wanpela long Stanley

Gene na senisim fowat Lucas Solbat husat i ptuim trai long fainel minit bilong pilai.

Fainel skoa em narapela nogut stori gen long ol lain Tonga husat i bin kisim wankain pasin taim ol i pilaim ol Nu Silan long Sande.

Tonga husat nau i pinis long resis bilong Wol Kap i bin go insait gut tru long pilai na skoa pas taim Awen Guttenbeil i ron long hapwe mak i go inap em i

skoa. Difens bilong Papua Niugini i no strong tumas na namba tu trai gen i kamap long Guttenbeil husat i skoa namel long fes hap yet. Difens i wok long bagarap yet na namba tri trai gen i kamap long Phil Howlett i husat ron tasol i go na nogat man i stopim em.

Fulbek Asa Amono i kikim wanpla gol na stap strong long win yet i go inap long haptaim taim Wolfram i skorim wanpela

trai na skoa i pas long 20-0 long haptaim. Lam i kamapim gutpela pilai tru tru na 4-pela minit tasol i go insait long seken hap, em i kisim wanpela gutpela bal long faiv-eit Stanley Gene na skoa aninit long ps stret.

Elais Paiyo husat i pilai huka i kirapim strongpela pilai tru na skoa aninit gen longpos. David Buko i kikim gol na tu skorim wanpela moa trai long putim skoa i kamdaun liklik.

Long namba 68 minit, Gene i sko long em yet tasol taim ol Tonga i kirap long paia, Tau'Alupe Liku na Una Taufu i givim ol Tonga wanpela 6 poin lid. PNG i kisim sans long holim pasim ol Tonga taim Lam i givim wanpela gutpela bal long Solbat husat i skoa aninit long pos na Elias Paiyo i kikim gol i go insait long pasim ol Tonga na rausim ol long resis bilong wol kap.- AAP



### Sempion tim bilong ol meri

● Ol dispela meri em ol sempion bilong Southern rijon konferens basketbal resis, Kapital Basketbal Lig. Baksait: Iephan i go long rait: Heka Luna, Eau Maya, Rachael Paiove, Michelle Rooney and Mary Kairi. Namel: Shirley Keme, Kay Banjoy and Salape Parapa. Fran: Maria Coombs, Jenniffer Maroroa, Susie Simon and Emma Waiwai. Foto: Joe Ivaharia.

### PNGFA stapim pilai bilong ol meri

NESENEL soka sempionsip bilong ol meri long Madang i no inap kamap. Bikos olgeta senta i no baim K200 nominesen fi na tu Madang husat bai lukautim pilai i no tokauf long ol i redi long lukautim pilai o nogat.

Seketeri bilong PNGFA, Don Sigamata i tok em i kisim toksave i kam long presiden bilong PNGFA, Peter Mommers na tonamen dairekta, Idris Kumbrawah long stopim dispela soka resis bilong ol meri.

Ol senta husat i tok long kamap long dispela pilai tasol ol i no baim K200 nominesen fi em; LFA Lae, Kaiapit, Wau, Madang na Hagen. Tripela senta tasol em Lahi, Wabeg na Mosbi husat i nominet. Olsem na pilai i no inap go het wantaim tripela tim tasol.

PNGFA bai bekim bek K200 bilong ol tripela asosiesen ya.

Narapela samting tu em Don i tok Madang Soka Asosiesen (MSA) husat bai lukautim dispela pilai i no givim wanpela ripot long PNGFA long ol wanem samting em ol i redim pinis o wanem hap em ol i stap nau long redim ol samting ya.

Don i tok dispela i no gutpela long rausim dispela pilai bilong ol meri. Bikos sapos ol senta i ken salim tim bilong ol i go pilai longwe olsem long Mosbi, ol i ken hariap long redim ol samting long salim tim bilong ol meri i go klostu tasol long Madang. Long dispela as, dispela i soim ol asosiesen yet i slek long mekim samting hariap long taim. Bikos taim PNGFA i makim long nominesen bai pas em long Oktoba 6. Dispela em long las wik Fraide.

Wantok i save olsem ol asosiesen olsem Lahi, LFA, Wau na Mosbi i redim pinis skwat bilong ol meri long dispela tonamen. Ol i bin trenning tripela na foapela mun i go pinis.

Dispela em wanpela bikpela hevi we inap givim bikpela wari na bel hevi long ol meri husat i save laikim tru na amamas long pilai soka. Bikpela interes na laik bilong ol long soka i lus nating bikos long dispela senis, Don i tok. - YAKAM KELO i raitim

NAU YU KEN  
BAIM LONG  
LIKLIK NUPELA  
100gm PAK..



IT'S MARVELLOUS WHAT MILO CAN DO FOR YOU.



LAE  
BISCUIT



# RAGBI LIG


NIUS

I NO BILONG SALIM

LAE  
BISCUIT



## Kumuls mas winim ol Kiwis long pilaim semi fainel



• Adrian Lam kepten na ki man bilong ol Kumuls.

PAPUA Niugini Kumuls i gat wanpela bikpela hap wok tasol i stap long wol kap ragbi lig resis long Fraide na dispela em ol i mas winim ol strongpela Nu Silan Kiwis long go insait long semi fainel.

Nau yet long pul namba 2 em ol wantaim Tonga na Nu Silan i stap wantaim, Nu Silan i go pas wantaim 2-poins na Tonga wantaim Papua Niugini i stap long wan poins tasol.

Tonga i aut olgeta long resis bilong wol kap nau long wanem ol i lus long ol Kiwis na dro wantaim PNG olsem na ol bai nogat moa sans long wol kap resis.

Papua Niugini i gat wanpela moa sans long dispela resis long wanem ol i no pilaim Nu Silan yet.

Na sapos ol i laik go olgeta long semi fainel, kosa Joe Tokam i mas mekim sampela hatpela wok hariap tru bipo long Fraide bai ol i ken strongim ol yet egensim ol Nu Silan.

Ol Nu Silan long namba wan pilai bilong ol wantaim Tonga i bin kisim hatpela taim stret long wanem Tonga i bin soim strong bilong ol long seken hap bilong pilai na holim pasim ol long 24-24 klostu long fultaim.

Insait long las minit bilong pilai stret, Nu

### WOL KAP RIPOT

Silan fulbek Mathew Ridge i kikim wanpela fil gol na dispela i mekim na ol Nu Silan i winim Tonga.

Long sait bilong ol Papua Niugini, ol i mas strongim difens bilong ol yet sapos ol i laik winim ol Nu Silan long wanem pilai bilong ol egensim ol Tonga long Tunde nait i soim stret olsem long namba wan hap bilong pilai, difens bilong ol i no strong olgeta na i nogat wanpela pawa long em. Olsem na ol i mas lukluk long strongim difens bilong ol long ful 80 minits bilong pilai olgeta.

Long sait bilong ol Nu Silan Kiwis, sapos ol i winim ol Papua Niugini Kumuls, ol bai go insait stret na traim ol Australia long namba wan semi fainel.

Na sapos, Papua Niugini Kumuls i winim dispela pilai, ol bai gat bikpela sans tru long go insait long semi fainel egensim Australia. Wantaim tripela Winfield Kap pilai bilong Australia em kepten Lam, Bruce Mamando na David Westley, PNG i ken strongim difens bilong ol gut tru na daunim ol Nu

Silan. Tasol ol Kiwis tu i gat gutpela rekot bilong pilai egensim ol Kumuls.

Long narapela stori bilong ol Kumuls gen, ripot we i tok olsem ol Kumuls pilai i bin bagarapim wanpela meri long hotel bilong ol i no bin trupela. Ripot ya i tok olsem ol pilai i bin kisim dispela meri i go na repim em.

Ol opisals bilong Kumuls i tok olsem meri ya i bin giaman tasol olsem ol Kumul pilai i repim em na ol plis i no putim wanpela sas.

Long ol narapela stori bilong wol kap resis, Australia i bin bagarapim sindaun bilong ol South

Afrika 86-6 wol rekot poins long asdei.

Ol Australia i ron olsem ol longlong man bihain long lus bilong ol egensim ol England long Wembley long Sarere.

Andrew Johns na Chris Johns tupela brata husat i save pilai long New Castle Knights i bin painim ol yet i skorim 4-pela trai na i redi tasol nau gen long bungim ol Fiji.

Fiji bai traim ol England pastaim long ol i bungim ol Australia. Wina bilong dispela pul bai bungim Papua Niugini o Nu Silan.

# WARA SUA EELS PAWA



• SANAP LONG BAKSAIT: (L-R) Koski Maimo, George Gore, Peter Sterlo, Ben Muma, Tom Morea, David Gillespie, Gibson Wera, John Kepa (tim menesa), Peter Kura na John Simina. NAMEL: Peter, Peter Siba, Simon Nigal, Solo, Milki na Ninkama Willie. FRAN: Joe Kin, Bonny Rex, Rex Gaima (kepten) Peri Langer na Thomas Bane



• 5 mile Nogats husat i lus long Wara Sua Eels, Lukim stori long pes 3.

# Wara Sua Eels kirapim das long Unagi Lig



• Dispela em strongpela skrum we i save kamap long Unagi lig op sisen resis long Mosbi. Foto: Joe Ivaharia.

## RODNEY KAMUS i raitim

OL Stail mangi bilong Wara Sua Eels i mekim wanpela strongpela pilai tru long las wiken egensim ol 5 Mile Nogats we ol Eels i winim ol long 10-6 long Unagi Op Sisen Lig long Pot Mosbi.

Long tupela sait wantaim, ol fowats na beklain i bin mekim ol strongpela ron tru tasol ol lain bilong Eels i bin strong nogut tru na daunim ol Nogats long las minit stret.

Ol fowat lain bilong ol olsem Koski Maimo, David Gillespie na Solo Mako wantaim Gibson Wera i bin

mekim planti gutpela ron tru long helpim ol Eels. Bikipela helpim tru ol i kisim i kam long lok fowat bilong ol Peter Sterlo.

Ol lain fowat ya i bin mekim planti strongpela ron tru na stopim ol 5-mail Nogats long hap bilong ol yet.

Long feshap yet, Peter Sipa i brukim strongpela banis bilong ol 5 Mile Nogats na putim wanpela trai long namel long Pos stret na Rex Gaima i kikim konvesen isi tasol i go insait.

Dispela skoa i stap tasol i go inap long namba wan hap

i pinis na pilai i stat gen long namba tu hap.

Taim ol i statim gen pilai, ol mangi Nogat i laik bekim dinau. Ol i tromoi bal i go kam na kirapim bikipela paia stret egensim ol na putim wanpela trai egensim ol Eels.

Tasol ol Eels i kirapim bek paia bilong ol na skorim wanpela moa trai egensim ol Nogats tasol kik i no go insait gut na skoa i stap long 10-6 long fultaim na ol Wara Sua

Eels i winim dispela bikipela pilai long raun 3 bilong Unagi Op Sisen Lig resis.

# Jiwaka Tigers bai bungim GS Magani long Fainol

## Banz lig ripot

JIWAKA Tigers ol lain kandere blong Saut Wagi husait i bin istap sambai tasol long pilai long gren fainol tupela wik olgeta nau bai bungim ol yangpela blong het wara Mombol, GS Magani long dispela wik Sande long Banz Lig graun. Ol Jiwaka Tigers i pes tim long igo istap sambai taim ol i daunim ol GS Magani long Priliminari Fainol tupela wik igo, na igo stret long gren fainol. Ol bois bilong het wara Mombol i strong las wik na bagarapim sindaun blong Brothers 16 to ??? wik Sande long jeija semi olsem na nau bai ol bungim Jiwaka Tigers long painim husait i sempion tim long Banz Lig.

Long dispela taim get GS Magani wantaim, Jiwaka Tigers i brukim rekot blong Banz lig long wanem olgeta grets blong tupela tim wantaim bai bung long gren fainol. Em long Anda 19, B Gret na A Gret. Dispela ol gren fainol bai kamap namel long Jiwaka Tigers na GS Magani tasol.

Long kem blong Jiwaka Tigers ol i redi tasol long rausim magani igo na karim primiasip igo long narapela sait blong warawagi. Ol i bin rausim Magani long priliminari Fainol na ol i gat strongpela bilip bai ol i mekim wankain pilai long dispela wik Sande long gren fainol. Taim Ragbi lig nius i bungim kepten blong ol, Mista John Taime em i tok, em i save olsem ol Magani bai ikam strong tasol ol bois blong em bai redi tasol long stopim wanem gem plen ol i usim. Em i tok moa olsem ol Magani i wok long pilai i kam na bai ol i gat mets fitnes na ol bois blong em i malolo tupela wiks tasol dispela bai nogat problem blong wanem ol lain blong em i gat sampela gem plen pinis long bagarapim sindaun blong ol GS Magani.

Long kem blong GS Magani ol istap nau long strongpela trening long bungim ol bois blong Saut Wagi. Ol Magani i save pilai long fitnes blong wanem ol i stap long trening olgeta taim na save pilai long 80-minits olgeta. Ol Tigers i gat ol hevi na bikipela pilaias tasol sapos ol i no pilai long gem plen blong ol, ol i mas was long ol bois blong het wara Mombol bikos ol i ken tromoi bal igo ikam na raun long lain blong Tigers.

Taim Ragbi Lig Nius bungim Namba tu kepten blong GS Magani, Mista Peter Singal, i tok em i no gat planti toktok tasol bai lukim long Sande. Em i tok bihain long 80-minits long Sande bai ol manmeri i ken lukim husait i sempion tim long Banz. Em i tok liklik moa olsem ol bois blong em bai strongim difens blong ol na traim moa long istap long hap blong ol Tigers long painim ol lus bal na skoarim pions. Peter i tok ol Tigers i bikipela na hevi olsem na ol bois blong em bai i go ap na mit tasol na traim pilai i stap long 80-minits olgeta na lukluk long win.

Em hia nau lain-up blong tupela tim long Sande:-

## Jiwaka Tigers

Fullback - Mali Puma, L/wing Albert Bill, O/senta - Tony Kui, I/senta - John Taime (captain), R/wing - Thompson Telepo, Faivet - Johnson Pakiyo, hapbek - Joseph Warai, Prop - Nickson Wan, Huka - Alphonse Turi, Prop - John Konga, S/Row - Taima Markie, S/Row - John Opo, Lock - Gibson Siune (V/Capt), Risev - Phillip Alu, Joe Koimo, Thomas Trai.

## GS Magani

Fullback - Timothy Ginga, L/wing - Edwin Ongol, O/senta - Ding Kur, I/senta - Billy Kolip, R/wing - Joe Komni, Faivet - Peter Angelye, Hapbek - Kevin Noah (Captain), Prop - Jika Tol, Huka - John Dar, Prop - Paul Kulung, S/Row - Billing Ngundumb, S/Row - Pren Tai, Lock - David Bins, Risevs - Thomas Kenken, Bobby Topo.

# Tonga i hamamas long Australia i lus

OL Tonga i gat bikipela hamamas long taim Australia i lus long bikipela skoa long Englan taim tupela i bung long namba wan pilai bilong al long wal kap rugby lig.

Australia i lus long 4-pela poin na husait i bagarapim pilai bilong ol kanagros em tupda biknem pilai bilong al Tonga husait ol Australia i bin "stilizim" long tim bilong ol.

Ol selecta bilong Tonga Ragbi Lig i bin kolim nem bilong tupela long stap insait long tim bilong Tonga long pilai resis long wol kap.

Ol selectas bilong Australia tu i kilim nem bilong tupela long tim bilong ol kangaroo. Dispela i mekim na tupela yet i mekim final decision long wanem kantri tupela i laik pilai.

Ol Australia i save olsem nupela i kolim ol pinis long lain-up bilong miple na dispela kain stil pasen bilong Australia i nogutpela wanpela opisal bilong Tonga i tok.

Olsem na ol Tonga, i lusim tupela Dymock na Hopoate i go long nem bilong Australia Kangaroos na ol bin gat bikipela belhavi long dispela.

Dymock i pilai lock na Hopoate i pilai winga taim ol i bungim ol England long Wembley Stadium long las Sende.

Ol Tonga i no wanbel long tupela long mekim bekkol pasin long Tonga, tupela pialia i mekim bikipela asua na Australia in lus.

Hopoate i lusim bal klostu long trei lain bilong en na ol England i kisim

## Wol kap ripot

dispela bal na skoam wanpela trai.


Bihain liklik teim ol Australia i luk olsem ol bai i 5 skoam wanpela trai long win. Dymock i wokim wanepla kranki pass na bal i go stret long han bilong ol Englan na ol i ran i go na skoaim trai we ol i lus kickim i go insait na winim dispela pilai.

Ol Tonga i hamamas long dispela bikos Australia i no wokim gutpela pasin long ol bihainim dispela, ol Tonga i go klostu stret long autim

ticket bilong ol New Zealand Kiwis long namba wan pilai bilong ol.

Fulbek bilong Kiwis, Mathew Ridge, i kickim wanpea fill goal bilong winim wanpel strongpela pilai we i bim kamap namel long tupela wan sot wara. Ol man husat i lukautim wol kap i putim Tonga, New Zealand na Papua Niugini long wanpela pool.

Dispela i min olsem ol bai i pelaim wanpela narapel na husait i go pas bai i salensim ol narapela



## • Hopoate.


husat i win long arapela pool planti man i ting olsem Niu Zealand bai winim dispela pilai long

dispela pool na salensim England or Australia long final ni Papua Niugini i nogat sens.

Sydni Ragbi  
lig gren  
fainel rivi

OI


# Bulldog i gat nem



● Cliff Lyons wantaim narapela Manly pilaia i takelim Mathew Ryan.



● Tripela Bulldogs i amamasim wangepa trai bilong ol.



● Dean Pay ron wantaim bal egens ol Manly long gren fainel.

# Ol strongplea Bulldogs i kisim dispela bikpela taim

TAIM Nik Kosef i brukim banis bilong Bulldogs long raik kona na salim Craig Hancock long sisti i go daun long trai lain bilong ol Bulldogs long 21 minit long tupela wik i go pinis, Manly i stil i gat sans long winim dispela pilai yet.

Bihain long dispela Daryl Halligan i ron long hapsait long Sidni Futbal Stedim i kam na mekim tripela man olgeta i pusim Hancock i go outsait long lain.

Long dispela taim, em i soim stret olsem Manly i pinis olgeta nau. I luk olsem em i namba 7 takel sampela minit bihain we ol Bulldogs i skoa long surikim lik bilong ol i go antap long 10-4 i mekim ol i win. Tasol dispela em long save bilong ol yet.

Long olgeta hap kona we Manly i go, planti Bulldogs tru bai raunim ol wantaim strongpela pes na singaut antap long ol wantaim na soim stret olsem bai ol i kilim ol eagles stret.


Long dispela kain stail bilong gren fainel we long olgeta wik i kam antap ol i winim ol Canberra, Brisbane na St George, Manly i ken abrusim sampela ol man bilong takel.

Tasol wanem hap ol i brukim banis, ol bai lukim wanpela Bulldog moa i kam antap long takelim ol. . . .o tupela o tripela man bai sanap long stopim ol. I luk olsem i nogat rot olgeta bilong ol long ron.

Long dispela tim husat i yusim planti taim long sanap long kot namel long ol yet, i kamapim gutpela spirit tru we i helpim ol long win.

Bihain long gutpela pilai bilong ol we ol i winim Canberra, olgeta toktok i kamap bikpela moa yet olsem dispela strongpela difens bilong ol bai helpim ol stret long bagarapim sindaun bilong ol Manly.

Na taim pilai i kamap tru, i no dispela difens tasol i mekim na ol i win. I luk olsem ol i gat planti moa man long mekim difens bilong ol i strong olgeta taim. Long sampelas taim bai yu lukim olsem ol Bulldogs i gat moa long



● Mark Carol i sindaun na sore bihain long taim ol i lus long ol Bulldogs

Manly bai painim hat tru long kaikai dispela ol toktok ol tripela trai bilong ol Bulldogs i gat kwesten mak antap long ol na wanpela em wanpela gutpela trai tru referi i tok nogat.

18 pilaia antap long pilai graun na tu ol i ritim gut tru atek bilong ol Manly na hariap tru ol i karamapim ol hul bilong ol Manly long ron.

Manly bai painim hat tru long kaikai dispela ol toktok olsem ol tripela trai bilong ol Bulldogs i gat kwesten mak antap long ol na wanpela em wanpela gutpela trai tru em referi i tok nogat. Na tu ol

i nogat toktok moa olsem dispela sotpela spes bilong 10 mita lo i no kamap long pilai we ol yet i ken opim pilai bilong ol.

Tasol long olgeta samting bai pinis, ol i nogat bikpela tingting long traim pilai strong wantaim ol Bulldogs husat i gat fom na bikpela komitmen long winim dispela pilai. Dispela pinis tu i wanpela bikpela tru na namba wan

samting tru long kepten bilong ol Bulldogs Terry Lamb.

Lamb i no save kisim wanpela kalabus man long ol bikpela pilai na i pilai wanpela ol olpela trik bilong em hariap we em i kisim 10-pela minit insait long sin bin.

Tasol taim ol chips i pinis, em i kisim wanpela gutpela pilai tru we i apim tingting bilong tim bilong em long winim dispela pilai na i yusim het bilong em long pilai na putim planti moa samting egensim birua bilong em Cliff Lyons.

Manly em wanpela tim husat i stap long fom long stat bilong sisen yet na Bulldogs em wanpela tim we i go insait long kankain hevi.

Tasol long olgeta samting em pilai long Septemba tasol ol i save kauntim na long dispela kain futbal, Lamb wantaim ol lain pilaia bilong em i king.

Olsem fainel bilong sisen i pinis i soim stret drama bilong Supa Lig egensim ARL na bainot i tanim taim pilai pinis-we yu ken lukim John Quayle i sekanim Peter Moore-na ol lain i win i kisim bikpela rispek namel long ol yet.

Dispela olsem fainel bilong Winfield spona i no olpela tumas tasol em i wanpela strongpela tru.

Dispela pilai i wanpela hatpela tru na tupela tim wantaim i pait strong tru.

Na dispela so bipo long pilai long onarim Winfield i wanpela gutpela na naispela stret.




Em i wanpela bikpela samting tru long stori bilong ragbi lig. Long neks yia, bai i nogat moa Winfield Kap.

Manly na Bulldogs bai i no nap pilai gen long neks yia, na i tru olsem tupela bai no nap wankain moa.

Tasol taim Norm Provan na Arthur Summons i pasim dispela Winfield Cup i go long ol long laspela, ol gutpela yia, las nau, i stap gut tru. Na i luk olsem i nogat wanpela bai lus tingting long dispela.

- RUGBY LEAGUE WEEK

# Unagi lig eksen piksa



*"Ragbi lig sisen i pinis nau"*




• Magani kepten wantaim tropi bilong anda 19.



• Ol sapotas tu i amamas long Brothers long winim Lae lig.



• Magani anda 19 tim husat i win long Lae lig.



• Kiunga A gret sil i bin go long Brothers.



• *Sisen i pinis:* Lae Brothers tim kepten i apim Agret winfield tropi taim ol i winim gren fainel.

# Fiji salim tok lukaut long England

KEIGHLEY, England: WOL Kap ragbi lig utsaida South Afrika i bin kisim bikpela bagarap tru long han bilong ol Fiji long grup 1 bilong Wol Kap Ragbi Lig resis long Sande. Ol lain Fiji i kamapim gutpela na strongpela pilai tru long ron i go insait wantaim 10-pela trai egensim ol Rhinos, husat i nogat sans olgeta long winim wanpela pilai.

Na long asdei nait gen, Tunde, Ol Australia i bagarapim sindaun bilong ol South Afrika nogut stret wantraim 86-6 skoolain. Ol Australia husat i lus long ol England long Sarere i no givim wanpela sans liklik long ol South Afrika.

Ol Fiji tu nau i mekim strongpela toktok tru i go long ol lain long England long taim

## Fiji 56 vs South Afrika 6

ol i bungim ol long Wigan long Tudei olsem ol bai ino nap givim wanpela pilai i go isi nating long ol England.

Bipo long dispela bikpela pilai bilong ol, ol Fiji i mekim wanpela danis bilong ol long pait pinis na kamapim gutpela kain stail pilai long taim ol i holim bal.

Fiji i bin gho pas long skoa insait long 5- minit mak tasol taim winga Noa Nadruku na fulbek Waisale Sovatabau i skorim tupela trai.

Wanpela namba wan pilai bilong ol Noa Nayacakalou husat i save pilai wantaim Penrith i kikim wanpela gol long putim ol long 10-0 insait long 9-pela minit tasol.

Tasol long nogat gutpela disiplin long sait bilong ol na ol South Afrika i skoa taim fulbek bilong ol Pierre Van Wyk i kikim tripela penelti gol na surikim ol i go klostu long 10-6.

Dispela em skoa i stap olsem tasol i go inap long haptaim. Tasol bipo long belo i krai senta bilong Fiji Filimoni Seru i ron i go na putim wanpela trai bilong ol na ol i go pas gen long 16-6 long haptaim.

Bihain long haptaim, Nayacakalou i kikim wanpela gol. Olsem ol Rhinos i laik traime holim ol, i nogat wanpela samting i nap long helpim ol taim ol Fiji i ronm i go insait long namba tu hap na putim 5-pela trai olgeta.

# England mekim 6-pela senis long tim

WIGAN, England: KOSA bilong England Phil Larder i mekim 6-pela senis long sait bilong em long pilai egensim ol Fiji ol Wol Kap resis long Sentrel Park long Trinde.

Hapbek bilong St Helens Bobby Goulding bai mekim namba wan pilai bilong em long intanesenel sin na faiv-eit em bai Tony Smith husat i save pilai wantaim Castleford.

Ol Prop fowat em bai Paul Broadbent na Dean Simpson i kam insait wantaim ol fowat na seken rowa bilong Wigan Mick Cassidy bai pilai tu long England fowat lainap. Na senta bilong Keighley Nick Pinkney bai kisim ples bilong senta bilong Wigan Barrie-Jon Mather.

Goulding i senisim Shaun Edwards bilong Wigan husat i bin go pas long ol England long winim ol Australia 20-16 long Wembley long las wik Sarere. Edwards i misim trenining long

wanem em i bin kisim liklik sik long bel tasol i i putim nem bilong em long stap long risev.

"Mipela i no laik long mekim na ol narapela pilaia tu bai kisim wankain sik olsem na mipela i no laikim Shaun long kamap long hetkwata inap sik bilong em bai pinis," Larder i tok.

Mather na Daryl Powell tupela wantaim i kisim bagarap na Larder i lusim Phil Clarke, Karl Harrison na Andy Platt long stap malolo. "Mipela i bin makim 24 strongpela man olgeta long skwat na em i bikpela samting tru olsem olgeta yet i mas pilim olsem ol tu i stap insait long olgeta samting mipela i mekim.

"Mi tokim olgeta olsem mi bai traime na givim em olgeta sans long bruk i go insait long tim sapos mipela i go olgeta long semi fainel. Olsem na em i bikpela samting long mipela i mas winin ol Fiji.

The Press Association

# Fil Gol bilong Ridge helpim ol Nu Silan long win

## Nu Silan 25 vs Tonga 24

WARRINGTON, England: WANPELA fil gol long las minit stret i kam long kepten bilong Nu Silan Kiwis Mathew Ridge i sevim ol Nu Silan long grup 2 ragbi lig bilong wol kap long Sande.

Ol Tonga klostu long ful taim bilong dispela pilai i bin go pas long 24-18 na i luk olsem ol inap long winim Nu Silan inap wanpela minit i lep long klok na senta Richie Blackmore i skoa long pasim ol Nu Silan na Tonga long 24-24.

Pilaia bilong Manly ya Mathew Ridge i kikim tupela moa pons long levelim skoa insait long las minit stret bilong pilaia em i kikim dispela bikpela fil gol na sait bilong em i win long 25-24.

Nu Silan nau i mas traime hat tru long winim Papua Niugini Kumuls long kisim wanpela ples bilong ol yet long semi fainel egensim Australia, na Mathew Ridge i soim olsem ol Kiwis i kam autsait pinis long bikpela bagarap.

"Mi bilip olsem ol manmeri husat i kamap long lukim dispela pilai i bin laikim tru," em i tok. "Ol Tonga i pilai antap tru tasol i no bin laki tumas long lusim dispela pilai taim pilai ya i pinis."

Ol Tonga husat i nogat bikpela nem long Ragbi Lig Wol i mekim wanpela gutpela stat bilong pilai tru na kisim lid long 12 minit taim hapbek Willie Wolfgram i skoa.

Tasol Nu Silan i bekim bekim wantaim wanpela

gutpela trai i kam long winga Sean Hoppe na putim tupela moa bipo long haptaim taim Tony Kemp na Blackmore i wok long lukim ol hul i kamap long difens bilong ol Tonga.

Em i kamap olsem ol Nu Silan bai winim dispela pilai isi tru long namba wan hap tasol ol Tonga i kamap wantaim strongpela pilai tru long seken hap.

Ol i skorim tripela moa trai long winga Una Taufu na Jimmy Vaikoso na ol senis pilai Salesi Finau na Asa Amone i kikim 4-pela gol long go pas long 24-12 insait long fainel 10 minit bilong pilai.

Senis pilaia bilong ol Kiwis Hitrone Okesene i putim namba tri trai na strongpela ron bilong Blackmore i givim sans long Ridge long sevim dei bilong ol.

# Rong bilong Hopoate i mekim na England i win

LONDON: Lus bilong Australia Kangaroos i go long ol England long las wik Sarere i mekim ol nau bai bihainim wanpela hatpela rot stret i go long ol semi fainels nau bihain long ol i lus 20-16 long Wembley Stadium.

Ol Australia i mas pilaim Nu Silan nau long semi fainels sapos ol Nu Silan i kamap namba wan long pul bilong ol. Nu Silan i stap wantaim Tonga na Papua Niugini long wanpela pul tasol. Dispela lus bilong ol Australia long Sarere em namba tri taim nau ol i bin lus long dispela

## England 20 vs Australia 16

bikpela stedium bilong England.

Long yangpela winga bilong Australia John Hopoate, dispela lus bilong ol long Wembley i no wanpela samting tasol em i mekim planti bikpela asua we i lukim trai bilong ol England i kamap. Wanpela bilong ol asua bilong Hopoate em long lusim bal 5 mita klostu long trai lain bilong em na ol England i skoa.

Dispela nau i soim ol dispela tim bilong England i mekim gutpela wok na winim ol

Australia na bai pulim planti moa sapota long kamap long lukim ol dispela pilai. Long taim dispela resis i stat tasol, planti man i makim Australia olsem feveret tim tasol nau i luk olsem ol bai tingting planti gen long wanem long namba wan pilai bilong ol, em ol i lsu long ol Australia.

Kosa bilong Australia Bob Fulton long namba wan taim em bin toktok olsem ol England na Australia bai feveret bilong dispela resis i kamap tru nau bihain long ol England i

winim ol Australia. Fulton i no toktok long mekim wanpela senis na bikpela tru em planti i ting em bai senisim John Hopoate. Fulton i tok olsem Hopoate bai stil pilai yet maski long wanem samting em i mekim long Wembley.

Kosa bilong England Phil Lader wankain olsem Ellery Hanley husat i winim namba wan pilai bilong em long kantri olsem kosa i tok olsem tim bilong em wantaim em yet i laikim tru long bungim ol England long gren fainel bilong dispela wol kap resis.



• Mathew Ridge.



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.